

LE GULUNĒ' BÖNNI' GUBÁZ NASÖL-LĒ'Ē CRISTO Los Hechos

Le guzxí' lu nĕ'ĕ Dios, isöl-lĕ'ĕ Dios Bö' Lá'ayi

¹ Cate' buzúaja' lu guichi zí'alö, quiu' li', Teófilo, neda', Lucas, buzúaja' yúgu'tĕ le gusí lahuĕ' runĕ' Jesús, en rusédinĕ'

² ga bidxintĕ dza buĕpĕ' yehua' yubá. Cate' si' huĕpĕ' Jesús yehua' yubá, dzáguiĕ' Dios Bö' Lá'ayi Lĕ', gunná bĕ'ĕ ca ral-la' ilunĕ' gubáz queĕ', yugu' bönni' na' guró cazĕ'.

³ Gudödi gudí'i guxzáquĕ'ĕ Jesús, gútiĕ'. Ní'irö bubanĕ', en buluí'i lahuĕ' lógaquiĕ' gubáz queĕ' na'. Buluínĕ' lógaquiĕ' zían le gulaca bĕ' zoĕ' nabanĕ', le cabí gaca nu tá'baga'. Zían luzuí buluí'i lahuĕ' lógaquiĕ' idú ca choá' dza, en bĕ'lenĕ' lógaquiĕ' didza' ca rinná bĕ'ĕ Dios.

⁴ Cate' ni' nacu'ĕ tsözxón, gunná bé'enĕ' lógaquiĕ' cabí ulu'zĕ'ĕ Jerusalén. Jesús gudxĕ' lógaquiĕ', rnnĕ':

—Guli'cöz ni' le guzxí' lu nĕ'ĕ Xuza' isöl-lĕ'ĕ queĕli' ca na' chibusiyón quézida' libí'ili'.

⁵ Gunnĕ' ca':

—Le nácatĕ Juan buquilĕ' bönachi nisa lu nisa. Na'a bití' tse xidzé gaca queĕli' le ruluí'i yöl-la' ridila nisa ni, idisóalenĕ' Dios Bö' Lá'ayi libí'ili'.

Ruhuĕpĕ' Jesús yehua' yubá

⁶ Ní'irö yugu' bönni' ta'yéajlĕ'ĕ Jesús, nudúbigaquiĕ' ni', gula'nábinĕ' Lĕ', ta'nnĕ':

—Xan, ¿naru' gunu' ga ila'nná bē' bōnachi Israel leyúbölö dza ni zóaru' na'a?

⁷ Jesús gudxē' légaquiē':

—Biti' nequi queēli' inōzili' bizxi dza o bizxi dzō gunē' Dios Xuz le nuzōē' lu na' cazē'.

⁸ Sí'ili' yōl-la' huáca cate' guídē' Dios Bō' Lá'ayi idisóalenē' libí'ili'. Ní'irō gunli' ba nalí quia' neda' lu yōdzō Jerusalén, en idú luyú Judea, en luyú Samaria, en ga idxíntēli' idútē yōdzōlió.

⁹ Cate' budxi bē'lenē' légaquiē' didza' ni, tsanni ni' tu'yusē' ca' Lē', la' buēpītē' xitsá' ga rō'ō tu böaj le bucache' Lē', ate' bítirō' bila'lē'enē' Lē'.

¹⁰ Tsanni ni' tu'yúē' lúxibalō cate' ni' buēpē' Jesús, bulu'lu'í lógaquiē' chopē' gubáz lá'ayi ga na' nacu'ē, nácugaquiē' lari' chiguíchido'os.

¹¹ Chopē' ni gulē' légaquiē', ta'nnē':

—Bōnni' Galilea, ¿bizx que ruyuli' lúxibalō? Lē' cazē' Jesús ni si' guzē'ē ga zóali', buēpē' yehua' yubá, lēasca' caní huōdē' leyúbölö ca na' chibilé'eli-nē' sōhuōjē' yehua' yubá.

Ta'bōē' Matías para tsáziē' xilatjē' Judas

¹² Ní'irō gula'zē'ē ga na' rō'ō gu'ado' na' nazí'i le Gu'á Yaga Olivo, ate' yōjhuōjgaquiē' Jerusalén. Gu'ado' ni dē gála'sō ga dē Jerusalén, tsa nazí'gaquiē' lataj ta'zē'ē dza lá'ayi quégaquiē'.

¹³ Cate' bulu'dxinē' yōdzō ni', gula'benē' ga naca buropi cuía lu yu'u, ga ni' ta'cu'ē Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxí'inē' Alfeo, en Simón, bōnni' na' ru'í'i ladxē'ē ladzē', en Judas, bōchē'ē Jacobo.

14 Yúgu'të bönni' ni tu'lidzë' Dios tsözxön, ate' yugu' böchë'ë Jesús, en María, xinë'ë Jesús, en ia'zica'rönu nigula ca' núngaquië' légaquië' tsözxön.

15 La' dza ná'asö guzuínë' Pedro gatsaj lähui'lö ga nacu'ë böchi' luzá'aru' na' ta'yéajlë'ë Cristo. Gulaca idú ca xópalalaj bönachi nupa nudúbigaca ni'.

16 Pedro gudxë' légaquië', rnnë':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunné' Dios Bö' Lá'ayi dza ní'të, le buzúajë' David lu guichi, ca guca queë' Judas, bönni' na' guchë'ë nupa ni' gula'zön Jesús.

17 Judas na' gubábalenë' rë'u, en bénlenë' rë'u tsözxön dxin ni.

18 Gula'zí'inë' tu la' yëla lazxaj que dö' na' bi'ë bönni' ni. Judas ni gubixë', en biröza' lë'ë, ate' bila'rúaj yúgu'të le dzö'ö lë'ë.

19 Cate' bila'yöni bönachi nacuá' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön.

20 Caní guca queë' Judas, ca na' nazúaj lu guichi lá'ayi nazi'i le Salmos, le rnna: Ugá'ana cá'asö lidxë', en biti' idzöli nu soa yu'u na'.

Rnna ca':

Nu yúbölö tsaza xilatjë'.

21-22 'Run bayudxi na'a cöru'-në' tu bönni' gunë' rë'u tsözxön para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ní'te cate' ni' Xanru' Jesús gudálenë' rë'u. Gula'sí lógaquië' nacuá'lenë' rë'u cate' ni' buquilé' Juan bönachi nisa, ga bidxintë dza buëpë' Jesús yehua' yubá, cate' buzë'ë ga zóaru'.

²³ Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo.

²⁴ Ní'irö bulu'lidzë' Dios, ta'nnë':

–Xantu' Dios, nunbë' cazu' icja ládxi'do'gaca yúgu'të bönachi. Buluí'i netu' nulë' chopë' ni chig-uró cazu' Li'

²⁵ para tsázië' lu dxin ni para gáquië' gubáz quiu'. Tsázië' xilatjë' Judas, bönni' ni' bunítië' xilatjë' tu' benë' dul-la', ate' guyijë' xilataj cazë' lataj chul-la.

²⁶ Ní'irö bulu'zúajë' yugu' lu guichi lágaquië', tu queë' José, en ia'tú queë' Matías. Bulu'gútsi'në' luzë'eguequi, en bulu'béajë' tu, ate' birúaj le nazúaj lë' Matías. Caní guca, Matías na' gubábalenë' ia'chinéajë' gubáz queë' Cristo.

2

Dios Bö' Lá'ayi ridisóalenë' légaquië'

¹ Cate' chibidxín dza Pentecostés, nudúbigaquië' tsözxön yúgu'të bönni' ta'yéajlë'ë Cristo.

² Tsárido'os biyön bö le birúaj lúzhiba, le biyön ca riyön cate' recja bö' budunu', ate' biyön idútë lu yu'u ga na' rő'ogaquië'.

³ Bulu'luí'i lahui yugu' bululu guí'do' lu bö'ös lógaquië', ate' gula'guísi que queëgaquië'. Bidisóalengaca tu tuë'.

⁴ Caní guca, Dios Bö' Lá'ayi bidisóalenë' yúgu'të', ate' gula'sí lógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

⁵ Nacu'ë zían bönni' judío yödzö Jerusalén dza na', nácagaquië' bönni' ta'yéaj ládxi'gaquië' Dios, en zá'gaquië' narúajgaquië' yúgu'të yödzö idútë yödzölió ni.

6 Cate' bila'yönnë' bö na', bulu'dubë' bönni' zían, ate' gula'bö'ë böniga, tu' bila'yönnë', ca naca xtídza'gaquië' que queëgaquië', tu'ë didza' bönni' na' ta'yéajlë'ë Cristo.

7 Gula'ná' badxë' yúgu'të', en bulu'bánninë, ta'nnë':

—Buli'yútsöca'. ¿Naru' calëga bönni' Galilea yúgu'të bönni' ni tu'ë didza'?

8 ¿Nacxi caz naca riyöniru' tu'ë xtídza'ru' ca naca didza' ru'iru' tu'uru'?

9 Rë'u ni nácaru' bönni' zían yödzö, bönni' narúajgaquië'

luyú Partia, en luyú Media, en luyú Elam,

en luyú Mesopotamia, en luyú Judea, en luyú Capadocia,

en luyú Ponto, en luyú Asia,

10 en luyú Frigia, en luyú Panfilia, en luyú Egipto, en luyú Africa, ga nácarö zi'tu' ga dë luyú Cirene.

'Lësca' nacu'ë bönni' yödzö Roma ni. Bal-lë' nácagaquië' bönni' judío, en ia'bal-lë' nazí lu ná'agaquië' le ta'yéajlë'ë bönni' judío Dios.

11 Lësca' nacu'ë ni yugu' bönni' narúajgaquië' Creta, en luyú Arabia. Riyöniru' tu'ë didza' ru'iru' que queëru', ate' ta'guíxjö'ë yugu' le zxön benë' Dios, le tun ga rubániru'.

12 Caní guca, bulu'bánninë yúgu'të', en gula'bö'ë böniga. Gulé luzá'agaquië' tuë' ia'túë', ta'nnë':

—¿Bizxi caz lë ni?

13 Bulu'titjë' bal-lë', ta'nnë':

—¡Ta'zúdxinë'!

Libán benë' Pedro lógaca bönachi zían

14 Ní'irö Pedro guzuílenë' ia'chinéajë' gubáz na' nasöl-lë'ë Cristo, ate' gusí lahuë' ru'ë zidzaj didza', rë' légaquië':

—¡Libí'ili', bönni' Judea, en yúgu'tëli' nacua'ali' yödzö Jerusalén! ¡Lë ni ral-la' inözili'! ¡Buli'zë nágali' le guía' libí'ili'!

15 Netu' ni bití' rizúdxitu' ca na' réquili' libí'ili', tu' ni zóaru' si' gala' xsila, ate' cuntu nu rizudxi hora caní.

16 Lë ni naca le gunné' Joel, bönni' bë'ë didza' uláz queë' Dios, gunné':

17 Caní rnnë' Dios: Lë ni le gaca dza tsöjsëtëgaca. Isöl-la'a Bö' Lá'ayi quia', tsöjsóalenë' yúgu'të bönachi.

Zxí'inili', bönni', en nigula, ilu'í'ibi' didza' uláz quia' neda'.

Yugu' bí'i ra'bán ila'lé'ebi' le ulu'a lahui, ate' yugu' bönni' gula ila'nenë' yëla.

18 Cate' idxín dza ni' quísia' Bö' Lá'ayi quia', tsöjsóalenë' huen dxin quia', bönni', en nigula, ate' ilu'ë didza' uláz quia' neda'.

19 Ulu'a lahui lúzxiba xitsá' le ilún ga ulu'bani bönachi,

ate' yödzölió ulu'a lahui le ilaca bë', rön, en guí', en dzön ca böaj.

20 Ichul-la gubidza, ate' gaca beo' xiná ca naca rön. Caní gaca cate' idxín dza ni' chibulu'ë Dios.

Gaca dza ni' le catu caz rilé'eru'.

21 Ulu'lágaca yúgu'të nupa ni' ulu'lidza Lë' Xanru', lu yöl-la' réajlë' quéguequi Lë'.

22 'Buli'zë nágali' lë ni guía' libí'ili', bönachi Israel. Dios caz benë' bal Jesús, bönni' Nazaret ga zóali'. Dios bë'ë Lë' lataj benë' le tun ga rubániru', yugu'

yöl-la' huáca, en le taca bë'. Yúgu'të lë na' benë' Dios lu në'ë Jesús, ca na' chinöz quézili'.

²³ Lësca' caní, Dios bë'ë lataj nu budödi Jesús lu ná'ali'. Caní guca, ca na' chigunná ládxë'ë Dios gunë', en ca naca le chibucözë' dza ni'te. Libí'i cázali' guzxönlí'-në' Jesús, en bëtilí'-në' lu ná'agaquië' yugu' bönni' tuá' dö', bönni' gulútië' Lë' cate' ni' bulu'dá'gaquië' Lë' lë'e yaga cruz.

²⁴ Ní'irö Dios caz busubanë' Jesús na'. Bubéajë' Lë' lu yöl-la' guti, tu' cabí guca ugá'anë' tsaz lu yöl-la' guti na'.

²⁵ Ca naca lë ni, bë'ë didza' David uláz queë' Dios ca naca queë' Jesús, gunnë':

Bilé'etiquí'sida'-në' Xanru', zoë' lahua'.

Lë' zoë' cuita lë'a ibëla, rizönë' neda', para cabí gaca nu bi gun quia'.

²⁶ Que lë ni na' budzeja ládxa'a, ate' lu yöl-la' rudzeja quia' bil-la'.

Que lë ni na' guna' löza Lë' cate' idxín dza gátia'.

²⁷ Xantu' Dios, nözda' biti' ucá'anú' neda'

lataj chul-la ga nacuá' nupa nátigaca.

Biti' gu'u lataj initi idútë le naca'.

Naca' bönni' nadxí'i quézinu' Li'.

²⁸ Buzéajni'inu' neda' ca ral-la' guna'

para idéli'da' yöl-la' na'bán idú.

Gunu' ga udzėjada' tu' zóalen cazu' neda'.

²⁹ 'Na'a, libí'ili', böcha'a. Naca bë' gútië' xuz xtó'oru' David, en bigáchë'ë yeru ba, ate' ba queë' na' dë ga zóaru' ga ridxintë na'a dza.

³⁰ David na' bë'ë didza' uláz queë' Dios, en gunözinë' benë' tsutsu Dios didza' le guzxí' lu në'ë

queë', gunë' ga galjë' Cristo ladaj di'a dza queë' si zá'gaca, ate' Cristo na' inná bë'ë xilatjë' David na'.

³¹ Tu' bilé'enë' David lë ni zí'alö, bë'ë didza' ca guca, bubanë' Cristo, en ca guca, biti' bugá'anë' lataj chul-la ga nacuá' nupa nátigaca, en biti' guniti le naca cazë'.

³² Dios busubanë' Jesús lu yöl-la' guti, ate' ca guca lë ni yúgu'tëtu' runtu' ba nalí que.

³³ Caní guca, len yöl-la' huáca queë', Dios buchisë' Lë' xitsá' ga ni nácatërë' zxön. Na'a, Cristo chigusöl-lë'ë Dios Bö' Lá'ayi ni, ate' raca ca na' guzxí' lu në'ë Dios gunë' lu në'ë Cristo, ate' Dios Bö' Lá'ayi na' runë' yugu' lë ni rilé'eli', en riyönili'.

³⁴ Biti' buëpë' David na' yehua' yubá, pero lë cazë' David na' gunnë':

Xanru' Dios gudxë' Xana':

Gurö'i cuita lë'a ibëla ga naca lo

³⁵ cate' gunra' ga ulu'zechu zxíbigaca nupa ta'dá'baga' Li' lo' Li'.

³⁶ Na'a, bönachi Israel, ral-la' inözili' le nácatë. Dios benë' ga náquië' Lë' cazë' Jesús ni Xanru', en Bönni' Rusölá, bönni' na' budá'ali-në' lë'e yaga cruz.

³⁷ Cate' yugu' bönni' ni' bila'yönnë' lë ni, gula'bö'ë böniga, ate' gulë' Pedro, en ia'zica'rë' bönni' gubáz queë' Cristo, ta'nnë':

—Böchi'ru', ¿nacxi gúntsatu'?

³⁸ Ní'irö Pedro gudxë' légaquië':

—Buli'bí'i ládxi'li', en guli'dila nisa tu tuli' lu Lë' Jesucristo para uniti lahuë' Dios dul-la' nabága'li', ate' Dios Bö' Lá'ayi idisóalenë' libí'ili', Nu na' isöl-lë'ë Dios.

³⁹ Queëli' nequi le guzxí' lu në'ë Dios, en quégaca zxi'inili', enca' quégaca yúgu'të bönachi izá'a, yúgu'të bönni' ni' ulidzë' Xanru' Dios légaquië'.

⁴⁰ Yugu' didza' ni, en ia'bal-la zián didza' benë' ba nalí Pedro, le guchízië' icja nágagaquië', gunnë':
—Guli'gún ga uláli', irúajli' ladjagaca bönachi tuá' dö' nacuá' dza ni zóaru' na'a.

⁴¹ Caní guca, gula'dila nisa nupa ni' gula'zí' lu në'eguequi didza' na' bë'ë Pedro. Dza na' ca chi uruá' gayuá' bönachi gulún légaquië' tuz.

⁴² Gulunë' yúgu'të' idútë le bulu'sédinë' gubáz nasöl-lë'ë Cristo légaquië'. Guláquië' tuz tuë' len ia'túë', en gulahuë' tsözxön le rusá' ladxí'ru' ca gútië' Jesús, ate' gulunë' tsözxön, bulu'lidzë' Dios.

Ca tun bönachi queë' Cristo

⁴³ Gulunë' gubáz queë' Cristo zián le run ga rubániru', en zián le taca bë', pero guladxi gula'dzöbi ia'zica'rö bönachi.

⁴⁴ Yúgu'të nupa na' ta'yéajlë' Cristo gulaca tuz, ate' bulu'ún tuz yúgu'të le dë quéguequi.

⁴⁵ Cate' bila'lé'enë' ta'yadzaj nupa nútsa'gaca ladjagaquië', ní'irö yugu' bönni' bi dë quégaquië' gulúti'ë le, ate' gula'guísië' dumí na' que quégaca nupa ni' bi ta'yadzaj.

⁴⁶ Bulu'dübë' tsözxön chila yudo' yugu' dza, ate' gulahuë' le rusá' ladxí'ru' ca gútië' Xanru'. Caní gulunë' gapa naca lu yu'u lídxigaquië'. Gulahuë' tsözxön, ate' bulu'dzéjanë', en gulaca idú ladxí'gaquië'.

⁴⁷ Gula'gu'ë Dios yöl-la' ba, ate' yúgu'të bönachi gulún légaquië' bal. Buzanë' Xanru' nupa tu'dubi queë', nupa na' tu'lá tu tu dza.

3

Ruhuóáquië' tu bönni' biti' raca sëë

¹ Tu dza ni' gula'benë' Pedro, en Juan, sōjáquië' tsözxõn lu chila yudo', cate' tu'dubi bönachi tu'lidza Dios ni', le naca idú ridödi xihuõ.

² Ga ni' ta'dödë' zoë' tu bönni' biti' raca sëë dza ni'te ni' náquië' bí'ido'. Yugu' dza röjuá'gaquië' lë' ni', en ta'béquië' lë' ra' yudo' ga nazí'i le Ra' Yu'u Lachi, para inábinë' nu bi unödztasö queë' ladaj nupa ni' ta'yaza lö'a yudo'.

³ Bönni' ni, cate' bilé'enë' Pedro, en Juan, sōjáquië' ta'yázië' lö'a yudo', gúta'yuë' lógaquië' bi ulu'nödztasë' queë'.

⁴ Ní'irö bulu'yúë' Pedro, en Juan lë', ate' Pedro gudxë' lë':

—Buyú netu'.

⁵ Ní'irö bönni' na' buzëda' náguië' légaquië' tu' runë' löza bi ulu'nödztasë' queë'.

⁶ Pedro gudxë' lë':

—Biti' dë dumí plata, dumí oro quia', pero le dësö quia' gunna' quiu'. Ni'a que yöl-la' huáca que Lë' Jesucristo, bönni' Nazaret, guyasa, en guzë'e.

⁷ Ní'irö gudélë'ë Pedro në'ë ibëla bönni' huë' na', en buchisë' lë', ate' la' böácatë ni'ë, en buguitaj bëchaj ni'ë bönni' na'.

⁸ Ní'irö guzuínë' bönni' na', ate' guxítí'ë, en guzë'ë. Guyázalenë' tsözxõn Pedro, en Juan, lö'a yudo', rizë'e ni'ë, en rixítí'ë, en rigü'ë Dios yöl-la' ba.

⁹ Yúgu'të bönachi nacuá' ni' ta'lé'e lë' rizë'e ni'ë, en rigü'ë Dios yöl-la' ba.

¹⁰ Caní guca, guládxinë', en bulu'báxinë ca naca lë na' guca, tu' bulu'únbë'ë lë', náquië' bönni' na' ribö'ë ra' yudo' ga nazí'i le Ra' Yu'u Lachi, rinabë' nu bi unödztasö queë'.

Didza' bë'ë Pedro chila yudo'

¹¹ Tsanni ni' bönni' na' biti' guca së'ë, ate' böáquië', zönë' ná'agaquië' Pedro, en Juan, bulu'dubi yúgu'të bönachi ga na' nacu'ë chila yudo' nazí'i le: Chila Queë' Salomón, ate' gula'ná' badxë'.

¹² Cate' bilé'enë' Pedro lë ni, gudxë' bönachi na':

—Libi'ili', bönni' Israel, ¿bizx que rubánili' ca naca lë ni? ¿Bizx que ruyuli' netu', en réquitseli' nétu'sö buntu'-në' bönni' ni, en bentu' ga rizë'e ni'ë len yöl-la' huáca queéztu', o ni'a que le reaj ládxi'tu'-në' Dios?

¹³ Naca lë ni le benë' Dios. Náquië' Dios quégaquië' xuz gudödi queëru' Abraham, en Isaac, en Jacob. Lë cazë' béntërë' bal Jesús, Zxí'inë'. Jesús ni, libí'i cázali' bëtili'-në' lu ná'agaquië' bönni' ta'nná bé'enë' libí'ili'. Cate' gú'unnë' Pilato usanë' Jesús, gudá'baga'li'-në'.

¹⁴ Buzóali' tsölá'alö Bönni' Tsahui', en Lá'ayi, ate' gunábili'-në' Pilato usanë' queëli' tu bönni' rútië' bönachi.

¹⁵ Caní guca, bëtili'-në' Bönni' runna cazë' yöl-la' na'bán idú queëru'. Ní'irö Dios busubanë' Lë' lu yöl-la' guti, ate' ca naca lë ni runtu' ba nalí que.

¹⁶ Tu' guyéajlë'ë bönni' ni Jesús, böáca ni'ë. Rilé'eli'-në', en núnbë'ëli'-në'. Tu' réajlë'ë Jesús, Lë' bunë' dxí'ado' bönni' ni, ate' rilé'eli' yúgu'tëli' le nácatë na'.

17 'Na'a, böcha'a, nözda' benli' caní, bëtili'-në Jesús tu' cabí guyéajni'ili', en bití' gula'yéajni'inë bönni' ta'nná bé'enë' libí'ili'.

18 Caní busudxinë' Dios didza' na' bë'ë zí'alö, le gula'nnë' bönni' gulu'ë didza' uláz queë' ca ral-la' qui'i sáquë'ë Cristo.

19 Que læ ni na', buli'bí'i ládxi'li', en buli'huöáca queë' Dios, para ugüë' dul-la' nabága'li', en gunë' ga huöáca ládxi'li'.

20 Ní'irö isöl-lë'ë leyúbölö Jesús, Bönni' na' buzöë' dza ni'te para gáquië' Cristo, Bönni' Rö queë', Bönni' na' inná bé'enë' libí'ili'.

21 Na'a, run bayudxi ugá'anë' yehua' yubá ni' cate' idxinrö dza uduhuénë' tsahui' yúgu'të le raca, en gaca ca na' chigunná cazë' Dios, læ na' gula'nnë' bönni' gulu'ë didza' uláz queë', bönni' ni' gula'cu'ë dza ni'te.

22 Lësca' caní Moisés gudxë' xuz xtó'oru', gunné': "Xanru' Dios isöl-lë'ë queëli' tu bönni' galjë' ládjagaca di'a dza queëli'. Gáquië' bönni' gu'ë didza' uláz queë' Dios. Isöl-lë'ë Lë' queëli' ca na' gusöl-lë'ë neda'. Run bayudxi uzë nágali'-në' ca naca yúgu'të le guíë' libí'ili'.

23 Yúgu'të nupa bití' ulu'zë nágagaca bönni' ni' gu'ë didza' uláz queë' Dios ila'niti, en ulu'lá'alen bönachi queë' Dios."

24 'Ca naca dza ni zóaru' na'a, gula'guíxjö'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ni'.

25 Libí'ili' nácali' zxi'ini xi'sóagaquië' bönni' gulu'ë didza' uláz queë' Dios, ate' nequi queëli' didza' rucá'ana tsahui', le bënlenë' Dios xuz xtó'oru', cate' ni' gudxë' Abraham: "Ni'a que le gunë' zxi'ini xi'sú'

ilaca bica' ba yúgu'të bönachi yödzülió."

²⁶ Cate' Dios busubanë' Zxi'inë' lu yöl-la' guti, gusöl-lë'ë Lë' zí'alö queéli' para gunë' ga gácali' bica' ba, en ucá'anali' le cabí naca dxi'a runli'.

4

Ta'dxinë' Pedro, en Juan lógaquië' bönni' yudo' tu'chi'a tu'söröë'

¹ Tsanni ni' bönachi na' tu'ilenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë' tsárido'os ga na' nacu'ë.

² Gula'lenë' bönni' ni tu' tu'sédinë' Pedro, en Juan, bönachi, en të' léguequi ulu'bán nupa chinátigaca tu' bubanë' Jesús.

³ Ní'irö gula'zönë' Pedro, en Juan, ate' gula'gu'ë légaquië' lidxi guíë ga idxinrö dza yúbölö tu' chiridzö' dza na'.

⁴ Zían nupa ni' bila'yöni didza' gulu'ë Pedro, en Juan, gula'yéajlë' Cristo. Na'a, yugu' bönni' biguiú'sö ta'yéajlë'ë Cristo ná'cagaquië' idú chi-un gáyu'ë.

⁵ Dza buropi ni', yugu' bönni' unná bë', en bönni' gula tu'zéajni'inë' bönachi judío, en yugu' bönni' yudo' usëdi, bulu'dubë' lu yödzü Jerusalén.

⁶ Lësca' Anás, bixúz lo, en Caifás, en Juan, en Alejandro, enca' yúgu'të bönni' di'a dza quégaquië' bixúz lo bulu'dubë' ni'.

⁷ Ní'irö duché'gaquië' Pedro, en Juan, ate' bulu'sudxinë' légaquië' gatsaj láchui'lö ga na' nacu'ë, en gula'nábinë' légaquië', ta'nnë':

—¿Bizxi yöl-la' unná bë' dë lu ná'ali' runli' lë ni?
¿Nuzxi budödi lu ná'ali' yöl-la' unná bë' ni?

⁸ Ní'irö Pedro gudxë' légaquië', zóalenë' Dios Bö Lá'ayi lë', rnnë':

—Libí'ili', núlöli' rinná bé'eli' netu', bönachi Israel, en libí'ili', bönni' gula.

⁹ Na'a, ¿rinábitseli' netu' ca naca dxin dxi'a bentu' queë' bönni' huë' ni, en nacxi guca, böáquië' bönni' ni?

¹⁰ Riguíxjöi'itu' libí'ili' para ila'nözi yúgu'të bönachi Israel. Zoë' bönni' ni loli', nuhuóáquië' tu' ben dxin yöl-la' huáca queë' Jesucristo, bönni' Nazaret, Bönni' ni' budá'ali'-në' lë'e yaga cruz, pero Dios busubanë' Lë' lu yöl-la' guti.

¹¹ Dios bë'ë didza' ca naca queë' Jesús ni, cate' ni gunné': "Libí'ili', bönni' rucuá'ali' zö'ö, gurú'unali' guiöj na', pero gurö caza' neda' guiöj na' para gaca guiöjlen zö'ö."

¹² Cúnturö nu zoa nu gaca usölä bönachi, tu' cabí zoa yödzölió ni ia'tué' bönni' nuzóë' Dios, nu gaca usölä rë'u.

¹³ Cate' bila'lé'enë' nácagaquië' rugu ladxi' Pedro, en Juan, en guléquiibe'enë' bití' nazédagaquië' que yudo', en nácagaquië' bönni' cá'asö, bulu'bánninë', ate' yöjnéguequinë' Pedro, en Juan na', gula'cuá'lenë' Jesús.

¹⁴ Lësca' bila'lé'enë' bönni' na' böáquië', zuínë' lógaquië', ate' bití' guca bi ila'nnë' quégaquië'.

¹⁵ Ní'irö gula'nná bé'enë' nupa ulu'béaj légaquië' lö'alö yu'u ga na' nudúbigaquië', ate' gulún xtidzë'ë la' légacasë'.

¹⁶ Gula'nnë':

—¿Nacxi gúntsaru' quégaquië' bönni' ni? Le nácate gulunë' tu le run ga tu'bani bönachi, ate' nözigaca

yúgu'të bönachi nacuá' Jerusalén lë ni. Biti' gaca tá'baga'ru' le.

¹⁷ Na'a, para cabí sërö didza', en ila'yöni ziánrö ca' bönachi, uzeru' bach légaquië' para cabí iluí'ilenrë' bönachi didza' ca naca queë' Jesús na'.

¹⁸ Ní'irö bulu'lidzë' Pedro, en Juan, ate' bulu'zenë' bach légaquië' para cabí iluí'ilenrë' bönachi didza', en para cabí ulu'sédinë' légaquië' ca naca queë' Jesús.

¹⁹ Ní'irö bulu'bi'ë didza' Pedro, en Juan. Gulë' légaquië':

—Buli'chi'a buli'sörö libí'ili' channö naca tsahui' lahuë' Dios uzërö nágatu' xtídza'li' libí'ili' ca xtídzë'ë Dios.

²⁰ ¡Biti' gaca soa dxitu'! ¡Run bayudxi gü'itu' didza' que le bilé'etu', en le biyönitu'!

²¹ Ní'irö yugu' bönni' yudo' tu'chi'a tu'söröë' bulu'zenë' bach légaquië', pero bulu'sanë' légaquië' tu' cabí gula'dzölinë' nacxi ilunë' légaquië' xíguia'. Caní gulunë' tu' guládxinë' le ilún bönachi lu yödzo ni', tu' ta'gú'u Dios yöl-la' ba ni'a que lë na' guca.

²² Bönni' na' böáquië', en guca queë' lë na' run ga rubániru', chiyú'urë' ca choá' iz.

Ta'nábinë' Dios gunë' ga ilácagaquië' rugu ladxi'

²³ Cate' bönni' yudo' bulu'sanë' Pedro, en Juan, böajgaquië' ga na' nacu'ë luzá'agaquië', ate' bulu'siyönnë' légaquië' yúgu'të lë na' gula'nnë' yugu' bixúz unná bë', en bönni' gula tu'zéajni'inë' bönachi judío.

²⁴ Cate' bila'yönnë' lë ni, bulu'lidzë' Dios tsözxön, gula'nnë':

—Xantu' Dios, ¡zxoñtë'rö nacu' Li'! ¡Li' nacu' Dios!
 ¡Benu' lúxhiba! ¡Benu' luyú! ¡Benu' nísado'! ¡Benu'
 yúgu'të le nacuá' tu tu lataj na'!

²⁵ Uláz quiu' Li' bë'ë didza' David, bönni' huen
 dxin quiu', ni' zóalenë' Dios Bö' Lá'ayi lë', gunné':
 ¿Bizx que tun dzatsa bönachi,
 en ta'zá' ládxi'gaca le ruá' dö'?

²⁶ Yugu' bönni' ta'nná bë'ë yödzölió ni gulún
 dzatsë',
 ate' guláquië' tuz bönni' unná bë'.
 Gula'dá'báguë'ë Xanru' Dios,
 enca' Cristo, bönni' gurö cazë' Lë'.

²⁷ 'Le nácatë guláquië' tuz Herodes, en Poncio
 Pilato, en yugu' bönni' izá'a, en yugu' bönni' Israel
 lu yödzö ni. Gula'dá'báguë'ë Jesús, Zxí'inu' lá'ayi,
 Bönni' na' buzú' queétu'.

²⁸ Gulunë' yúgu'të le bucözu' zí'atëlö, en guzxí' lu
 no'o, ate' guca ca na' benu' tsutsu xtídz'u ca ral-la'
 gaca.

²⁹ Na'a, Xantu', buyú le tu'zenë' bach netu', en
 ben ga gácatu' rugu ladxi', para gü'itu' xtídz'u,
 netu' bönni' huen dxin quiu'.

³⁰ Ben ga gaca úngacatu' nupa te'e, tu' sóalen yöl-
 la' huáca quiu' netu', en ben ga gaca gúngacatu'
 le ilún ga ubánitu', en le ilaca bë'. Gaca caní tu'
 zóalenë' Jesús, Zxí'inu' lá'ayi, netu'. ¡Ca' gaca!

³¹ Cate' budxi bulu'lidzë' Dios, guxzizi lataj ga
 na' nacu'ë, ate' Dios Bö' Lá'ayi guzóalenë' yúgu'të',
 ate' len yöl-la' rugu ladxi' quégaquië' gulu'ë xtídzë'ë
 Dios.

Tu'únë' tuz le dë quégaquië'

³² Bönachi zían na' ta'yéajlë' Cristo, tuz ca ta'zá' ládxi'guequi, en tuz ca gulúngaca. Biti' gunné' nu bönni' nütse'ë ládjagaquië' nequi queéze' le dë queë', pero bulu'únë' tuz le dë quégaquië'.

³³ Len yöl-la' huáca zxon gula'guíxjö'ë gubáz na' nasöl-lë'ë Xanru' Jesús ca bubanë' Lë', ate' le buzá' ládxe'ë Dios quégaquië' gúcalen yúgu'të'.

³⁴ Cuntu nu bi biyadzaj nu nutsa' ládjagaquië'. Caní guca tu' yúgu'të bönni' zoa bi dë quégaquië', xiyúgaquië', o lídxigaquië', gulúti'ë le, ate' dumí que na' yöjuá'gaquië',

³⁵ en bulu'dödë' le lu ná'agaquië' gubáz na' nasöl-lë'ë Cristo, ate' légaquië' gula'guísië' le que queégaca nupa bi biyadzaj quéguequi.

³⁶ Zoë' José ni', bönni' bulu'zóë' gubáz na' nasöl-lë'ë Cristo ia'tú'lë' Bernabé, le rna lu didza' xidza', Bönni' Ruhue' Tsáhuë'ë. Nabábalenë' zxi'ini xi'sóë' Leví, en guljë' luyú Chipre.

³⁷ Bëti'ë bönni' ni tu cö' xiyúë', ate' yöju'ë dumí que na', en budödë' le lu ná'agaquië' gubáz na' nasöl-lë'ë Cristo.

5

Dul-la' gulunë' Ananías, en Safira

¹ Tu bönni' yúbölö lë' Ananías, bëti'ë tu cö' xiyúë'. Safira, nigula queë', bennu tsözxön lë'.

² Ananías na' bucachi' lanë' late' dumí que yu na', ate' nõzinu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasöl-lë'ë Cristo. Rnnë':

—Tsa nisö guzxi'a.

³ Pedro gudxe' lë':

—Ananías, ¿naru' guyázatsö Satanás tu' xihui' lu icja ládxi'do'o, en ben ga rizí' yé'enu' Dios Bö' Lá'ayi, ate' bucachi' lanu' late' dumí que xiyú' na'?

⁴ Tsanni ni' nagá'ana yu na' lu no'o, ¿naru' cabí nequi quez quiu'? Gudödi bëti'u le, ¿naru' cabí dë caz lu no'o dumí que na'? ¿Bizx que gurö'ö icju' gunu' caní? Dios caz guzxi' yé'enu', calëgasö bönachi.

⁵⁻⁶ Cate' biyönnë' Ananías didza' ni, gudzö'ë, en gütitë'. Ní'irö gula'bíga'tëbi' bi'i ra'bán, ate' bulu'chölibi' lë' lari', en guluá'abi' lë', en yöjcáchi'gacabi' lë'. Guladxi gula'dzöbi yúgu'të nupa ni' bila'yöni ca guca lë ni.

⁷ Ca tsonna hora gudödi ni', bidxinnu nigula queë' Ananías na' ni', en biti' nözinu lë na' guca queë' bönni' queënu.

⁸ Ní'irö Pedro gudxë'-nu:

—Gudíxjöi'i neda'. ¿Naru' guzxi'ili' tsca nisö xiyuli' na'?

Gunnánu:

—Ön, tsca nisö guzxi'itu'.

⁹ Ní'irö Pedro gudxë'-nu:

—¿Bizx que ben tuz xtídza'li' guzxi' bë' xihui'li' Dios Bö' Lá'ayi? Buyútsöca'. Chizóa ulu'dxinbi' yugu' bi'i bulu'cáchi'bi'-në' bönni' quiu', ate' ulu'béajbi' ca' li'.

¹⁰ Ní'irö la' gudzö'tënu xini'ë Pedro, en gütitënu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjcáchi'gacabi'-nu cuita lë'ë bönni' queënu.

¹¹ Que lë ni na' guladxi gula'dzöbi yúgu'të bönachi queë' Dios, ate' guladxi ca' yúgu'të nupa bila'yöni ca guca lë ni.

Tunë' bönni' gubáz nasöl-lë'ë Cristo le taca bë'

12 Gulunë' bönni' gubáz na' nasöl-lë'ë Cristo zían le taca bë', en zían yöl-la' huáca zxon lógaca bönachi lu yödzö. Yúgu'të' bulu'dubë' tsözxön ga naca chila yudo' nazí'i le Chila Queë' Salomón.

13 Ladaj nupa ni' biti' ta'yéajlë' Cristo, cuntu nu burugui tsöjtá' légaquië', ate' bönachi lu yödzö ni' gulún légaquië' bal.

14 Ní'irö ia'bal-la bönachi zían ca' gula'yéajlë' Cristo, bönni', en nigula.

15 Cate' bila'lé'e bönachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza, ate' gula'xóë' léguequi lu da'a yaga, en ia'bal-la lu dá'asö, para cate' tödë' ni' Pedro, tsa zxúl-lasö queë' cu'u zxul-la bal-la bönachi huë' na', para ulu'huöáca.

16 Lësca' bila'rúaj bönachi yugu' dzaga yödzö, en bila'dxín Jerusalén, nuá'agaca nupa te'e, en nupa ta'guí'i ta'zaca' tu' yú'ugaca bö' xihui' léguequi, ate' bulu'huöáca yúgu'tëguequi.

Bönni' yudo' ta'bía ládxi'gaquië' bönni' gubáz nasöl-lë'ë Cristo

17 Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro.

18 Ní'irö bixúz lo na', en bönni' na' dá'gaquië' lë' gula'zönë' gubáz na' nasöl-lë'ë Cristo, ate' gula'gu'ë' légaquië' lidxi guíë.

19 Ní'irö bidxinë' gubáz lá'ayi queë' Xanru' chi'i dzö'ölö, ate' gusaljë' lidxi guíë na', en bubéajë' légaquië'.

20 Gubáz lá'ayi na' gudxë' légaquië', rnnë':

—Guli'tséaj, guli'tsöjsóa chila yudo', en guli'tsöjë'len bönachi ni' didza', quíxjöi'ili' légaquië' ca naca yöl-la' na'bán idú ni, en ca gaca ila'déli'në' le.

²¹ Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' rení' zílado', en bulu'sédinë' bönachi.

La' ní'isö bulu'dübë' bixúz lo, en nupa nacuá'len lë' tsözxön, len bönni' yudo' tu'chi'a tu'söröë', en bönni' gula tu'zëajni'inë' bönachi Israel, ate' gula'söl-lë'ë nupa tsöjaca lidxi guié para tsöjxi'gaquië' yugu' gubáz na' nasöl-lë'ë Cristo, tu' téquinë' ni' nacu'ë lidxi guié na'.

²² Cate' ni'a ná'agaquië' bönni' yudo' na' bila'dxinë' ni', biti' yöjxáca'gaquië' légaquië' lu yu'u lidxi guié na', ate' ní'irö bulu'huöajë' tsöjtíxjö'gaquië' ca'.

²³ Gulë' bönni' yudo' tu'chi'a tu'söröë' na', ta'nnë':

—Le nácatë yöjxáca'tu' nayáyajtë lidxi guié, ate' nacuá' nupa tun chi'i ra' lidxi guié na', pero cate' gusalajtu', cuntú nu yöjxáca'tu' lu yu'u na'.

²⁴ Cate' bixúz lo, en yugu' bixúz unná bë', en bönni' nacuá' lu në'ë ni'a ná'agaca bönachi yudo', bila'yönnë' didza' ni, gula'bö'dë'ë böniga tu' cabí nöziguequinë' bizxi guntë lë na' raca.

²⁵ Ní'irö bidxinë' tu bönni' ni', en gudíxjöi'inë' légaquië', rnnë':

—Buli'yútsöca'. Yugu' bönni' na' gulú'ugacali'-në' lidxi guié nacu'ë chila yudo' tu'sédinë' bönachi.

²⁶ Ní'irö guyijë' bönni' na' rinná bé'enë' ni'a ná'agaca bönachi yudo', dzágagaquië' lë' ni'a ná'agaquië' na', ate' gula'ché'ë yugu' gubáz na' nasöl-lë'ë Cristo, pero biti' bi gulunë' quégaquië',

tu' guládxinë' ulu'ladxi' bönachi nacuá' ni' légaquië' guiõj.

27 Cate' chinachë'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

28 —¿Naru' cabí gúdxida'atu' libí'ili' biti' usédili' bönachi ca naca queë' bönni' na'? Na'a, chigudísili' xibá ni idútë yödzo Jerusalén, en ré'ënili' usubága'li' netu' xíguia' tu' nözi yöl-la' guti queë' bönni' na'.

29 Ní'irö bulu'bi'ë didza' Pedro, en ia'zícá'rë gubáz na' nasöl-lë'ë Cristo, ta'nnë':

—Run bayudxi uzërö nágatu' xtídzë'ë Dios ca xtídzá'gaca bönachi.

30 Libí'ili' bëtili'-në' Jesús cate' ni' budá'ali'-në' lë'e yaga cruz, pero Dios quégaquië' xuz xtó'oru' busubanë' Lë'.

31 Jesús ni, Dios buzóa cazë' Lë' ga nayëpisëtërë' cuita lë'ë ibëla, para gáquië' Bönni' Lo, en Bönni' Rusölá, en gunë' ga ulu'bí'i ládxi'gaca bönachi Israel, para gaca uniti lahuë' dul-la' nabága'gaquië'.

32 Ca naca lë ni, runtu' netu' ba nalí que, ate' lësca' runë' Dios Bö' Lá'ayi ba nalí que, Bö' na' risöl-lë'ë Dios quégaca nupa tun ca rnna xtídzë'ë.

33 Cate' bila'yönnë' bönni' yudo' tu'chi'a tu'söröë' na' lë ni, gula'lenë', en gulë'ënnë' ilútië' légaquië'.

34 Ní'irö guzuínë' tu bönni' yudo' ruchi'a rusöröë' lógaquië', lë' Gamaliel, tu bönni' yudo' fariseo. Rácadë'ë bönni' ni xibá queë' Moisés, ate' yúgu'të bönachi tun lë' bal. Gudxë' nupa na' ulu'béaj yugu' gubáz na' nasöl-lë'ë Cristo lö'alö tu chí'ido'.

³⁵ Ní'irö gudxë' bönni' yudo' tu'chi'a tu'söröë' na',
gunné':

—Libi'ili', bönni' Israel, buli'yutëz queëli' ca naca
le ré'ënili' gunli' quégaquië' bönni' ni.

³⁶ Ral-la' tsöjnéli' ca guca zí'atëlö cate' si' idxín
dza ni zóaru' na'a. Birúajë' Teudas, ate' ben
cuinë' ca tu bönni' nayëpisëtërë'. Guláquië' bönni'
yöjtá'gaquië' lë' idú tapa gáyu'ë bönni'. Yugu' bönni'
rójáquië' gudil-la gulútië' lë', ate' gulásilasi yúgu'të
nupa ni' yöjtá'gaca lë', ate' gunítisö ca' yúgu'të le
benë' bönni' na'.

³⁷ Gudödi guca lë ni, birúajë' ca' Judas, tu
bönni' Galilea. Benë' caní cate' ni' gula'yú'u lu
guichi bönachi ta'guíxaj lázagaquië', ate' yöjtá'gaca
bönachi zían lë'. Lësca' gulútië' bönni' ni, ate'
gulásilasi yúgu'të nupa ni' yöjtá'gaca lë'.

³⁸ Que lë ni na' rea' libi'ili': Guli'sán-gaquië' bönni'
ni, en biti' bi gunli' quégaquië'. Channö naca
quégacasö bönachi lë ni ta'nnë' o lë ni tunë', initi
caz,

³⁹ pero channö naca queë' Dios, biti' gaca
usunítili' le. ¡Buli'yú cuinli' cabí tíl-lalenli'-në' Dios!

⁴⁰ Ní'irö gulunë' tuz didza' len lë'. Bulu'lidzë'
yugu' gubáz na' nasöl-lë'ë Cristo, ate' gula'guinë'
légaquië', en bulu'zenë' légaquië' bach para cabirö
ilu'ilenë' bönachi didza' ca naca queë' Jesús. Ní'irö
bulu'sanë' légaquië'.

⁴¹ Bila'rúajë' gubáz na' nasöl-lë'ë Cristo lógaquië'
bönni' yudo' tu'chi'a tu'söröë' na'. Tu'dzëjanë' tu'
bë'ë Dios légaquië' lataj gula'gu'i gula'záquë'ë tu'
dá'gaquië' Jesús.

⁴² Yugu' dza bulu'séditiqui'sinë' bönachi, en gu-
lunë' libán queë' Jesucristo lu chila yudo', en gapa

naca lu yu'u lídxigaca bönachi.

6

Ta'böë' gadxi bönni' para ilácalenë' bönachi queë' Cristo

¹ Dza ni', tu' gula'yán bönachi ta'yéajlë' Cristo, yugu' bönni' judío tu'ë didza' griego gula'nnë' quégaquië' bönni' judío tu'ë didza' hebreo tu' nözi le raca cate' ta'guisië' le ilágunu nigula uzëbi, tu' cuntu nu ruí'i le ilágunu nigula uzëbi quégaquië' bönni' ni' tu'ë didza' griego.

² Ní'irö idxínnutë' bönni' gubáz na' nasöl-lëë Cristo bulu'tubë' yúgu'të bönachi ni' ta'yéajlë' Cristo, ate' tē' légaquië':

—Biti' naca dxi'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágugaca bönachi.

³ Que lë ni na', böchi' luzá'atu', guli'cö gadxë' bönni' ladjali', para ugú'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'të bönachi légaquië' bal, en nácagaquië' bönni' ta'yéajni'i, en naca bë' Dios Bö' Lá'ayi zóalenë' légaquië'.

⁴ Netu' ni ulídzatica'stu'-në' Dios, en uséditu' bönachi xtídzë'ë Dios.

⁵ Yúgu'të' gula'yaza ládxi'gaquië' didza' ni, ate' gula'böë' Esteban, tu bönni' réajlë'ë Cristo idú ládxe'ë, en zóalenë' Dios Bö' Lá'ayi lë'. Lësca' gula'böë' Felipe, en Prócoro, en Nicanor, en Timón, en Parmenas, en Nicolás, bönni' yödzo Antioquía, bönni' zí'alö butsé'ë ca runë' para tseaj ládxe'ë Dios ca tunë' yugu' bönni' judío.

6 Ní'irö bulu'sudxinë' bönni' na' gula'böë' lógaquië' gubáz na' nasöl-lë'ë Cristo. Yugu' bönni' gubáz na' gula'xóa ná'agaquië' légaquië', ni' tu'lidzë' Dios.

7 Guzërö xtídzë'ë Xanru', ate' gula'yanda' bönachi ta'yéajlë' Cristo nacuá' Jerusalén. Lësca' zían bixúz judío gula'zí' lu ná'agaquië' le réajlë'ëru' Cristo.

Ta'zönë' Esteban

8 Esteban na' benë' le tun ga rubániru', en yugu' le taca bë' lógaca bönachi lu yödzö, zóalen yöl-la' huáca queë' Dios lë' le buzá' ládxë'ë queë'.

9 Ní'irö gula'yasë' bal-lë' bönni' nabábagaquië' yu'u ga tu'dubë' bönni' judío, en tu'sëdë' queë' Dios, nazí'i le Yu'u Quégaquië' Bönni' Nadzángaquië'. Bönni' narúajgaquië' yödzö Cirene, en yödzö Alejandro, en luyú Cilicia, en luyú Asia, gulunë' légaquië' tsözxön. Bönni' ni gula'díl-lalenë' Esteban didza'.

10 Biti' guca tá'baga'gaquië' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bö' Lá'ayi lë'.

11 Ní'irö gula'guíxjë' bönni' ila'zí' yë'ë, ila'nnë': "Netu' biyönitu' didza' ru'ë Esteban ni, rnnë' zì'ë queë' Moisés, en queë' Dios."

12 Caní guca, bönni' ni gula'gu'ë xilá ládxí'gaca bönachi, tsözxön len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zönë' lë', en gula'chë'ë lë' lógaquië' bönni' yudo' tu'chi'a tu'söröë'.

13 Lësca' bulu'cu'ë lógaquië' nupa gula'guíxjö' le cabí nácatë, bönni' na' gula'nnë':

—Biti' zoë' dxisö bönni' ni rnnë' zì'ë que yudo' lá'ayi ni, en que xibá queë' Dios.

14 Biyõnitu' didza' bëë bönni' ni ca gunë' Jesús, bönni' Nazaret, rnnë' usunítie' yudo' ni, en utsëë yugu' le nalëbiru' runru', yugu' lë na' gunná bé'enë' Moisés rë'u.

15 Ní'irö bönni' yudo' tu'chi'a tu'söröë', en yúgu'të nupa rõ'gaca ni' bulu'yúë' Esteban, ate' bila'lé'enë' lahuë', rna' ca rna' lahuë' tu gubáz lá'ayi queë' Dios.

7

Didza' bëë Esteban, le gunnë' uláz queë'

1 Ní'irö bixúz lo gunábinë' Esteban na', rnnë':

—¿Naru' nácatë caní?

2 Bubi'ë didza' Esteban, rnnë':

—Libi'ili', bönni' gula, en libi'ili', böcha'a. Buli'zë nágali' le guía' libi'ili'. Dios, Bönni' nayëpisëtërë', bulu'í lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsóë' yödzö Harán.

3 Dios gudxë' lë': “Birúaj ladzu', en bulá'alén di'a dza quiu', ate' guyéaj luyú ni' ulu'ida' lí'.”

4 Ní'irö birúajë' Abraham luyú Mesopotamia le naca xiyúgaca bönachi Caldea, ate' yöjsóë' yödzö Harán. Lu yödzö ni' gútië' xuzë' Abraham na', ate' lë' buzë'ë ni', ate' Dios guchë'ë lë' luyú ga ni zóaru' na'a.

5 Dios biti' bëë lë' lataj guequi queë' luyú ni. Calëga láti'sö bunödzejë' queë' ga soë' luyú ni, pero guzxí' lu nëë Dios unödzejë' queë' luyú ni, ate' tódi gátië' Abraham guequi luyú ni quegaca xzí'ini xi'sóë', sal-la' biti' nacuí'inibi' bi'i queë'.

6 Lësca' caní Dios gudxë' Abraham: “Tsöjáquië' xzí'ini xi'sú' lu xiyúgaca bönachi izá'a, ate' ni'

ilácagaquië' ca bönachi zi'tu'. Ilunë' bönni' luyú ni' ga ilácagaquië' xzí'ini xi'sú' bönni' nadó'ogaquië'. Ulu'saca' zi'ë légaquië' idú ca tapa gayuá' iz."

⁷ Lësca' Dios gudxë' lë': "Neda' uzötja' bönachi luyú ni', ga ni' ilácagaquië' xzí'ini xi'sú' bönni' nadó'ogaquië', ate' tödi ni' ulu'rúajë' ni', ate' ilunë' xichina' luyú ni."

⁸ Dios bénlenë' Abraham tu didza' rucá'ana tsahui', en gunná bé'enë' lë' ichúguië' lu xipéla'gaquië' bönni' biguiú' nacu'ë lidxë' tu le gaca bë' nazi' lu ná'agaquië' didza' na' rucá'ana tsahui'. Gudödi ni' gúquië' Abraham xúzibi' bi'i Isaac, en cate' chigúquibi' xunu' gubidza, guchúguië' lu xipéla'bi' lë' na' naca bë'. Isaac na', lësca' caní benë' queébi' bi'i Jacob, xzí'inë', en caní benë' ca' Jacob quégaca idxínnutëbi' bi'i bönni' queë', nupa ni' gulaca xuz xtó'ogaca idxinnu cö' bönachi Israel.

⁹ 'Yugu' xuz xtó'oru' na', lu yöl-la' ruzxë'e quégaquië', gulúti'ë-bi' bi'i José, böchi'gaquië', lu ná'agaquië' bönni' ni' gulúti'gaquië'-bi' luyú Egipto. Dios guzóalenë'-bi' bi'i José na'

¹⁰ en busölë'-bi' lu le gulaca queébi'. Dios bë'ë-bi' yöl-la' réajni'i, le ben ga guyaza ládxë'ë-bi' Faraón, bönni' rinná bé'enë' bönachi Egipto, ate' Faraón na' budödë' lu ná'abi' bi'i José yöl-la' unná bë' para gunná bé'ebi' bönachi luyú Egipto, en yúgu'të bönachi nacuá' lidxë' Faraón na'.

¹¹ 'Ní'irö gúcada' gubín idú luyú Egipto, en luyú Canaán ni, ate' gula'gu'i gula'zaca' yúgu'të bönachi dza ni'. Biti' bidzöli le ilahuë' xuz xtó'oru'.

¹² Cate' biyönnë' Jacob dë xzoa' xtila luyú Egipto, gusöl-lë'ë yugu' xzí'inë', bönni' ni' nácagaquië' xuz

xtó'oru', luyú ni'. Caní guca le zí'alò luzuí yöjáquië ni'.

¹³ Cate' le buropi luzuí yöjáquië' luyú Egipto, benë' José ga bulu'únbë'ë böchë'ë lë'. Caní guca, gunözinë' Faraón nupa nácagaca di'a dza queë' José.

¹⁴ Ní'irö gusöl-lë'ë José didza', en benë' ga bidxinë' Jacob, xuzë', luyú Egipto, ate' dzágagaca di'a dza queë' lë'. Gulaca idú tsónnalalaj yu' chinu bönachi.

¹⁵ Caní guca, bidxinë' Jacob luyú Egipto, ga ni' gútië' lë', ate' gulátië' ca' xuz xtó'oru' luyú ni' cate' bizá'a dza que queëgaquië'.

¹⁶ Cate' gulátië' tu tu xuz xtó'oru', zxi'ini xi'sóagaquië' yöjuá'agaquië' légaquië' luyú Siquem, ate' ni' bulu'cáché'ë légaquië' yeru ba lu zxan bulóaj na' gú'uë' Abraham lu ná'agaca zxi'inë' Hemor, bönni' Siquem na'.

¹⁷ 'Gudödi zían iz, cate' bidxín dza ral-la' gaca le guzxi' lu në'ë Dios, lë na' benë' tsutsu xtídzë'ë gunë' queë' Abraham, gula'yán bönachi yugu' cö' Israel, ate' gulaca bönachi zían cate' ni' gula'cuá' luyú Egipto.

¹⁸ Ní'irö guyázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' bönachi Egipto.

¹⁹ Bönni' unná bë' na' bi'ë dö' quégaca bönachi uládz queëru'. Busaca' zi'ë yugu' xuz xtó'oru' na', en benë' ga bulu'sanë'-bi' bi'i bönni' huë'ënido' que queëgaquië', para ilátibi'.

²⁰ La' dza ní'isö gúljabí' ca' bí'ido' Moisés, ate' Dios guyaza ládxë'ë-bi'. Xuz xiná'abi' bulu'sculë'-bi' lídxigaquië' idú ca tsonna beo'.

21 Cate' bidxín dza ulu'sanë'-bi' xuz xiná'abi' para gátibi' bí'ido' Moisés na', bidxinnu nigula zxi'inë' Faraón ga ni' bulu'cá'anë'-bi', ate' yöjzxi'inu-bi', en buscúlunu-bi' ca bi'i que cázanu.

22 Caní guca, bizédabi' bi'i Moisés yúgu'të le táquië' bönni' Egipto, en gúcatëro'bi' zxon ca naca didza' bë'ëbi', en ca nácagaca le benbi'.

23 'Cate' Moisés na' chiyú'ubi' choá' iz, gunná ládxi'bi' tsöjyubi' bönachi uládz queëbi', bönachi Israel.

24 Cate' bidxinbi' ga na' nacu'ë, bilé'ebi'-në' tu bönni' Egipto, rusaca' zi'ë tu bönni' uládz queëbi'. Ní'irö gúcalenbi'-në' bönni' uládz queëbi' na', en bëtibi'-në' bönni' Egipto na'. Caní guca, buzí labi' bi'i Moisés bönni' na' uláz queë' bönni' uládz queëbi'.

25 Gúquibi' Moisés huala'yéajni'inë' bönni' böchi'bi' gunë' Dios ga usölábi' lë cázabi' légaquië', pero légaquië' biti' gula'yéajni'inë'.

26 Ia'tú dza ca' yöjxáca'bi' ia'chopë' bönni' Israel, ta'dil-lë', ate' gú'unibi' cuéqui dxibi' légaquië', en gúdxibi' légaquië': "Libí'ili', böchi'li' naca. ¿Bizx que ruá'ali' luzá'ali' dö'?"

27 Ní'irö bönni' na' ru'ë dö' que luzé'ë budxíguë'ë-bi' bi'i Moisés, gunné': "¿Núzxitë buzóa li' para inná bé'enu' netu', en uchi'a usöröu' le runtu'?"

28 ¿Naru' rë'ë'nitsenu' gútiu' ca' neda' ca benu' néaje, bëtü'-në' bönni' Egipto na'?"

29 Cate' Moisés biyönibi' didza' ni, buzxúnna'jbi' ni', en yöjsóabi' luyú Madián ga ni' guzóabi' ca tu bönni' zi'tu'. Luyú Madián na' butsaga ná'alenbi'-nu nigula lu yödzö ni', ate' gúl'jagacabi' chópabi' bi'i bönni' queë'.

30 'Cate' chigudödi choá' iz zoë' ni', buluí'i lahuë' tu gubáz lá'ayi queë' Dios ga zoë' lu guí' que yaga yötsi'do' régui, ga ni' naca lu lataj cá'asö, le rö'ö ra' guí'a nazí'i le Sinaí.

31 Cate' Moisés bilé'enë' guí' na', bubáninë', ate' gubígui'ë gala' para ilé'enë' dxi'a, ate' biyönnë' chi'ë Xanru'.

32 Caní gudxë' Xanru' lë': "Neda' naca' Dios quégaquië' xuz xto'o. Naca' Dios queë' Abraham, en Dios queë' Isaac, en Dios queë' Jacob." Ní'irö lu yöl-la' radxi queë', guzxízidë'ë Moisés, en bíti'rö burúguinë' uyúë'.

33 Xanru' gudxë' lë': "Guléaj xirachu' nudó'o, tu' naca lá'ayi ga ni zu' tu' zoa caza' neda', Dios, ni.

34 Le nácatë chibilé'eda' le ta'guí'i ta'zaca' bönachi quia' nacuá' luyú Egipto, en chibiyönda' ta'bödxí yeche'. Bötja', zoa' ni para usölá' légaquië'. Gudá na'a, isöl-la'a li' luyú Egipto."

35 'Sal-la' bönni' uládz queë' Moisés, bulu'cá'anë' lë' cá'asö, gula'nnë': "¿Núxkitë buzóa li' para inná bé'enu' netu', en uchi'a usöröu' le runtu'?" Dios gusöl-lë'ë lë' para gáquië' bönni' unná bë', en bönni' rusölá, ca na' gubáz lá'ayi na' queë' Dios gudxë' Moisés, cate' bulu'í'i lahuë' lu yaga yötsi'do' régui ga na' zoë'.

36 Moisés ni bubéajë' bönni' uládz queëru' luyú Egipto. Guca caní gudödi benë' le gulún ga bulu'bani bönachi ni', en le taca bë' benë' luyú ni'. Lësca' caní benë' lu nísado' nazí'i le Nísado' Xiná. Caní benë' lógaquië' idú ca choá' iz lu lataj cá'asö.

37 Lë cazë' Moisés na' gudxë' bönachi Israel ni', gunné': "Xanru' Dios isöl-lë'ë queéli' tu bönni' galjë' ladaj di'a dza queéli', ate' gáquië' bönni' gu'ë

didza' uláz queë' Dios. Isöl-lë'ë lë' queëli' ca na' gusöl-lë'ë neda'. Lë cazë' run bayudxi uzë nágali'-në'."

³⁸ Lësca' lë cazë' Moisés na' guzóalenë' bönachi nudúbigaca queë' Dios lu lataj cá'asö, ate' gudzáguië' gubáz lá'ayi queë' Dios lë', Nu na' bë'len lë' didza' lu guí'a Sinaí na'. Moisés na' guzóalenë' xuz xtó'oru', ate' Dios budödë' lu në'ë xibá lá'ayi queë', le ruí'i didza' ca gaca ila'deli' bönachi yöl-la' na'bán, ate' budödë' Moisés xibá ni lu ná'agaca xzí'ini xi'sóagaquië' ga ridxintë queëru' rë'u.

³⁹ 'Biti' gulë'ënnë' xuz xtó'oru' ilunë' ca rnna xtídzë'ë Moisés, pero bulu'zöë' lë' tsölá'alö, en gulë'ënnë' tsöjhuöjgaquië' luyú Egipto.

⁴⁰ Cate' ni' zoë' Moisés na' lu guí'a Sinaí na', légaquië' gulë' Aarón, böchë'ë Moisés na', gula'nnë': "Ré'ënitü' gunu' yugu' dios queëtu', tu budó' guië', para tsöjnörugaca lotu'. Biti' nöztu' bi guca queë' Moisés, bönni' na' nubéajë' netu' luyú Egipto."

⁴¹ Ní'irö gulunë' tu budó' oro le naca ca tu bédxido', ate' gulútië'-ba' bö'cu' xzíla'do', en gulú'ugaquië'-ba' lo budó' oro na', ate' gulunë' laní lo budó' na' núngaquië'.

⁴² Que lë ni na' Dios bucá'anë' légaquië', en guléaj ládxe'ë légaquië'. Ní'irö gula'yéaj ládxi'gaquië' yugu' le ta'yëpi lúzxiba. Ca naca lë ni nazúaj lu guichi le gula'nnë' bönni' gulu'ë didza' uláz queë' Dios, le rnna:

Libí'ili', bönachi Israel,

¿naru' gulú'ugacatsali'-ba' quia' neda' böa' bédxi ni' bëtigacali'-ba', en buzégui'gacali'-ba', lë na' benli' lu lataj cá'asö idú ca choá' iz?

⁴³ Biti' gulú'ugacali'-ba' quia' neda',

pero biá'ali' le nequi que Moloc, budó' guiöj queéli'.

Biá'ali' ca' tu le naca ca bölj lúzxiba nazí'i le Refán, lè na' buzóali' ca dios queéli'.

Yugu' budó' guiöj budó' yaga ni,
la' libí'isili' benli' para guyéaj ládxi'li' léguequi.
Que lè ni na', ubéaja' libí'ili' lu xiyuli',
en ichè'a libí'ili' zí'tu'rö ga dè luyú Babilonia.

⁴⁴ Cate' ni' gula'cu'ë xuz xtó'oru' lu lataj cá'asö, guta' quégaquië' yu'u lari' na' ga gulún chi'ë xibá queë' Dios, lè na' naca bë' Dios caz zóalenë' légaquië'. Gulunë' tu yu'u lari' na' ca na' Dios gunná bé'enë' Moisés, cate' ni' gudxë' lë' gunë' le ca naca lè na' bilé'enë', le buluí'inë' Dios lë' lu guí'a ni'.

⁴⁵ Lësca' bulu'dödë' yu'u lari' na' lu ná'agaquië' zxí'inigaquië' ga bidxintë dza ni' gulu'ë xuz xtó'oru' le luyú ni, cate' ni' dzáguië' Josué légaquië', ate' gula'gúë' xiyúgaca bönachi izá'a, nupa ni' bulágui'ë Dios lógaquië' xuz xtó'oru'. Caní gulunë' zían iz ga bidxintë dza zoë' David.

⁴⁶ Dios guyaza ládxe'ë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob.

⁴⁷ Biti' bë'ë Dios lë' lataj, ate' Salomón, zxí'inë' David na' benë' yu'u queë' Dios.

⁴⁸ Caní benë' sal-la' biti' zoë' Dios, Nu nácatërö lo, tu lu yudo' núngaca bönachi. Ca naca lè ni gunné' tu bönni' bë'ë didza' uláz queë' Dios, gunné':

⁴⁹ Yehua' yubá naca ga rö'a rinná bë'a,
ate' yödzölió naca xilibi ni'a.

Rnnë' Xanru': “¿Naru' gúntsali' tu yu'u ga soa?
¿Naru' zóatsö tu lataj ga ral-la' uzí' ládxa'a?

50 ¿Naru' cabí len na'a caza' bena' yúgu'të lë ni?"

51 Ní'irö Esteban na' gudxë' yugu' bönni' yudo' tu'chi'a tu'söröë' na', gunné':

—Libí'ili', bönni' zidi, biti' bi raza icja nágali'. Nazidi icja ládxi'do'oli' ca raza quégaca bönachi biti' núnbë'gaquië' Dios. Ridá'baga'tica'sili'-në' Dios Bö' Lá'ayi. Ca na' gulunë' xuz xtó'oli', runli' ca' libí'ili'.

52 Gula'bía ládxi'gaquië' xuz xtó'oli' na' yúgu'të bönni' ni' gulu'ë didza' uláz queë' Dios. Lësca' gulútië' bönni' ni' gula'guíxjö'ë zí'alö ca ral-la' guidé' Cristo, Bönni' Tsahui', ate' na'a, cate' ni' bidxinë' Bönni' Tsahui' na', libí'i cázali' bétili'-në' lu ná'agaquië' bönni' gulútië' Lë'.

53 Libí'i cázali' dë lu ná'ali' xibá queë' Dios, lë na' gubáz lá'ayi queë' Dios bulu'dödë' lu ná'agaquië' xuz xtó'oli', pero biti' runli' ca rnna.

Tútië' Esteban

54 Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë' Esteban, ate' lu yöl-la' rilé quégaquië' lë' gulagu zxéatica' láyë'ë.

55 Ní'irö buyúë' Esteban na' lúzxibalö, ate' zóalenë' Dios Bö' Lá'ayi lë', bilé'enë' lataj bení ga zoë' Dios, enca' Jesús, zuínë' cuita lë'ë ibëla Dios ga nayëpisëtëre'.

56 Ní'irö gunné':

—Buli'yútsöca'. Rilé'eda' nayalaj lúzxiba, ate' zuínë' Bönni' Guljë' Bönachi cuita lë'ë ibëla Dios.

57 Ní'irö bönni' yudo' tu'chi'a tu'söröë' na' bulu'sayaj nágagaquië'. Gula'bödxi'ë zidzaj, en tsözxön gula'bía di'ë Esteban na'.

58 Bulu'béajë' lë' ní'ilo ra' yödzo na', ga ni' bulu'ladxë' lë' guiöj. Yugu' bönni' ni' tunë' ba nali le tu'zéguie' Esteban didza' bulu'cu'ë lari' ta'xóa yéngaquië' xini'ë tu bönni' lë' Saulo cate' ni' bulu'ladxë' Esteban guiöj.

59 Cate' ni' tu'ladxë' Esteban guiöj, lë' bulidzë' Dios, gunné':

—Xána' Jesús. Buzí' bö' naca caza'.

60 Ní'irö biyéchuë', buzóa zxibë', en bë'ë zidzaj didza', gunné':

—¡Xan! ¡Biti' usubágu'u légaquië' dul-la' ni!
Cate' budxi bë'ë didza' ni, gútitë'.

8

Saulo ribía ládxë'ë bönachi queë' Cristo

1-3 Saulo benë' tsözxön yugu' bönni' ni' gulútië' Esteban.

La' ní'isö yugu' bönni' ta'yéaj ládxi'gaquië' Dios gulu'ágaquië' Esteban, ate' yöjcháchi'gaquië' lë'. Gula'bödxidë'ë ni'a queë'.

Dza na' yugu' bönni' judío cabí ta'yéajlë'ë Cristo gula'bía ládxi'da'gaquië' bönachi queë' Cristo nacua' Jerusalén. Lësca' Saulo gudxía ládxë'ë bönachi queë' Cristo. Guyázië' gapa naca lu yu'u quégaquië', ate' guzxönë' yugu' bönni', en nigula, ate' gulu'ë légaquië' lidxi guié.

Ní'irö gulásilasi ia'láti'sö cabí bidáchigaca yúgu'të bönachi queë' Cristo idú luyú Judea, en luyú Samaria, ate' légacasë' gubáz na' nasöl-lë'ë Cristo bulu'gá'anë' Jerusalén.

Raca libán que didza' dxi'a luyú Samaria

4 Yugu' bönni' na' gulásilasië' yójáquië' yúgu'të lataj, ate' gulunë' libán que didza' dxi'a.

5 Ní'irö Felipe, tu bönni' dzáguië' nupa na' gulásilasi, guyijë' luyú Samaria, ate' benë' libán ni' ca naca queë' Cristo.

6 Bulu'dubë' yugu' bönni' ni', ate' idú ládxi'gaquië' bulu'zë nágagaquië' didza' ru'ë Felipe na', tu' bila'yönnë' xtídzë'ë, en bila'lé'enë' yugu' le taca bë' runë'.

7 Caní guca, tu' benë' ga bulu'rúaj zían bö' xihui' yú'ugaca bönachi, ta'bödxí'a zidzaj, ate' bulu'huóáca zían nupa te'e huë' nacú'uni bin, en nupa biti' guca sá'gaca.

8 Caní guca, bulu'dzeja bönachi yödzo ni'.

9 Zoë' Simón, tu bönni' zí'alö gúquië' bönni' udzá' unë ya'a lu yödzo na', bönni' guzxi' yé'enë' bönachi Samaria na', gunné' lë cazë' náquië' bönni' nayëpisëtëre'.

10 Yúgu'të bönachi bulu'zëda' nágagaca bönni' ni, ga riguela' yugu' bönni' cá'asö ga ridxintë yugu' bönni' lo, gula'nnë': "Bönni' ni dë lu në'ë yöl-la' huáca zxon queë' Dios."

11 Caní guca, gulunë' lë' bal, tu' xidzé nazí yé'enë' légaquië' len yöl-la' gudzá' unë ya'a queë'.

12 Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesu-cristo, ní'irö gula'dilë' nisa, bönni', en nigula.

13 Ní'irö guyéajlë'ë ca' Simón na', en bidilë' nisa, ate' gudáantica'së' tsözxön Felipe na'. Cate' bilé'enë' yugu' yöl-la' huáca zxon, en yugu' le taca bë' runë' Felipe, bubáninë' Simón na'.

14 Cate' yugu' gubáz na' nasöl-lë'ë Cristo nacué' Jerusalén bila'yönnë' ca guca lë ni, chinazí' lu

ná'agaca bönachi luyú Samaria xtídzë'ë Dios, ní'irö gula'söl-lë'ë Pedro, en Juan ni'.

15 Cate' Pedro, en Juan na' bila'dxinë' ni', bulu'lidzë' Dios uláz quégaca bönachi ni' ta'yéajlë' Cristo para idisóalenë' Dios Bö' Lá'ayi léguequi.

16 Ga bidxintë dza na', bití' ridxíninë' Dios Bö' Lá'ayi quégaquië'. Nadílagacasë' nisa para ilácagaquië' tuz len Xanru' Jesús.

17 Ní'irö Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi légaquië'.

18 Cate' bilé'enë' Simón, bönni' udzá' na', le guca cate' gubáz na' nasöl-lë'ë Cristo gula'xóa ná'agaquië' bönachi ni', bidisóalenë' Dios Bö' Lá'ayi légaquië', gú'unnë' quizxjë' légaquië' dumí,

19 ate' rë' légaquië':

—Benna ca' yöl-la' huáca ni quia', para cate' ixóa na'a nútí'tës bönachi, idisóalenë' Dios Bö' Lá'ayi nu na'.

20 Ní'irö Pedro gudxë' lë', rnnë':

—Initi dumí quiu' tsözxön len li', tu' réquinu' len dumí idéli'nu' yöl-la' huáca queë' Dios.

21 Bití' nacu' bachi gútsu'u lë ni, tu' dxía le naca ruá' dö' icja ládxi'do'o lahuë' Dios.

22 Bubi'i ládxi' ca naca huiá' dö' ni runu', en gúta'yu lahuë' Dios, nadxi ca' uniti lahuë' li' ca naca lë ni rizá' ládxi'u.

23 Réquibe'eda' nabágu'u xíguia', en nadzunu' lu yalaj que tu' xihui'.

24 Ní'irö bubi'ë didza' Simón na', rë' légaquië':

—Buli'lídzë' Dios, gáta'yuli' lahuë' Xanru' ni'a quia' neda' para cabí gaca quia' nitú lë na' chigunnáli'.

25 Cate' Pedro, en Juan na' budxi gulunë' ba nali queë' Cristo lu yödzö ni', en bulu'siyönnë' légaquië' xtídzë'ë Dios, gulunë' ca' libán que didza' dxi'a yugu' lu ládzagaquië' bönni' Samaria, ate' gudödi ni' yöjhuöjgaquië' Jerusalén.

Felipe, en tu bönni' Etiopía

26 Ní'irö tu gubáz lá'ayi queë' Xanru' bé'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzö Gaza, nöza na' ridödi lu lataj cá'asö.

27 Ní'irö guyu'ë nöza Felipe na', sa'yéajë'. La' nöza ni' yöjtságuië' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queënu dzö'ö lídxinu. Guyijë' Jerusalén bönni' ni para guyéaj ládxë'ë Dios.

28 Na'a, söhuöjë' ladzë', rö'ë lu carreta queë', en rulabë' le nazúaj lu guichi ca gunnë' Isaías, bönni' bë'ë didza' uláz queë' Dios.

29 Ní'irö Dios Bö' Lá'ayi gudxë' Felipe na':

—Gubíga' ga zeaj carreta na', en guyéajlen le.

30 Cate' chigubíguë'ë Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunnë' Isaías, ate' gudxë' lë':

—¿Naru' réajni'inu' lë na' rulabu'?

31 Bubi'ë didza' bönni' Etiopía na', gunnë':

—¿Nacxi gaca tséajni'ida' channö cuntu nu zoa uzéajni'i neda'?

Ní'irö gúta'yue' lahuë' Felipe cuenë', en cö'lenë' lë' tsözxön lu carreta na'.

32 Lë na' nazúaj lu guichi rulabë', rnna caní:

Ca bö'cu' zxíla'do',
gula'chë'ë Lë' para ilútië' Lë',
en ca bö'cu' zxíla'do',
biti' rnnëba' cate' nu richugu lítsa'ba',
ca' benë' Lë', biti' gusalaj ru'ë bi innë'.

33 Bulu'cá'anë' Lë' cá'asö,
en biti' gulu'ë lataj nu uchi'a usörö Lë'.

¿Nuzxi caz gaca inözi xíguia' nabága'gaca bönachi
uládz queë'?

La' légacasë' gulútië' Lë'.

34 Bönni' huödx na' gunábinë' Felipe, rë' lë':

—Ráta'yua' lo' quíxjöi'inu' neda'. ¿Nuzxi que
gunné' caní bönni' na' bë'ë didza' uláz queë' Dios?
¿Naru' queë' cazë', o que nu yúbölö?

35 Ní'irö la' didza' nisö buguélë'ë Felipe, en
busiyönnë' lë' didza' dxi'a ca naca queë' Jesús.

36 Cate' ni' yú'ugaquië' nöza søjáquië', bila'dxinë'
ga dë nisa, ate' bönni' huödx na' rë' Felipe, rnnë':

—Buyútsöca'. Ni dë nisa. ¿Naru' huácatsö idila'
nisa?

37 Felipe gudxë' lë':

—Channö réajlë'u idú ládXu'u, huáca idilu' nisa.

Lë' bubi'ë didza', rnnë':

—Réajlë'a Jesucristo, náquië' Zxí'inë' Dios.

38 Ní'irö benë' ga guzóa dxisö carreta queë' na',
ate' bulu'huötjë' irópatë', yöjtsázagaquië' lu nisa.
Ní'irö Felipe buquilë' bönni' huödx na' nisa.

39 Cate' bulu'rúajë' lu nisa, Dios Bö' Lá'ayi
buchë'ë Felipe, ate' bönni' huödx na' bíti'rö
bilé'enë' lë'. Ní'irö buguélë'ë xinözë', söhuöjë'
rudzéjanë'.

40 Cate' chiréqui'be'enë' Felipe, zoë' lu yödzo Azoto. Gudödë' yúgu'të yödzo ni', ate' benë' libán que didza' dxi'a, ga bidxintë' yödzo Cesarea.

9

Saulo ruhuöáquië' queë' Cristo

1 Ni' ruzenë' bach Saulo nupa ta'yéajlë' Xanru', gú'unne' gútië' légaquië'. Para gunë' caní bidxinë' lahuë' bixúz lo,

2 en gunábinë' lë' tu guichi unná bë', le tsöju'ë lógaquië' bönni' unná bë' quégaca yu'u gapa tu'dubë' bönni' judío, en tu'sedë' queë' Dios lu yödzo Damasco, ate' channö utsöjxáquië' yugu' bönni', en nigula ta'yéajlë'ë Jesús ni', gaca ichë'ë légaquië' nadzúngaquië' lu yödzo Jerusalén.

3 Tsanni ni' yú'ugaquië' nōza Saulo, en nupa nacuá'len lë', söjáquië', en cate' chizóa ila'dxinë' Damasco, tsárido'os buzeni'da' tu bení' za' lúzxiba, le buzení' ga ni' söjáquië'.

4 Ní'irö gudzo'ë Saulo lu yu, en biyönnë' chi'i Nu rë lë':

—Saulo, Saulo, ¿bizx que ribía ládXu'u neda'?

5 Saulo gunábinë' Lë', gunnë':

—¿Nuzxi li', Xan?

Lë' gunnë':

—Neda' Jesús, Nu ribía ládXu'u. Run zi' cuinu', ridá'bagu'u neda'. Raca quiu' ca na' raca queë'ba' bëdxi, run zi' cuinba' richégu'ba' yaga tuchi' túndë'ë-ba' zi'.

6 Ní'irö Saulo guxzí'idë'ë, gúdxinë', en gunnë':

—Xan, ¿bizxi rë'ënu' guna'?

Xanru' gudxë' lë':

—Guyasa, en guyáz lu yödzö, ate' ni' isöl-la'a quiu' nu guié li' le ral-la' gunu'.

⁷ Guládxinë' yugu' bönni' na' sôjácalenë' Saulo, tu' bila'yönnë' chi'i na', sal-la' cuntu nu bila'lé'enë'.

⁸ Ní'irö böasë' Saulo luyú, en cate' guxá' guiöj lahuë', biti' ca' rilé'enë'. Que lë ni na' gula'guélé'ë në'ë, en gula'chë'ë lë' Damasco.

⁹ Guzóë' ni' tsonna dza nachul-la lahuë', en biti' bi gü'i gudahuë'.

¹⁰ Zoë' ca' Ananías, bönni' réajlë'ë Cristo, yödzö Damasco, ate' Xanru' buluí'i lahuë' ga zoë' ca tu lu yëla bëchigal, en gudxë' lë':

—Ananías.

Lë' bubí'ë didza', gunnë':

—Ni zoa', Xan.

¹¹ Xanru' gudxë' lë':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios.

¹² Chibilé'enë' tu bönni' ca tu lu yëla bëchigal zë'ë tsázië' ga zoë', lë' Ananías, en ixóa në'ë lë' para huóalaj guiöj lahuë'.

¹³ Ní'irö bubí'ë didza' Ananías, rë' Lë':

—Xan, zían nupa chibulu'siyönnë' neda' ca runë' bönni' ni, zían le naca dö' nu'ë le benë' quégaca bönachi ta'yéajlë' Li', nacuá' Jerusalén.

¹⁴ Zë'ë ca' ni, dë lu në'ë uláz quégaquië' bixúz unná bë' sönë' yúgu'të nupa tu'lidza Dios len Lo' Li'.

¹⁵ Ní'irö Xanru' rë' Ananías na', rnnë':

—Guyéaj, tu' gurö caza' neda' bönni' ni para gunë' libán ca naca quia' lógaca bönachi izá'a, en lógaquië'

bönni' ta'nná bé'enë' légaquië', enca' lógaca bönachi Israel.

¹⁶ Ulu'ída' lë' le zían le qui'i sáquë'ë uláz quia' neda', gunë' xichina'.

¹⁷ Ní'irö guyijë' Ananías ni', ate' guyázië' yu'u, en guxóa në'ë Saulo, ate' rë' lë':

—Böcha'a Saulo, Xanru' Jesús, Nu na' buluí'i lahui la' nōza ga ni' zo'o, gusöl-lë'ë neda' para huöálaj guiöj lo', en idisóalenë' Dios Bö' Lá'ayi li'.

¹⁸ La' ní'isö gula'guínnaj le naca ca xilácuba' böla lu guiöj lahuë', ate' la' böáljatë guiöj lahuë'. Ní'irö guyasë' Saulo, en bidilë' nisa.

¹⁹ Gudödi ni' gudahuë', en böáca láchxë'ë. Ca chopa tsonna dza guzóalenë' yugu' bönni' ta'yéajlë'ë Cristo nacu'ë Damasco.

Runë' libán Saulo lu yödzö Damasco

²⁰ La' gusí lotë' Saulo runë' libán queë' Cristo gapa naca lu yu'u ga tu'dubë' bönni' judío, en tu'sedë' queë' Dios, rnnë':

—Jesús náquië' Zxí'ini cazë' Dios.

²¹ Bulu'bánninë' yúgu'të bönni' ni' ta'yönnë' lë', ta'nnë':

—¿Naru' calëga bönni' ni bönni' na' busunítië' nupa nacuá' Jerusalén, en tu'lidza Dios lu Lë' Jesús? Para gunë' caní bidë' ca' ni para ichë'ë légaquië' nadzúngaquië' lógaquië' bixúz unná bë'.

²² Bidíparö láchxë'ë Saulo, en benë' ga gula'bö'ë böniga bönni' judío nacu'ë Damasco, tu' buluí'inë' légaquië' Jesús naca cazë' Cristo, bönni' na' tunë' löza idinná bé'enë' légaquië'.

Rulë' Saulo lu ná'agaquië' bönni' judío

23 Cate' chigudödi zián dza, gulún xtídza'gaquië' bönni' judío nacu'ë ni' ilútië' Saulo.

24 Rëla, en të dza gula'bö' nísie' yugu' bönni' judío ga nu ridödi lu zö'ö run chi'i yödzö na' para ilútië' lë', pero gúquibe'enë' Saulo le tē'ennë' ilunë' queë'.

25 Ní'irö yugu' bönni' ta'yéajlë'ë Cristo gula'guélë'ë Saulo chi'i dzö'ölö, ate' gula'gu'ë lë' tu lu ga'böra zxon naga' du, en bulu'zötjë' lë' ní'ilö lu zö'ö run chi'i yödzö na'.

Rudxinë' Saulo Jerusalén

26 Cate' budxinë' Saulo Jerusalén, gú'unnë' tsöjenë' tsözxön bönni' ni' ta'yéajlë'ë Cristo, pero yúgu'të' guládxinë' lë', tu' cabí téquinë' réajlë'ë Saulo na' Cristo.

27 Ní'irö bönni' na' lë' Bernabé gudélë'ë Saulo, en guchë'ë lë' ga na' nacu'ë bönni' gubáz nasöl-lë'ë Cristo. Busiyönnë' légaquië' ca na' guca queë' Saulo, bilé'enë' Xanru' la' nöza, ate' Xanru' caz bë'lenë' lë' didza', en ca na' benë' Saulo lu yödzö Damasco, len yöl-la' rugu ladxi' benë' libán ca naca queë' Jesús.

28 Ní'irö Saulo guzóalenë' légaquië' lu yödzö Jerusalén, ate' gudálenë' légaquië' tsözxön.

29 Lu yöl-la' rugu ladxi' benë' libán Saulo ca naca queë' Xanru', en gudíl-lalenë' didza' bönni' judío tu'ë didza' griego, ate' légaquië' gula'zóa gula'bö'ë ilútië' lë'.

30 Cate' guléquibe'enë' böchi'ru' ta'yéajlë'ë Cristo lë ni, gula'chë'ë Saulo lu yödzö Cesarea, ate' gula'söl-lë'ë lë' yödzö Tarso, le naca ladzë' Saulo.

31 Ní'irö guca tsahui' quégaca yúgu'të cö' bönachí queë' Cristo, nacuá' idú luyú Judea, en

luyú Galilea, en luyú Samaria, ate' bila'dipa ládxi'gaquië'. Gula'cu'ë lu yöl-la' radxi quégaquië' Xanru', ate' gula'yanë' tu' gúcalenë' Dios Bô' Lá'ayi légaquië'.

Pedro ruúnë' tu bönni' lë' Eneas

³² Ia'tú le guca, cate' Pedro yöjyüë' yugu' böchi'ru', bidxinë' ga nacu'ë bönni' ta'yéajlë'ë Jesús lu yödzö Lida.

³³ Yöjxáquië' tu bönni' ni' lë' Eneas, chiguca xunu' iz dë' ré'enë', nacú'unië' bin.

³⁴ Pedro gudxë' lë':

—Eneas, Jesucristo ruúnë' li'. Guyasa, en butubi xto'o.

La' guyásatë' Eneas na'.

³⁵ Yúgu'të nupa nacuá' yödzö Lida, en yödzö Sarón bila'lé'e lë', ate' bulu'huóaca queë' Xanru', tu' chita'yéajlë' Lë'.

Rátinu Dorcas, en rubannu

³⁶ Ia'stú le guca, lu yödzö Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Bennu nigula ni zían le nácagaca dxi'a le tácalen bönachi yechi'.

³⁷ Le guca dza ni', gü'ínu Dorcas na', en gútinu. Gudödi gula'guíbinu lënu, gula'guíxjë'-nu tu lu yu'u ga naca buropi cuía.

³⁸ Tu' dë yödzö Lida gála'sö ga na' dë yödzö Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', ate' que lë ni na' gula'söl-lë'ë chopë' bönni' ga na' zoë', ate' guláta'yuë' lahuë', të' lë':

—Biti' tsenu' guídu' queëtu'.

39 Ní'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bödxi nu, en tu'lu'ínu lë' lari' quégaquië' bönni', en nigula, yugu' le bennu Dorcas cate' ni' zóalennu léga canu.

40 Ní'irö Pedro bubéajë' ní'ilö yúgu'të nupa nacuá' ni', ate' buzóa zxi bë', rulidzë' Dios. Ní'irö buécjë' ga dënu Dorcas na', gunné':

—Tabita, guyasa.

La' buxa'të guió j lonu Dorcas. Cate' bilé'enu-në' Pedro, la' guyástënu, gurö'önu.

41 Gudélé'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu.

42 Ca guca lë ni guzë didza' idú lu yödzö Jope, ate' gula'yéajlë' bönachi zían Xanru' Jesús.

43 Bugá'anë' Pedro yödzö Jope na' zían dza lu yu'u lidxë' Simón, bönni' runë' tsahui' guídi zxa bëdxi.

10

Le benë' Pedro lidxë' Cornelio

¹ Zoë' yödzö Cesarea tu bönni' lë' Cornelio, bönni' rinná bé'enë' tu gáyu'ë bönni' röjajúqië' gudil-la, nazí'i lágaquië' Bönni' Italia Röjajúqië' Gudil-la.

² Cornelio na' reaj ládxë'ë Dios, en rádxinë' Lë', ate' yúgu'të bönachi nacuá' lidxë' núngaca lë' tsözxön. Runödzejë' Cornelio dumí zían le rácalen bönachi yechi', en rulídzatica'së' Dios.

³ Tu dza idú ridödi xihuö bilé'enë' Cornelio ca tu lu yëla bëchigal, razië' tu gubáz lá'ayi queë' Dios ga na' zoë', en rë' lë':

—Cornelio.

⁴ Gúdxinë' Cornelio. Buyúë' gubáz lá'ayi na', en gudxë' lë':

—¿Bizxi rnno', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nözinë' ca runu', rácalenu' bönachi yechi'.

⁵ Na'a, gusöl-la' yugu' bönni' tsöjáquië' yödzo Jope tsöjlídzagaquië' bönni' na' lë' Simón, zoa ia'tú lë' Pedro.

⁶ Bönni' ni zoë' lidxë' tu bönni' runë' tsahui' guídi zxa bëdxi. Bönni' ni, lësca' lë' Simón, ate' zoa lidxë' ra' nísado'. Pedro na' guíë' li' le ral-la' gunu'.

⁷ Cate' chibuzë'ë gubáz lá'ayi na' bë'lenë' lë' didza', bulidzë' Cornelio chópabi' bi'i huen dxin queë', en tuë' bönni' rejë' gudil-la reaj ládxe'ë Dios, en dzáguië' bönachi nacuá' lidxë' Cornelio.

⁸ Cate' budxi busiyönnë' légaquië' yúgu'të le guca, gusöl-lë'ë légaquië' yödzo Jope.

⁹ Dza buropi, tsanni ni' yú'ugaquië' nöza, en ta'dxinë' gala' ga dë Jope na', la' ní'sö gurenë' Pedro ícjo'olö yu'u para ulidzë' Dios, ni' naca idú huagubídza.

¹⁰ La' ná'asö ridunë' Pedro, en gú'unnë' gahuë', ate' tsanni ni' tu'pë'ë queë', bilé'enë' le naca ca tu lu yëla bëchigal.

¹¹ Bilé'enë' nayalaj lúzxiba, en ruhuötaj tu le naca ca tu lari' guitsa' zxön ga zoë', le naga' idapa la'a.

¹² Lahui lari' na' dxíagacaba' yugu' böa' guixi' izá'a nacuá' tapa ni'a ná'agacaba', en yugu'

böa' tá'ayöj lë'egacaba' lu yu, en yugu' böa' zoa xíligacaba'.

¹³ Ní'irö biyönnë' chi'i nu rë lë':

—Pedro, guyasa. Bëti-gacaba', en gudagu.

¹⁴ Bubi'ë didza' Pedro, rnnë':

—¡Calëga, Xan! Catu caz gudahua' le cabí ral-la' gágutu', o le cabí naca dxi'a.

¹⁵ Le buropi luzuí biyönnë' chi'i nu na' gudxi lë':

—Le nunë' Dios dxi'a, bití' innó' que: “Bití' naca dxi'a.”

¹⁶ Tsonna luzuí guca caní, ate' ní'irö la' buëpitë lari' zxön na' lúzxiba.

¹⁷ Tsanni ni' rö'ë böniga Pedro, rizá' ládxe'ë bizxi sa'yéaj lë na' bilé'enë' ca tu lu yëla bëchigal, bila'dxinë' bönni' na' nasöl-lë'ë Cornelio légaquië' ra' yu'u, ta'nabë' gazxi zoa lidxë' Simón na'.

¹⁸ Cate' bila'dxinë' ni', bulu'lidzë' nupa nacuá' yu'u na', en gula'nábinë' légaquië' channö zoë' tu bönni' lë' Simón ni', zoa ia'tú lë' Pedro.

¹⁹ Tsanni ni' rizá' ládxe'ë Pedro ca naca lë na' bilé'enë', Dios Bó' Lá'ayi gudxë' lë', rnnë':

—Buyútsöca'. Chibila'dxinë' tsonnë' bönni' ni, tu'guiljé' li'.

²⁰ Guyaschi na'a, en bötaj zcan yu'u. Bití' gaca chopa ládXu'u tséajlenu' légaquië', tu' nasöl-la'a neda' yugu' bönni' ni.

²¹ Ní'irö bötjé' Pedro zcan yu'u ga na' nacu'ë bönni' na' nasöl-lë'ë Cornelio, en gudxë' légaquië':

—Neda' bönni' ruguíajli'. ¿Bizxi huen zá'ali' ni?

²² Bulu'bi'ë didza', të' lë':

—Cornelio, tu bönni' rinná bé'enë' bönni' röjáquië' gudil-la, nasöl-lë'ë netu'. Náquië' bönni' tsahui', en rádxinë' Dios. Yúgu'të bönni' judío tunë'

bal bönni' ni, en nadxí'iguequinë' lë'. Ia'tú le guca, tu gubáz lá'ayi queë' Dios bé'lenë' lë' didza', en gudxë' lë' isól-lë'ë nu udulídza li' guídu' lidxë' para yönnë' didza' gu'u.

²³ Ní'irö Pedro gulu'ë légaquië' lu yu'u, en bë'ë ga ila'cu'ë. Cate' za' rení' ia'tú dza, guyasë' Pedro, en guyéajlenë' légaquië'. Bal-lë' böchi'ru' nacu'ë Jope na' gulunë' lë' tsözxön.

²⁴ Dza bunni ni', bila'dxinë' Cesarea. Chizóë' Cornelio ribözë' légaquië', ate' chinutubë' yugu' dí'a dza queë', en yugu' böchi' luzë'ë nadxí'irönë' lidxë'.

²⁵ Cate' guyázië' Pedro lö'a, birúajë' Cornelio yu'u, yöjtságuië' lë'. Biyéchuë' xini'ë Pedro, en guyéaj ládxë'ë lë' ca runru' queë' Dios caz.

²⁶ Pedro buchisë' lë', en gudxë' lë':

—Guyasa. Lësca' bönachi yödzölió naca' ca nacu' li'.

²⁷ Ni' tu'isë' ca' didza', guyázatë' Pedro yu'u, en yöjxáquië' nudúbigaca bönachi zián ni'.

²⁸ Ní'irö Pedro gudxë' légaquië', rnnë':

—Libi'ili' nöz quézili' ca rinná bë' xibá queë' Moisés, rnna biti' ral-la' gunë' tu bönni' judío tsözxön o tsázalenë' nu bönni' izá'a. Na'a, Dios bulú'inë' neda' biti' ral-la' innía' queë' nitúë' bönni' náquië' cá'asö o biti' náquië' dxi'a.

²⁹ Que lë' ni na' cate' bulídzali' neda', la' bídatea', en biti' guca chopa ládxa'a. Rinaba' na'a, ¿bizx que na' bulídzali' neda'?

³⁰ Ní'irö bubí'ë didza' Cornelio, gunnë':

—Chiguca tapa dza ca zóaru' na'a, idú ridödi xihuö, cate' ni' runa' gubasa, en rulidza'-në' Dios

lu yu'u lidxa' ni, bilé'eda'-bi' tubi' bönni' ra'bán nácubi' lari' répi yösa beni', dului'i lobi' neda'.

³¹ Caní gúdxibi' neda': "Cornelio. Dios riyönnë le rulidzu'-në', en nözinë' ca runu', rácalenu' yugu' bönachi yechi'.

³² Na'a, isöl-lu'u nu bönni' lu yödzö Jope para tsöjlídzë' tu bönni' lë' Simón, zoa ia'tú lë' Pedro. Bönni' ni zoë' lidxë' tu bönni' runë' tsahui' guídi zxa bëdxi, en lë' ca' Simón. Zoa lidxë' bönni' ni ra' nísado'. Cate' idxinë' Pedro na' ga zu', usiyönnë' li' didza' dxi'a."

³³ Caní guca, la' gusöl-la'tea' nu tsöjlidza' li', ate' tsáhui'do' benu' bidu' ga zóatu' ni. Que lë ni na' zóatu' ni yúgu'tëtu', nudúbitu' lahuë' Dios para uzë nágatu' le inná bé'enë' Dios li' innó'.

Didza' bëë Pedro lidxë' Cornelio

³⁴ Ní'irö gusí lahuë' Pedro ru'ë didza', rnnë':

—Le nácate réajni'ida' na'a, biti' ruyusë' Dios yöl-la' rinnësö quégaca bönachi, pero tuz ca rilé'enë' rë'u.

³⁵ Dios raza ládxë'ë bönachi idútë yödzölió, nupa na' tadxi Lë', en tun le naca dxi'a.

³⁶ Gusöl-lë'ë Dios xtídzë'ë ga nacuá' bönachi Israel, en gusöl-lë'ë nu ben libán que didza' dxi'a, le run ga raca dxi'a quégaca bönachi, lë na' bidxín queëru' lu në'ë Jesucristo. Lë cazë' náquië' Xanru' yúgu'tëru'.

³⁷ Libí'ili' nöz quézili' lë na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa.

³⁸ Nözili' ca benë' Dios le guca queë' Jesús, bönni' Nazaret. Gusöl-lë'ë Dios Bö' Lá'ayi, en yöl-la' huáca queë' para sóalengaca Lë'. Nözili' ca na' gudë'

Jesús, runë' le naca tsahui', en ruúnë' yúgu'të nupa gula'guí'i gula'zaca' lu na' tu' xihui'. Caní benë', tu' guzóalenë' Dios Lë'.

³⁹ Na'a, netu' runtu' ba nalí que yúgu'të lë na' benë' Jesús luyú Judea, en lu yödzö Jerusalén, en ca na' guca, gulútië' Jesús, cate' bulu'dë'ë Lë' lë'e yaga cruz.

⁴⁰ Ní'irö Dios busubanë' Lë' cate' guca tsonna dza nátië', en benë' ga bulu'í'i lahuë' ga zóatu' netu'.

⁴¹ Biti' bulu'í'i lahuë' lógaca yúgu'të bönachi, pero lotu' netu' bulu'í'i lahuë'. Dios guröë' netu' dza ni'te para guntu' ba nalí queë' Jesús, ate' güí'i gudágulentu' Lë' tsözxön gudödi bubanë' lu yöl-la' guti.

⁴² Gunná bé'enë' Dios netu' guntu' libán lógaca bönachi, ate' runtu' ba nalí queë' Cristo, náquië' Nu buzóa cazë' Dios para uchi'a usöröë' nupa nabángaca, en nupa chinátigaca.

⁴³ Lësca' yúgu'të bönni' gulu'ë didza' uláz queë' Dios gulunë' ba nalí queë' Jesús, gula'nnë': "Yúgu'të nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'."

Dios Bö' Lá'ayi ridisóalenë' bönachi izá'a

⁴⁴ Ni' ruí'isë' caní didza' Pedro, la' bidxintë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'.

⁴⁵ Gula'ná' badxë' bönni' judío ta'yéajlë'ë Cristo, nupa na' bila'dxín ni' tsözxön len Pedro, tu' bidë' Dios Bö' Lá'ayi, Nu na' nasöl-lë'ë Dios Xuz. Bidisóalenë' bönachi ni' bití' náca'gaca judío.

⁴⁶ Caní gulunë' tu' bila'yönnë' tu'ë bönni' zi'tu' na' didza' yúbölö, en tunë' Dios zxön.

47 Ní'irö bē'ē didza' Pedro, gunnē':

—¿Naru' huácatsö nu inná be'e bönachi ni para cabí ila'dila nisa? Naca bē' Dios Bō' Lá'ayi bidisóalenē' légaquiē', ca na' bidisóalenē' netu'.

48 Gunná bē'ē Pedro ila'dilē' nisa tu' nazí' lu ná'agaquiē' Lē' Xanru' Jesús. Ní'irö yugu' bönni' ni' guláta'yue' lahuē' Pedro ugá'analenē' légaquiē' ca chopa tsonna dza.

11

Didza' bē'ē Pedro lógaca bönachi queë' Cristo nacua' Jerusalén

¹ Bila'yönnē' gubáz nasöl-lē'ē Cristo, en böchi'ru' nacu'ē luyú Judea ca na' bönni' bití' nácagaquiē' judío gula'zí' lu ná'agaquiē' xtídzē'ē Dios.

² Cate' budxinē' Pedro Jerusalén, böchi'ru' judío gula'díl-lalenē' lē' didza'.

³ Gulē' Pedro:

—¿Bizx que yöjtsú'ulenu' bönni' bití' nácagaquiē' judío, en gudágulenu' légaquiē' tsözxön?

⁴ Ní'irö gusí lahuē' Pedro rusiyönnē' légaquiē' idútē lē na' guca, rnnē':

⁵ —Guzóa' lu yödzö Jope, en cate' ni' rulidza'-nē' Dios, bilé'eda' ca tu lu yēla béchigal tu le buluí'inē' Dios neda'. Bilé'eda' bötaj birúaj lúzxiba tu le naca ca tu lari' guitsa' zxön, naga' idapa la'a, ate' bidxín ga na' zoa'.

⁶ Cate' ni' ruyúa' le para ilé'eda' le dxía láhuilö, bilé'egacada'-ba' böa' guixi' nacua' tapa ní'agacaba', yugu' böa' guixi' sínia', en böa' tá'ayöj lé'egacaba' lu yu, en böa' zoa xíligacaba'.

⁷ Biyönda' chi'i nu gudxi neda': "Pedro, guyasa. Bēti-ba', en gudagu."

8 Ní'irö gudxa'-në': "Biti' ca', Xan. Catu caz gudahua' tu le cabí ral-la' gágutu', o tu le cabí naca dxi'a."

9 Ní'irö le buropi luzuí bulidza chi'i lúzxiba na' neda', en gudxi neda': "Le nunë' Dios dxi'a, bití innó' bití' naca dxi'a."

10 Tsonna luzuí guca caní, ate' ní'irö idútë læ na' bilé'eda' la' buëpitë lúzxiba.

11 La' ní'sö bila'dxintë' tsonnë' bönni' ra' yu'u ga na' zoa', narúajgaquië' yödzö Cesarea, nasól-lë'ë légaquië' tu bönni' læ' Cornelio. Sududíljagaquië' neda'.

12 Dios Bö' Lá'ayi gudxë' neda': "Guyéajlen légaquië', en cabí gaca chopa ladxu'u." Lësca' izxópatë' böchi'ru' ni gula'zá'lenë' neda' tsözxön. Guyéajtu' Cesarea, ate' guyaztu' lidxë' tu bönni' zoë' ni'.

13 Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxë' læ': "Na'a isól-la'gacu'në' bönni' tsöjáquië' yödzö Jope, tsöjlídzagaquië' Simón, zoa ia'tú læ' Pedro.

14 Bönni' na' usiyönnë' li' naca gaca uló' li', en ulu'lágaca ca' yúgu'të bönachi nacua' lidxu'."

15 Cate' ni' gusí lahua' ru'ílëna' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí'atëlö.

16 Ní'irö yöjneda' didza' na' bë'ë Xanru', gunnë': "Le nácatë Juan buquilë' bönachi nisa lu nisa, pero libí'ili', gaca queéli' le rulu'isö yöl-la' ridila nisa na', idisóalenë' Dios Bö' Lá'ayi libí'ili'."

17 Que læ ni na', channö Dios gusól-lë'ë Dios Bö' Lá'ayi quégaquië', la' tuz ca benë' queëru' rë'u

réajlë'ëru' Xanru' Jesucristo, ¿núzxitë neda' inná bé'eda'-në' Dios?

¹⁸ Ní'irö, cate' bila'yönnë' lë ni, gula'cuá' dxíë', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' biti' nácagaquië' judío, tu'bí'i ládxi'gaquië' para ila'déli'në' yöl-la' na'bán idú.

Yugu' bönni' nacu'ë Antioquía ta'yéajlë'ë Cristo

¹⁹ Cate' ni' yugu' bönni' judío biti' ta'yéajlë'ë gulútië' Esteban, en gula'bía ládxi'gaquië' ia'zica'rö bönachi ta'yéajlë' Cristo, bulu'zxunnaj bönachi ni, en gulásilasi zían yödzö luyú Fenicia, en luyú Chipre, en lu yödzö Antioquía. Gulunë' libán ni' que xtídzë'ë Dios, pero lógacasö bönachi judío.

²⁰ Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzö Antioquía, gulu'ilenë' ca' didza' yugu' bönni' izá'a. Gulunë' libán lógaquië' que didza' dxí'a ca naca queë' Xanru' Jesús.

²¹ Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huöáca queë'.

²² Cate' bidxín didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'söl-lë'ë Bernabé tséajë' Antioquía na'.

²³ Cate' Bernabé na' bidxinë' Antioquía, bilé'enë' le ruzá' ládxië'ë Dios quégaquië', en budzéjanë'. Guchízië' icja nágagaquië' para ila'día'tica'së' queë' Xanru' idú ládxi'gaquië'.

²⁴ Náquië' Bernabé na' tsahui', en idú zóalenë' Dios Bö' Lá'ayi lë', en idú ládxië'ë réajlë'ë Cristo.

Ni'a que libán benë' Bernabé na', bönachi zián lu yödzö na' gula'yéajlë' Xanru'.

²⁵ Gudödi ni', guyijë' Bernabé na' yödzö Tarso, yöjdiljë' Saulo. Cate' budzölinë' lë', buchë'ë lë' Antioquía.

²⁶ Idú ca tu iz gula'cu'ë ni', tunë' tsözxön bönachi queë' Cristo, en tu'sédinë' bönachi zián. Lu yödzö Antioquía na', gusi lo gula'zi' lágaquië' cristiano le rnna len didza' xidza': Bönachi Queë' Cristo, nupa ni' ta'yéajlë' Lë'.

²⁷ Dza ni' bila'ru'ajë' Jerusalén, en yöjáquië' Antioquía bal-lë' bönni' tu'ë didza' uláz queë' Dios.

²⁸ Guzuinë' Agabo, bönni' dzáguië' yugu' bönni' na', en uláz queë' Dios Bö' Lá'ayi buzéajni'inë' légaquië', gunné':

—Si' gaca gubín idútë yödzölió.

Guca gubín na' cate' ni' rinná bë'ë Claudio, lu yödzö Roma.

²⁹ Ní'irö gula'zi' lu ná'agaquië' bönni' ta'yéajlë'ë Cristo nacu'ë Antioquía, ila'söl-lë'ë tsca le dësö que queégaquië', le gácalen böchi'ru' nacu'ë luyú Judea.

³⁰ Caní gulunë', ate' lë na' bulu'nödzjë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula tapa chi'ë bönachi queë' Cristo nacu'ë Judea.

12

Tútië' Jacobo, en ta'gu'ë Pedro lidxi guié

¹ Dza na' Herodes, bönni' unná bë', benë' ga gula'zönë' bal-lë' bönni' queë' Cristo para ulu'saca' zi'ë légaquië'.

² Gunná bé'enë' bönni' gulútië' Jacobo, böchë'ë Juan. Gulu'ë lë' guié tuchi'.

³ Cate' gúquibe'enë' Herodes gula'yaza ládxi'gaquië' bönni' judío lë ni, benë' ga gula'zönë' ca' Pedro. Gulaca lë ni dza ni' raca laní cate' tahuë' yöta xtila bití' nazí'i cúa zi que.

⁴ Gudödi gula'zönë' Pedro, gula'gu'ë lë' lidxi guié, en bulu'dödë' lë' lu ná'agaquië' tapa cö' bönni' rójáquië' gudil-la, nacu'ë tapë' tu huéaj cö' na', para uyúgaquië' lë'. Yu'u ládxi'ë Herodes ubéajë' Pedro lógaca bönachi tödi Laní Pascua, laní na' tu'subanë' ca benë' Dios, bubéajë' bönachi judío luyú Egipto.

⁵ Caní guca, nun chí'igacrë' Pedro lu yu'u lidxi guié na', pero bönachi queë' Cristo bulu'lídzatica'sö Dios, ta'nábini Dios gácalenë' Pedro.

Dios rubéajë' Pedro lidxi guié

⁶ Cate' si' idxín dza yu'u ládxi'ë Herodes ubéajë' Pedro lidxi guié na', la' dzö' ní'isö dë' rásië' Pedro, ate' nacu'ë chopë' bönni' rójáquië' gudil-la cuita lë'ë Pedro na', en núga'gaquië' lë' chopa du guié. Gula'cu'ë ia'bal-lë' bönni' rójáquië' gudil-la tapa chi'ë ga nu riyaza lidxi guié na'.

⁷ Tsárido'os bulufí' lahuë' tu gubáz lá'ayi queë' Xanru' ni', ate' buzení'da' bení' lidxi guié. Gudanë' gubáz lá'ayi na' cuita lë'ë Pedro, ate' busubanë' lë', en gudxë' lë':

—Guyaschi.

Ní'irö bulu'huédxi du guié na' naga' ni'a në'ë Pedro.

⁸ Gubáz lá'ayi na' gudxë' lë', gunné':

—Béga' lë'u, en gudá' xirachu'.

La' bentë' Pedro caní. Ní'irö gubáz lá'ayi na' gudxë' lë', rnnë':

—Guxóa lari' cúdzu'u, en gudá len neda'.

⁹ Burúajë' Pedro, sa'yéajlenë' gubáz lá'ayi na', pero biti' réquibe'enë' nácatë le runë' gubáz lá'ayi na'. Gúquinë' yélasö rinenë'.

¹⁰ Cate' chigula'dödë' ga nacu'ë bönni' zí'alö, en bönni' buropi cö', bönni' na' röjáquië' gudil-la tapa chi'ë, bila'dxinë' ga zoa le néquini guié le nusayaj ga nu riyaza lidxi guié na', ga nu rurúaj la' nöza que yödzö. Ga nu riyaza na', rácasö que guyalaj. Cate' bila'rúajë' ni', gula'zë'ë ga ridzaga ia'turö nöza, ate' ni' gubáz lá'ayi na' la' bulá'alentë' Pedro.

¹¹ Ní'irö réquibe'enë' Pedro, ate' lu icja ládxi'da'azë' gunnë':

—Na'a chinözda' le nácatë gusöl-lë'ë Xanru' gubáz lá'ayi queë', en busölë' neda' lu në'ë Herodes, en lu yúgu'të le gulë'ënnë' bönni' judío ilunë' quia'.

¹² Tsanni ni' yu'ë nöza Pedro, rizá' ládxe'ë ca naca lë na' guca, ate' bidxinë' lídxinu María, xiná'abi' Juan, bi'i na' zoa ia'tú labi' Marcos. Lu yu'u na' nudúbigaca bönachi zían ta'yéajlë' Cristo, en tu'lidza Dios.

¹³ Cate' bulidzë' Pedro ra' yu'u lö'a, birúajbi' bi'i nigula lëbi' Rode para inözibi' nuzzi na'.

¹⁴ Cate' búnbë'ëbi' bi'i nigula ni chi'ë Pedro, lu yöl-la' rudzeja queëbi' biti' gusaljbi' yu'u, pero carelö böajbi' lu yu'u, yöjtíxjöi'ibi' nupa nacua' ni', rnnabi':

—Zoë' Pedro ra' yu'u.

¹⁵ Ní'irö gulë' lëbi':

—Nachixi icju'.

Lëbi' tsútsurö ben xtídza'bi' naca caní. Ní'irö gula'nné':

—Calëga lë'. Bixín queë' na'.

¹⁶ Tsanni na' biti' zoa dxië' Pedro rulidzë' nupa nacuá' lu yu'u. Cate' gula'saljë' yu'u, gula'nítisinë' cate' bila'lé'enë' lë'.

¹⁷ Ní'irö guchisa në'ë Pedro para ila'cu'ë dxisö, ate' busiyönnë' légaquië' ca benë' Xanru', bubéajë' lë' lidxi guié. Ní'irö gudxë' légaquië':

—Guli'siyönnë' ca' Jacobo, en yugu' böchi'ru' ca na' guca.

Ní'irö burúajë' Pedro, sa'yéajë' ga yúbölö.

¹⁸ Cate' za' rení' dza na', bönni' röjáquië' gudil-la gula'bö'ë böniga nacxi guca, bíti'rö yu'ë Pedro lidxi guié.

¹⁹ Ní'irö gusöl-lë'ë Herodes nupa tsöjxí'gaca Pedro. Cate' biti' bulu'dzölinë' lë', Herodes gunabi yúdxinë' yugu' bönni' na' röjáquië' gudil-la, bönni' gulún chi'ë Pedro. Gudödi ni' gunná bé'enë' nupa bëtigaca yugu' bönni' na' röjáquië' gudil-la. Ní'irö buzë'ë Herodes luyú Judea, sa'yéajë' Cesarea, ate' bugá'anë' ni'.

Ca gútië' Herodes

²⁰ Dza ní'isö rilenë' Herodes bönachi yödzö Tiro, en yödzö Sidón. Zí'alö bönachi lu xiyúë' Herodes na' gula'söl-la' le biyadzaj quégaca bönachi lu xiyúgaca yödzö Tiro, en Sidón na', pero tu' rilenë' Herodes légaquië', bíti'rö bi ta'söl-lë'ë quégaquië'. Ní'irö gulunë' tuz bönni' Tiro, en Sidón na', ate' gulunë' ga soë' Blasto unë quégaquië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulë'ënnë' bönni' Tiro, en Sidón

na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégaquië'.

21 Ní'irö budxië' bë' Herodes dza yönnë' légaquië', ate' dza na' gurö'ë xilatjë' ga ruchi'a rusöröë' bi raca, nácuë' lari' nazaca', en benë' libán lógaquië'.

22 Ní'irö bulu'lidzë' zidzaj bönni' na', ta'nnë':

—¡Calëga bönni'sö ni! ¡Dios caz ni ru'ë didza'!

23 La' ná'asö la' bë'të' gubáz lá'ayi queë' Xanru' lë' tu' buzi'ë lë' cazë' yöl-la' ba ral-la' gaca queë' Dios. Ní'irö gurö'ë Herodes na' buzuga', ate' gútië' tu' táguba' lë'.

24 Ní'irö guca libán que xtídzë'ë Xanru', ate' gula'yán nupa nazí' lu ná'agaca le.

Le zí'alö luzuí röjéngaquië' Bernabé, en Saulo libán

25 Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönachi queë' Cristo nacu'ë Jerusalén, bulu'zë'ë ní', yöjhuöjgaquië' yödzö Antioquía. Gula'chë'ë-bi' ca' bi'i Juan, zoa ia'tú labi' Marcos.

13

1 Dza ná'asö gula'cu'ë bönni' tu'ë didza' uláz queë' Dios, en bönni' tu'sédinë' bönachi lu yödzö Antioquía, tunë' tu zxön bönachi queë' Cristo lu yödzö na'. Caní légaquië':

Bernabé,

Simón, (lë' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxönlenë' tsözxön Herodes, bönni' rinná bë'ë luyú Galilea).

² Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Guli'béaj-gáquië' quez quia' Bernabé, en Saulo para tsöjéngaquië' dxin na' bulidza' légaquië' ilunë'.

³ Budxi gulunë' gubasa, en gulu'ilenë' Dios didza', ní'irö gula'xóa ná'agaquië' chopë' ni, en gula'sól-lë'ë légaquië'.

Yugu' gubáz nasöl-lë'ë Cristo tunë' libán luyú Chipre

⁴ Ní'irö yöjáquië' Bernabé, en Saulo yödzö Seleucia, tu' gusöl-lë'ë Dios Bö' Lá'ayi légaquië' ni', ate' ni' gula'benë' tu lë'e barco le guchë' légaquië' ga naca tu luyú bidxi lu nísado', nazí'i le Chipre.

⁵ Cate' bila'dxinë' lu yödzö Salamina luyú na', gulu'ë xtídzë'ë Dios gapa naca lu yu'u ga tu'dubë' bönni' judío luyú na', en tu'sëdë' queë' Dios. Nachë'gaquië'-bi' bi'i Juan para gunbi' légaquië' tu zxön.

⁶ Budxi gula'dödë' idú gapa dë yödzödo' luyú bidxi na' lu nisa zxön, ní'irö bila'dxinë' yödzö Pafos. Yöjxáca'gaquië' Barjesús, tu bönni' judío ni'. Náquië' bönni' udzá' rinnë' yë'ë, en rnnë' ru'ë didza' uláz queë' Dios.

⁷ Bönni' ni dzáguië' Sergio Paulo, bönni' réajni'i rinná bë'ë. Bönni' unná bë' na' bulidzë' Bernabé, en Saulo, tu' ré'ënë' yönnë' xtídzë'ë Dios.

⁸ Ní'irö bönni' udzá' na' gudá'baguië' Bernabé, en Saulo, tu' gú'unnë' gunë' ga biti' tséajlë'ë Dios bönni' rinná bë'ë. Bönni' udzá' na' lë' ca' Elimas tsca naca xtídza'gaca bönachi izá'a ga na'.

⁹ Ní'irö Saulo, lë' ca' Pablo, buzóa tsutsu lahuë', zóalenë' Dios Bö' Lá'ayi lë'. Ruyúë' Elimas na'

¹⁰ en rě' lě':

—Li', bönni' rizí' yě', en bönni' huiá' dō', nacu' ca xzí'ini caz tu' xihui', en bönni' biti' rilé'eně' dxi'a yúgu'tě le naca tsahui'. ¿Naru' cabí soa dxitso' ca runu', ridá'bagu'u didza' tsahui' queě' Xanru', en ruzágu'u xinōza nu rě'ěni tséajlě' Lě'?

¹¹ Na'a, Xanru' usaca' zi'ě lí', ate' ichul-la lo', en biti' ilé'enu' gubidza nababa dza.

La' guchúl-latě lahuě' Elimas na', ate' gudě' nilō ná'alō, riguiljě' nuzxi sōn ně'ě para ichě' lě'.

¹² Cate' bilé'eně' bönni' unná bě' na' lě na' guca, bubánině' ca naca xtídzě'ě Xanru', ate' guyéajlě'ě Cristo.

Le guluně' Pablo, en Bernabé lu yōdzō Antioquía luyú Pisidia

¹³ Ní'irō buzě'ě Pablo lu yōdzō Pafos na' len yugu' bönni' dzágagaquiě' lě', nacu'ě tu lě'e barco, ate' bila'dxině' yōdzō Perge luyú Panfilia. Lu yōdzō na' bi'i Juan bulá'alēnbi' légaquiě', en bōajbi' Jerusalén.

¹⁴ Gudōdi ni' bulu'zě'ě Perge na', en yōjáquiě' yōdzō Antioquía luyú Pisidia. Lu yōdzō na', cate' ni' naca dza lá'ayi quégaquiě' bönni' judío, gula'yáziě' lu yu'u ga tu'dubě' tu'sedě' queě' Dios, ate' lu yu'u na' gula'bō'ě.

¹⁵ Ní'irō tu bönni' zoě' ni' bulabě' guichi ga nazúaj xibá queě' Dios, enca' le nazúaj lu guichi ca gula'nně' bönni' gulu'ě didza' uláz queě' Dios. Gudōdi ni' yugu' bönni' unná bě' que yu'u na' gula'sól-lě'ě nu yōjōdx Saulo, en Bernabé, gunně':

—Libi'ili', bōchi'tu'. Channō nuá'ali' bi innali' le uzéajni'i netu', guli'nně'.

16 Ní'irö guzuínë' Pablo, en guchisa në'ë para ila'cu'ë dxisö, gunné':

—Buli'zé nágali' le guía' libí'ili', bönni' Israel, en libí'ili', núlöli' rádixili'-në' Dios.

17 Xanru' Dios, Nu ta'yéaj ládxi'gaca bönachi Israel, gurö cazë' xuz xtó'oru', en benë' ga gula'yándë'ë cate' ni' nácagaquië' bönni' zí'tu' luyú Egipto. Len yöl-la' huáca zxön queë' bubéajë' légaquië' luyú ni'.

18 Idú choá' iz Dios biá' gulénë' quégaquië' cate' ni' gula'dë' idú luyú bidxi lu lataj cá'asö.

19 Cate' budxi busunítië' gadxi cö' yödzö gula'cuá' luyú Canaán, bunödzejë' xiyúgaca bönachi ni' quégaquië' xuz xtó'oru'.

20 Gudödi ni', le guca idú ca tapa gayuá' yu' chi-un iz, Dios bucu'ë yugu' bönni' bulu'chi'a bulu'söröë' légaquië' ga bidxintë zoë' Samuel, bönni' bë'ë didza' uláz queë' Dios.

21 Ní'irö gula'nábinë' Dios uzóë' tu bönni' unná bë' quégaquië'. Dios guröë' Saúl, zxí'inë' Cis, bönni' nababë' di'a dza queë' Benjamín. Idú ca choá' iz gunná bé'enë' Saúl na' légaquië'.

22 Gudödi ni' Dios gudúë' Saúl na', ate' buzóë' David quégaquië' para inná bë'ë. Dios benë' ba nalí queë' David ni, gunné': “Nözda' runë' David, zxí'inë' Isai, le raza ládxa'a, en gunë' yúgu'të le ré'ënda' neda'.”

23 Ladaj zxí'ini xi'sóë' David na' benë' Dios ga guljë' Jesús para gáquië' bönni' usölë' bönachi Israel, ca na' guzxi' lu në'ë Dios zí'atëlö gunë'.

24 Zí'alö cate' si' ilá' lahuë' Jesús, benë' Juan libán lógaca yúgu'të bönachi Israel para ulu'bí'i ládxi'gaca, en ila'dila nisa.

25 Cate' ni' chizóa údxi gunë' libán Juan na', gunné': "¿Nuzxi réquili' naca' neda'? Biti' naca' Cristo, bönni' na' ral-la' guídë'. ¡Na'a, buli'yútsöca'! Chizóë' idxinë' bönni' na' ga zoa' ni, ate' neda' bití' naca' lesaca' ilecja' xiráchuë' nudë'ë."

26 'Libí'ili', böcha'a, yugu' xzí'ini xi'sóë' Abraham, en núlöli' zóali' ni, en rádxili'-në' Dios. Dios caz gusöl-lë'ë queëli' didza' ni para uláli'.

27 Nupa nacuá' Jerusalén, en bönni' ta'nná bé'enë' légaquië' bití' bulu'únbë'ë Jesús, en bití' gula'yéajni'inë' le nazúaj lu guichi le gula'nnë' yugu' bönni' gulu'ë didza' uláz queë' Dios, sal-la' tu'laba cazë' yugu' didza' ni yugu' dza lá'ayi. Lu yöl-la' cabí réajni'i quégaquië' gulunë' ga budxín ca rna didza' ni cate' ni' gula'chúguië' queë' Jesús gátië'.

28 Sal-la' bití' budzöli le nabáguë'ë Jesús gátië', gula'nábinë' Pilato inná bé'enë' bönni' ilútië' Lë'.

29 Cate' budxi gulunë' queë' yúgu'të le nazúaj lu guichi ca ral-la' gaca queë', bulu'zötjë' Lë' lë'e yaga cruz, en bulu'cáché'ë Lë' yeru ba.

30 ¡Ní'irö Dios busubanë' Lë' lu yöl-la' guti!

31 Zían dza buluí'i lahuë' Jesús lógaca nupa yójacalen Lë' tsözxön cate' ni' buzë'ë luyú Galilea, en bidxinë' Jerusalén. Na'a, yugu' bönni' na' tunë' ba nalí queë' lógaca bönachi.

32 'Caní naca, lësca' netu' ni rusiyöntu' libí'ili' didza' dxí'a ca naca lë na' guzxí' lu në'ë Dios gunë' quégaquië' xuz xtó'oru'.

33 Lë na' guzxí' lu në'ë Dios quégaquië', Lë cazë' benë' ga budxín queëru', nácaru' xzí'ini xi'sóagaquië'. Caní benë' cate' busubanë' Jesús.

Guca ca na' nazúaj lu guichi ga zoa salmo buropi, le rnna caní: "Li' nacu' Zxi'ina'. Neda' buzóa caza' Li'."

³⁴ Ca naca na', Dios busubanë' Lë' lu yöl-la' guti para cabí initi le naca cazë', Lë' cazë' Dios gunnë' caní: "Gunna' quiu' le nácgaca bica' ba guzxí' lu na'a lahuë' David."

³⁵ Que lë' ni na' nazúaj ca' lu guichi, ga zoa ia'tú salmo, le rnna caní: "Biti' gu'u lataj ugá'anë' bönni' lá'ayi quiu' ga initi le naca cazë'."

³⁶ Le guca queë' David naca bë'. Gudödi benë' dxin lógaca bönachi uládz queë', ca na' gunná bé'enë' Dios lë', ní'irö gútië', ate' gula'gu'ë' lë' yeru ba ga nacu'ë' xuz xtá'ahuë', ate' guniti le naca cazë'.

³⁷ Na'a, ca naca queë' Jesús na', Dios busubanë' Lë', ate' bití' guniti le naca cazë' lu yeru ba.

³⁸ Libí'ili', böcha'a, ral-la' inözili' lë' ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ni'a que le benë' Jesús ni.

³⁹ Na'a, Dios ruúnë' tsahui' yúgu'të nupa ta'yéajlë' Jesús, rugúë' yugu' dul-la' na' le cabí guca ugúa xibá queë' Dios, le bë'ë Moisés.

⁴⁰ Guli'gún chi'i cuinli' na'a para cabí gaca queéli' le nazúaj lu guichi le gula'nnë' bönni' gulu'ë' didza' uládz queë' Dios, le rnna caní:

⁴¹ Buli'yútsöca', libí'ili', bönni' cabí tunë' neda' bal. Ubánili', pero lu yöl-la' cabí réajlë' queéli' gátili'. Neda' guna' tu dxin dza ni zóali', en sal-la' nu uluí'i libí'ili' le ruluí'i dxin na', bití' ca' tséajlë'ëli'.

⁴² Cate' bulu'rúajë' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sëdë' queë' Dios, ní'irö bönachi ni' guláta'yu

lógicaquië' ulu'sëdinë' légaquië' ca naca lë ni cate' idxín ia'tú dza lá'ayi quégaquië'.

43 Cate' ni' bulu'rujé' lu yu'u na' bönni' nudúbigaquië' ni', zían bönni' judío, en bönni' nuhuöácagaquië' judío, yugu' bönni' ta'yéaj ládxi'gaquië' Dios, gulunë' tsözxön Pablo, en Bernabé. Chopë' ni' gulu'ilenë' légaquië' didza', en bulu'së'ë ládxi'gaquië' para ilácatica'së' tsutsu, ilunë' löza le ruzá' ládxi'ë Dios quégaquië'.

44 Ia'xunu' gubidza ca' cate' bidxín ia'tú dza lá'ayi quégaquië', bulu'dubë' látu'biqui' yúgutë bönachi lu yödzö na' para ila'yönnë' xtídzë'ë Dios.

45 Ní'irö bulu'zxé'enë' bönni' judío biti' ta'yéajlë'ë, cate' bila'lé'enë' bönachi zían na', ate' gula'nnë' que didza' ru'ë Pablo, en gula'dá'báguë'ë le.

46 Ní'irö lu yöl-la' rugu ladxi' quégaquië' Pablo, en Bernabé, gulë' yugu' bönni' judío na', ta'nnë':

—Ben bayudxi usiyöntu' libí'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' quežli' biti' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacua' bönachi izá'a.

47 Lësca' caní gunná bé'enë' Xanru' Dios netu' guntu' libán queë' Cristo lógaca bönachi izá'a, en naca ca rna didza' na' bë'ë Dios ca naca queë' Cristo, gunné':

Nuzóa' Li' para gacu' bení' quégaca bönachi izá'a, en gacu' Nu usölá bönachi idútë yödzöliö.

48 Cate' bila'yöni bönachi izá'a nacua' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgutë nupa ni' chinunë' Dios quéguequi gata' quéguequi yöl-la' na'bán idú.

49 Caní guca, guzë xtídzë'ë Xanru', ate' bila'yöni bönachi yúgu'të yödzö nacuá' luyú ni'.

50 Ní'irö bönni' judío biti' ta'yéajlë'ë na' gula'gú'u yöl-lë'ë yugu' bönni' lo que yödzö ni' para cabí ila'lé'enë' dxi'a Pablo, en Bernabé. Lësca' caní gula'gú'u yöl-lë'ë nigula lo ta'yéaj ládxi'nu Dios. Caní guca, gulunë' ga gula'bía ládxi'gaquië' Pablo, en Bernabé, ate' bulu'láguë' chopë' ni ní'ilö lu xiyúgaquië'.

51 Ní'irö Pablo, en Bernabé bulu'quínnajë' yu bëchtö da' la' lábagaquië' le ruluí'i nagá'ana xíguia' nabága'gaca bönachi lu yödzö na', ate' yójáquië' lu yödzö Iconio.

52 Bulu'dzéjanë' bönni' yödzö Antioquía na', bönni' ta'yéajlë'ë Xanru', ate' guzóalenë' Dios Bó Lá'ayi légaquië'.

14

Le gulunë' Pablo, en Bernabé lu yödzö Iconio

1 Cate' bila'dxinë' Pablo, en Bernabé yödzö Iconio, gula'yu'ë tsözxön lu yu'u ga tu'dubë' bönni' judío, en tu'sëdë' queë' Dios, ate' gulu'ë didza' ni'. Caní guca, zían bönachi judío, enca' zían bönachi izá'a gula'yéajlë' Cristo.

2 Ní'irö bönni' judío biti' ta'yéajlë'ë gula'gú'u yöl-lë'ë bal-lë' bönni' izá'a, para cabí ila'lé'enë' dxi'a böchi'ru' ta'yéajlë'ë Cristo.

3 Tu' gula'yéajlë' bönachi zían na' Cristo, gula'cu'ë Pablo, en Bernabé ni' zían dza, ate' lu yöl-la' rugu ladxi' gulu'ë xtídzë'ë Dios, tu' tu'zxöni ládxi'gaquië' Xanru'. Lë cazë' Xanru' bulu'e naca idütë' li didza' tu'ë ca naca le ruzá' ládxe'ë Dios quégaca bönachi,

tu' bē'ē légaquiē' lataj gulunē' yugu' le taca bē', en le tun ga tu'bani bönachi.

⁴ Ní'irö bönachi lu yödzö na' bila'rúaj choplö. Bal-lē' gula'dē'ē bönni' judío biti' ta'yéajlē'ē, ate' ia'bal-lē' gula'dē'ē Bernabé, en Pablo, gubáz na' nasöl-lē'ē Cristo.

⁵ Ní'irö bönni' judío biti' ta'yéajlē'ē na', en yugu' bönni' izá'a ni' gulunē' tuz bönni' ta'nná bé'enē' légaquiē', ate' bulu'dubē' para ilu'ē dö' quégaquiē' gubáz na' nasöl-lē'ē Cristo, en ulu'ladxē' légaquiē' guiöj.

⁶ Cate' téquibe'enē' Pablo, en Bernabé lē ni, bulu'zxúnnajē' ni', yöjáquiē' yödzö Listra, en Derbe luyú Licaonia, ate' gula'dödē' yúgu'tē yödzödo' idú gásibi'ilö ni',

⁷ gapa ni' gulunē' libán que didza' dxi'a ca naca queé' Cristo.

Tu'ladxē' Pablo guiöj lu yödzö Listra

⁸ Zoē' tu bönni' lu yödzö Listra biti' raca sē'ē. Rő'ösē' ni' tu' cabí rizē'ē cate' ni' guljē', en catu caz guzē'e ni'ē.

⁹ Bönni' ni ruzē náguiē' didza' ru'ē Pablo. Pablo buyüē' lē', en gúquibe'enē' réajlē'ē Cristo para huóáquiē'.

¹⁰ Ní'irö Pablo bē'ē zidzaj didza', en rē' lē':

—Guzuí.

La' guxítitē' bönni' na', en guzē'e ni'ē.

¹¹ Cate' yugu' bönni' Listra bila'lé'enē' lē na' benē' Pablo, gula'sí lógaquiē' tu'ē zidzaj didza' lu didza' tu'ē bönni' Licaonia na', ta'nnē':

—¡Yugu' dios bönni' ni! ¡Nuhuótjagaquiē' ga zóaru', en tu'luí'i cuíngaquiē' ca nácagaquiē' bönni'!

12 Gula'nné' Bernabé na' náquié' Júpiter, ca lë dios lo quégaquié', ate' gula'nné' náquié' Pablo Mercurio, ia'tú dios quégaquié'. Caní gula'nné' tu' ru'ë didza' Pablo ca na' ta'nné' runé' Mercurio na'.

13 Zoa yudo' que Júpiter ga ni' nacu'ë, cuita nōza ga ni' ta'yaza bōnachi lu yōdzō na'. La' bidxintë' bixúz que Júpiter na', nachë'ë-ba' yugu' bēdxi, en nu'ë ca' yugu' bregui' yōj, ate' dzágagaca bōnachi zían lë'. Gulë'ënnë' ilútië'-ba' bēdxi na' lógaquié' Pablo, en Bernabé para ila'yéaj lādxi'gaquié' légaquié' ca tunë' quégaca dios quégaquié'.

14 Cate' Bernabé, en Pablo, gubáz na' nasöl-lë'ë Cristo, guléquibe'enë' lë ni, gula'chözë' lari' nácugaquié'. Tu'huí'ininë' tu' tunë' bōnni' ni le cabí ral-la' ilunë', ate' gula'xíti'ë, en yōjcu'ë gatsaj lāhui'lō bōnachi zían na', en gulu'ë zidzaj didza', tē légaquié':

15 —¡Libí'ili' bōnachi! ¿Bizx que runli' caní? Lësca' bōnni' ca libí'ili' nácatu', en riguíxjöi'itu' libí'ili' lë ni caz ral-la' ucá'anali', le cabí nácate', para guéquili' queë' Dios ban. Dios ni benë' lúzxiba, en yōdzölió, en nísado', en yúgu'të le nacuá' tu tu lataj na'.

16 Yugu' iz chigula'dödi, gulún yúgu'të bōnachi ca rnnasō que queëguequi, ate' Dios biti' buzáguë'ë xinōzguequi,

17 pero benë' ga gulaca le tun ba nalí queë', yugu' le nácagaca dxi'a benë' quégaquié'. Risöl-lë'ë queëru' nisa guiōj, en runë' ga ta'yán le rázaru'. Ruzölaj rudzé'enë' rë'u, en runë' ga rudzeja lādxi'ru'.

18 Sal-la' Bernabé, en Pablo gulë' légaquié' caní, cánnisō bila'déli'në' bulu'záguë'ë xinōzguequi

bönachi zián na', para cabí ilútië'-ba' bëdxi na' lógaquië'.

19 Ní'irö bal-lë' bönni' judío biti' ta'yéajlë'ë, narúajgaquië' Antioquía, en Iconio, bila'dxinë' ni', ate' gula'gú'u yól-lë'ë bönachi zián na'. Ní'irö yúgu'të' bulu'ladxë' Pablo guiöj, en gulá'ayöjë' lë' ní'ilö ra' yödzö na', tu' téquinë' chinátië'.

20 Ní'irö bulu'dübë' yugu' bönni' ta'yéajlë'ë Cristo idú gásibi'ilö ga dë' Pablo. Guyasë' lë', en buázië' lu yödzö na'. Cate' za' rení' ia'tú dza, burúajlenë' Bernabé, yöjáquië' yödzö Derbe.

21 Lu yödzö ni' gulunë' libán que didza' dxi'a ca naca queë' Jesucristo, ate' bönachi zián ni' gula'yéajlë' Cristo. Gudödi ni' yöjhuöjgaquië' Lистра, en Iconio, en Antioquía.

22 Cate' gula'dödë' Bernabé, en Pablo yugu' yödzö na', bulu'tipë' ládxi'gaquië' bönni' ni' ta'yéajlë'ë Cristo, en bulu'së'ë ládxi'gaquië' ulu'gá'anë' tsutsu ca na' ta'yéajlë'ë Lë'. Gulë' légaquië':

—Rë'u tsaza cázaru' ga rinná bë'ë Dios, run bayudxi quí'i sáca'ru' zián le gaca queëru'.

23 Bulu'cu'ë yugu' bönni' gula ilún chi'ë bönachi queë' Cristo tu cö' huéaj bönachi ni' queë' Cristo. Cate' chiguluí'ilenë' Dios didza', en gulunë' gubasa, ní'irö gula'gu'ë légaquië' lu në'ë Xanru', Nu na' ta'yéajlë'ë.

Pablo, en Bernabé tu'dxinë' Antioquía luyú Siria

24 Ní'irö Pablo, en Bernabé gula'dödë' luyú Písidia, ate' bila'dxinë' luyú Panfilia.

25 Budxi gulunë' libán que xtídzë'ë Cristo lu yödzö Perge, yöjáquië' yödzö Atalia.

²⁶ Bulu'zě'ë ni', ate' gula'benë' tu lë'e barco, en bulu'dxinë' yödzö Antioquía, ga na' nacu'ë bönni' queë' Cristo, bönni' na' gula'sól-lë'ë légaquië' tsöjéngaquië' libán, cate' ni' gula'gu'ë légaquië' lu në'ë Dios, Nu na' ruzá' ladxi' quégaquië' ilunë' xichinë', dxin na' chibudxi gulunë'.

²⁷ Cate' ni' bulu'dxinë' Antioquía, bulu'dubi bönachi queë' Cristo nacuá' ni'. Ní'irö Pablo, en Bernabé bulu'siyönnë' légaquië' ca nácagaca le zxön benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca' Lë'.

²⁸ Pablo, en Bernabé bulu'gá'analenë' bönachi ni' ta'yéajlë' Cristo zían dza.

15

Tu'dubë' huen dxin queë' Cristo lu yödzö Jerusalén

¹ Ní'irö bal-lë' bönni' narúajgaquië' luyú Judea bila'dxinë' yödzö Antioquía, ate' bulu'sédinë' böchi'ru', bönni' izá'a ni', ta'nnë':

—Channö cabí irugu lu xipéla'li' ca nalëbitu' runtu' ca na' gunná bë'ë Moisés, bití' gaca uláli'.

² Ní'irö Pablo, en Bernabé gula'díl-lalenë' légaquië' didza', ate' gúcada' dzatsa. Gudödi ni', gula'böë' Pablo, en Bernabé len ia'bal-lë' bönni' böchi'ru' ni', para tsöjáquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi queë' Cristo ni', para iluí'ilenë' légaquië' didza' ca naca lë ni' raca, tu'sédinë' bönni' na' bönachi le nachixi.

³ Ní'irö yugu' bönni' queë' Cristo nacu'ë Antioquía bulu'gu'ë légaquië' nöza, ate' gula'dödë' lu xiyú yödzö Fenicia, en luyú Samaria, ate'

bulu'siyönnë' böchi' luzá'aru' yugu' lataj ni' ca guca, bulu'huöáquië' bönni' izá'a queë' Cristo. Lë ni ben ga bulu'dzéjanë' yúgu'të böchi' luzá'aru' ni'.

⁴ Cate' bila'dxinë' Pablo, en Bernabé lu yödzö Jerusalén, yugu' bönni' queë' Cristo nacu'ë ni', enca' yugu' gubáz nasöl-lë'ë Lë', en yugu' bönni' gula tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'.

⁵ Ní'irö gula'zuínë' bal-lë' bönni' yudo' fariseo, bönni' ta'yéajlë'ë Cristo, en ta'nnë':

—Run bayudxi irugu lu xipéla'gaquië' bönni' izá'a na' ta'yéajlë'ë Cristo, en inná bé'eru' légaquië' ilunë' ca rnna bë' xibá queë' Moisés.

⁶ Ní'irö bulu'dubë' gubáz nasöl-lë'ë Cristo len bönni' gula tapa chi'ë bönachi queë', para ulu'chi'a ulu'söröë' lë ni raca.

⁷ Gudödi gulu'ë zían didza', guzuínë' Pedro, en gudxë' légaquië':

—Libi'ili', böcha'a. Nöz quézili' ca guca dza ni'te, Dios gurö cazë' neda' para guna' libán lógaca bönachi izá'a para ila'yöni didza' dxi'a, en ila'yéajlë' Cristo.

⁸ Dios, Nu nunbë' caz le yu'u icja ládxi'do'gaca bönachi, buzöë' le naca bë' runë' légaquië' bal, gusöl-lë'ë Dios Bö' Lá'ayi quégaquië', ca na' gusöl-lë'ë Lë' queëru'.

⁹ Biti' butsé'ë ca benë' quégaquië', en queëru', en lësca' bunë' dxi'a icja ládxi'do'gaquië' tu' ta'yéajlë'ë Cristo.

¹⁰ Na'a, ¿bizx que run leli'-në' Dios, rusubága'li' yua' xiyéngaca böchi' luzá'aru'? Yua' ni, le naca

le ta'nná bē' xibá queē' Moisés, bití' guca guá'aru' rē'u, en bití' guca ilu'ē xuz xtó'oru' le.

¹¹ Rē'u ni, réajlě'ēru' nuláru' ni'a que le buzá' ládxe'ē Xanru' Jesús queēru', en ca na' nuláru' rē'u, ulu'lě' ca' légaquiē'.

¹² Cate' budxi bē'ē Pedro didza' ni, yúgu'tē' gula'cu'ē dxisō, ate' bulu'zē nágagaquiē' didza' gulu'ē Bernabé, en Pablo. Bulu'siyōnnē' légaquiē' yugu' le taca bē', en le tun ga tu'bani bōnachi, yugu' le benē' Dios lu ná'agaquiē' ga nacuá' bōnachi izá'a.

¹³ Cate' Bernabé, en Pablo budxi gulu'ē didza' ni, bubí'ē didza' Jacobo, gunné':

—Libí'ili', bōcha'a. Buli'zē nágali' le guía' libí'ili'.

¹⁴ Simón Pedro chigudíxjoi'i quézine' rē'u ca benē' Dios, bulu'e lahui yōl-la' huáca queē' le zí'alō luzuí lógaca yugu' bōnachi izá'a para bubéajē' quez queē' bōnachi nútsa'gaca ládjagaquiē'.

¹⁵ Ca naca lē ni rōjłōzgaca xtídza'gaquiē' bōnni' gulu'ē didza' uláz queē' Dios, ca na' nazúaj lu guichi lá'ayi, rna:

¹⁶ Dza tōdi lē ni huōda', en uchisa' Nu inná bē', bōnni' na' tsáziē' xilatjē' David.

Guna' ca run nu ruchisa tu yu'u naguinnaj.

Uchisa' ca' bōnachi ila'cuá' lidxē', nupa nagá'anagaca.

Guna' ca run nu ruchisa tu zō'ō yexu'.

Caní uchisa' le gunná bē'ē David

¹⁷ para ulu'guilaj ia'zica'rō bōnachi Xanru'.

Ulu'guilaj bōnachi izá'a Lē',

ate' sí' láguequi: Bōnachi Queē' Dios.

¹⁸ Caní rnnē' Xanru',

Nu na' dza ni'te ben ga naca bē' yúgu'tē lē ni.

19' Que lë ni na' runi neda' biti' ral-la' gun níguiru' bönachi izá'a, nupa tu'huóaca queë' Dios.

20 Ral-la' uzúajru' lu guichi quégaquië' ulu'cá'anë' yugu' le biti' ral-la' ilahuë', le nadödi lógaca budó' guió' budó' yaga, en cabí ilunë' le ruá' dö', en cabí ilahuë' xipéla'gacaba' böa' guixi' biti' narúaj-gácaba' rön, en cabí ilahuë' xichönba' bíti'tës böa' guixi'.

21 Dza ni'te nacuá' yúgu'të yödzo nupa tun libán lu yu'u gapa tu'dubë' bönni' judío, en tu'sedë' queë' Dios. Tunë' libán ni' que le buzúajë' lu guichi Moisés. Tu'laba cazë' le yugu' dza lá'ayi.

22 Ní'irö gula'yaza ládxi'gaquië' gubáz nasöl-lë'ë Cristo, en bönni' gula tapa chí'ë, en yúgu'të bönachi queë' Cristo, ila'böë' bal-lë' bönni' ládjagaquië', en ila'söl-lë'ë légaquië' Antioquía. Tsöjácalenë' Pablo, en Bernabé. Chopë' na' gula'böë', légaquië' Judas, zoa ia'tú lë' Barsabás, enca' Silas. Nácagaquië' bönni' lo ládjagaquië' böchi'ru' ni'.

23 Bulu'zúajë' lu guichi le bulu'dödë' lu ná'agaquië' ilu'ë, le rnna caní:

“Netu', gubáz nasöl-lë'ë Cristo, en bönni' gula tun chí'ë, en yugu' böchi'ru', rugápatu' libí'ili' Dios, böchi'tu', nácali' bönachi izá'a zóali' Antioquía, en yugu' yödzo luyú Siria, en Cilicia.

24 Biyönitu' ca tun bal-la bönachi bila'ruáj ga zóatu', nupa na' biti' nasöl-la'tu'. Dutsá'agaquië' libí'ili' len le ta'nnë', en tu'bequi böniga icja ládxi'do'oli', tu' ta'nná bë'ë irugu lu xipéla'li', en gunli' ca rinná bë' xibá queë' Moisés.

25 Que lë ni na' guyaza ládxi'tu' cate' chibén tuz xtídza'tu', gurötu' chopë' bönni', nupa isöl-la'tu'

para uduyúgaquië' libí'ili'. Guídlengaquië' Bernabé, en Pablo, nupa na' nadxí'iru'.

²⁶ Chiyöjáquië' Bernabé, en Pablo gapa guzóa bönadxi ilátië' tu' nadxí'iguequinë' Xanru' Jesu-cristo.

²⁷ Caní naca, risöl-la'tu' Judas, en Silas ga zóali'. Chopë' ni ulu'siyönnë' libí'ili' lë ni ruzúajtu' lu guichi ni.

²⁸ Dios Bö' Lá'ayi bulu'inë' netu' le raza ládxe'ë, en lësca' caní raza ládxi'tu' netu', bití' usubága'rötu' libí'ili' yua', le naca le rinná bë' xibá queë' Moisés, pero yugu' lë nisö run bayudxi gunli':

²⁹ Bití' gáguli' le nadödi lógaca budó' guiöj budó' yaga.

Bití' gáguli' rön.

Bití' gáguli' xipéla'gacaba' böa' guixi' bití' narúaj-gacaba' rön.

Bití' gunli' le ruá' dö'.

Channö gun chi'i cuinli' para gunli' ca rnna yugu' lë ni, gunli' dxi'a."

³⁰ Caní guca, yugu' bönni' na' nasöl-la'gaquië' bila'dxinë' Antioquía. Bulu'tubë' bönachi queë' Cristo nacua' ni', ate' gula'gu'ë guichi na' lu ná'agaquië'.

³¹ Cate' chibudxi bulu'labë' le, bulu'dzéjanë' ca naca le nazúaj lu guichi na', le ruhuë' tsahui' légaquië'.

³² Tu' nácagaquië' Judas, en Silas bönni' tu'ë didza' uláz queë' Dios bulu'huë' tsáhuë'ë légaquië', en bulu'tipë' ládxi'gaquië' böchi'ru' ni', bulu'gunë' dxin didza' zían le gulu'ilenë' légaquië'.

³³ Gudödi bulu'dzënë' Judas, en Silas ni' nababa dza, ní'irö böchi'ru' ni' bulu'zenë' légaquië' dxi'a

didza' para tsöjhuöajgaquië' Jerusalén ga nacu'ë bönni' gula'söl-lë'ë légaquië'.

³⁴ Guyaza ládxë'ë Silas bugá'anë' Antioquía.

³⁵ Bulu'gá'anë' ca' Pablo, en Bernabé Antioquía na', ate' bulu'sédinë' bönachi, en gulunë' libán que xtídzë'ë Xanru'. Lësca' caní gulún zíanrö ca' bönachi.

Risí lahuë' Pablo röjenë' libán le buropi luzuí

³⁶ Gudödi nababa dza Pablo gudxë' Bernabé:

—Uyéajru' leyúbölö tsöjyúgacaru'-në' böchi'ru' nacu'ë yúgu'të yödzo gapa chiyöjenru' libán que xtídzë'ë Xanru', para ilé'eru' nacxi raca quégaquië'.

³⁷ Gú'unnë' Bernabé ila'chë'ë-bi' bi'i Juan Marcos, tséajlenbi' légaquië',

³⁸ pero biti' guyaza ládxë'ë Pablo ila'chë'ë-bi' tséajlenbi' légaquië' tu' bulá'alenbi' légaquië' luyú Panfilia, en bití'rö yöjénlenbi' légaquië' dxin queë' Xanru'.

³⁹ Biti' guca tuz xtídzä'gaquië' Bernabé, en Pablo ga bidxintë bulu'lá'alenë' tuë' ia'tué'. Bernabé guchë'ë-bi' bi'i Marcos, ate' gula'benë' tu lë'e barco, yöjáquië' luyú Chipre.

⁴⁰ Pablo guröë' Silas para tséajlenë' lë'. Ní'irö yugu' böchi'ru' gula'gu'ë légaquië' lu në'ë Xanru', en gula'nábinë' Lë' uzá' ládxë'ë quégaquië', ate' bulu'zë'ë Pablo, en Silas ni'.

⁴¹ Gula'dödë' yugu' yödzo luyú Siria, en Cilia, ate' bulu'tipë' láchxi'gaca bönachi queë' Cristo nacua' ni'.

16

Bi'i Timoteo runbi' tsözxön Pablo, en Silas

¹ Gudödi ni' bila'dxinë' Pablo, en Silas yödzo Derbe, en yödzo Listra. Zóabi' tu bi'i bönni' ni', réajlë'ëbi' Cristo, lëbi' Timoteo. Nácabi' xz'íninu tu nigula judío réajlë'ënu Cristo, pero xúzibi' biti' náquië' judío.

² Yugu' böchi'ru' nacu'ë Listra, en Iconio tunë ba nali queëbi', ta'nnë' runbi' le naca dxi'a.

³ Gú'unnë' Pablo tséajlenbi' bi'i ni lë', ate' gudélë'ë-bi', en guchúguië' lu xipéla'bi' ca tun bönachi judío. Caní benë' para cabí ila'nnë' queëbi' bönni' judío nacu'ë yugu' yödzo ni', tu nöziguequinë' yúgu'të' xúzibi' biti' náquië' judío.

⁴ Cate' Pablo, en nupa dzágagaca lë' gula'dödë' gapa nacua' yödzo ni', tu tu yödzo na' bulu'dödë' lu ná'agaquië' yugu' böchi'ru' nacu'ë gapa ni' yugu' xibá na' gulunë' gubáz nasól-lë'ë Cristo, en bönni' gula tapa chi'ë bönachi queë', nacu'ë Jerusalén. Bulu'dödë' yugu' xibá ni lu ná'agaquië' para ilunë' ca rinná bë' xibá na'.

⁵ Caní guca, bönachi yúgu'të cö' bönachi queë' Cristo bila'dipa ládxi'gaca ca naca le réajlë'ëru' Cristo, ate' gula'yán tu tu dza.

Tu bönni' Macedonia rulidzë' Pablo lu yëla bëchigal

⁶ Pablo, en bönni' dzágagaquië' lë' gula'dödë' luyú Frigia, en luyú Galacia, tu' buzáguë'ë Dios Bö' Lá'ayi xinözgaquië', para cabí ilunë' libán que xtídzë'ë Xanru' luyú Asia.

⁷ Cate' bila'dxinë' luyú Misia, gul'ënnë' tsöjáquië' luyú Bitinia, pero Dios Bö' Lá'ayi, Nu risól-lë'ë Jesús queëru', biti' bë'ë légaquië' lataj.

⁸ Ní'irö gula'dödë' gala' ga dë Misia, ate' yöjáquië' lu yödzö Troas. Neda' Lucas, ruzúaja' lu guichi lë ni, guzóa' Troas na', ate' yöjsóalena'-në' Pablo.

⁹ Lu yödzö ni' Dios buluí'inë' Pablo tu le bilé'enë' lu yëla bëchigal. Tu bönni' Macedonia buluí'i lahuë' lë', zuínë', en ráta'yuë' lahuë' Pablo, rnnë': "Gudödi ladztu', lu xiyú Macedonia, en gúcalen netu'."

¹⁰ Cate' bilé'enë' Pablo lë ni, lë na' buluí'i lahui lë', la' bë' ládxi'tëtu' tséajtu' luyú Macedonia, tu' gúquibe'etu' Dios chibulídzë' netu' tsöjentu' libán que didza' dxi'a lógaca bönachi luyú ni'.

Le gulunë' Pablo, en Silas lu yödzö Filipos

¹¹ Ní'irö gurentu' lë'e barco, en buzá'atu' Troas. Gudöditu' líra' ga bidxintu' yödzö Samotracia, ate' gudödi ia'tú dza bidxintu' yödzö Neápolis.

¹² Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsölá'a ni' luyú Macedonia. Lu yödzö ni' yugu' bönni' Roma nucuá'agaquië' bönachi uládz quégaquië'. Lu yödzö nisö guzóatu' nababa dza.

¹³ Cate' bidxín tu dza lá'ayi, birúajtu' lu yödzö, en guyéajtu' ra' yegu ga na' tu'dubi caz bönachi yödzö na', en tu'lidza Díos. Gurö'ötu' ni', en busiyöntu' yugu' nigula nudúbigacanu ni' ca naca xtídzë'ë Xanru'.

¹⁴ Nútsa'nu ládjegacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládxi'nu Dios, ate' buzë náganu didza' ru'ë Pablo, ate' Xanru' gúcalenë'-nu para guzxí' lu ná'anu didza' na' bë'ë.

15 Ní'irö bidílanu lënu nisa, ate' gula'dila ca' nisa bönachi nacuá' lídxinu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

16 Ia'tú le guca tu dza tsanni ni' zéajtu' ga na' rulidztu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinnë yá'abi'. Len yöl-la' rinnë ya'a queëbi' runbi' ga ta'zídë'ë dumí yugu' bönni' xanbi'.

17 Bi'i nigula ni' sudunóbi'-në' Pablo, en netu', ru'íbi' zidzaj didza', rnnabi':

—¡Yugu' bönni' ni tunë' xichinë' Dios nayépisëtëre'! ¡Tu'siyönnë' libí'ili' naca gaca uláli'!

18 Caní benbi' zían dza. Cate' bítirö guyaza ládxë'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' li'. ¡Burúaj icja ládxi'do'obi' bi'i nigula ni!

La' ní'isö burúajtë bö' na'.

19 Cate' bila'lé'enë' xanbi' chiburúaj bö' na' run ga rinnë yá'abi', en bítirö naca löza ila'zi'ë dumí ni'a queëbi', que lë ni na' gula'zönë' Pablo, en Silas, ate' gula'ché'ë légaquië' lógaquië' bönni' yúlahui', nudúbigaquië' ga naca lu yë'ëyi.

20 Bulu'cu'ë légaquië' lógaquië' bönni' yúlahui' na', ta'nnë':

—Yugu' bönni' ni nácaquië' judío, en tunë' ga tu'tsatsa bönachi yödzö ni.

21 Tu'sëdinë' le cabí ral-la' si' lu ná'aru', en bití ral-la' gunru', tu' nabábaru' Roma.

22 Ní'irö bö'nachi zían ni' gula'dá'baga' Pablo, en Silas, ate' yugu' bönni' yúlahui' gula'nná bé'enë' nupa gula'lecja lari' nácugaquië' Pablo, en Silas, ate' gula'guinë' légaquië' gubá'ayi.

23 Gudödi gula'guindë'ë légaquië', gula'gu'ë légaquië' lidxi guié. Gula'nná bé'enë' bönni' rusayjë' lidxi guié na' gun chí'idë'ë légaquië'.

24 Bönni' ni, cate' chigula'nná bé'enë' lë' caní, gulu'ë légaquië' lu yu'u lë'e dxi' lidxi guié na', en gulu'ë ní'agaquië' yeru yaga ta'zön ní'agaquië'.

25 Idú guluhuëla Pablo, en Silas tu'lidzë' Dios, en tul-lë' yöl-la' ba queë' Dios, ate' ta'yönnë' yugu' bönni' nadzúngaquië' lidxi guié na'.

26 Ní'irö tsárido'os gudödi budó' zxu' bach. Caní guca ga bidxintë guzxizi xilibi zö'ö lidxi guié na', ate' la' gula'yáljatë yúgu'të gapa nu riyaza, ate' bulu'huédxi ca' yugu' du guié nága'gaca bönni' nadzúngaquië' ni'.

27 Bubanë' bönni' na' rusayjë' lidxi guié. Cate' bilé'enë' nayáljagaca gapa nu riyaza lidxi guié na', gulecjë' guié tuchi' queë' para guti cuinë', tu' réquinë' chibulu'zxúnnajë' bönni' nadzúngaquië' lidxi guié na'.

28 Ní'irö Pablo zidzaj bulidzë' lë', gunnë':

—¡Biti' bi gúni cuinu', tu' zóatu' ni yúgu'tëtu'!

29 Ní'irö bönni' na' gunabë' guí, ate' gudá'atë' lu yu'u lidxi guié na'. Guzxíidë'ë lu yöl-la' radxi, ate' biyéchuë' xiní'agaquië' Pablo, en Silas.

30 Cate' chinubéajë' légaquië' lidxi guié na', gudxë' légaquië':

—Libi'ili', bönni', ¿bizxi ral-la' guna' para ulá'?

31 Légaquië' të' lë':

—Guyéajlë'ë Xanru' Jesucristo, ate' uló' li', en lësca' caní ulu'lágaca bönachi nacuá' lidxu'.

³² Guluí'ilenë' lë' didza' ca naca xtídzë'ë Xanru', dzágagaca lë' yúgu'të bönachi nacuá' lidxë'.

³³ La' ná'asö, ni' naca chi'i dzö'ölo la' guchë'të légaquië', ate' yöjtibë' légaquië' ga dxíagaquië' huë'. Gudödi ni', la' bidílatë' nisa, ate' gula'dila ca' nisa yúgu'të bönachi nacuá' lidxë'.

³⁴ Ní'irö guchë'ë légaquië' lidxë', en bë'ë le gulahuë'. Rudzéjanë' lë', en tu'dzeja ca' yúgu'të bönachi nacuá' lidxë' tu' ta'yéajlë'ë Dios.

³⁵ Cate' za' rení' dza na', yugu' bönni' yúlahui' gula'söl-lë'ë ni'a ná'agaquië', ate' gulë' bönni' na' rusayjë' lidxi guié:

—Busán-gáquië' bönni' na'.

³⁶ Ní'irö bönni' na' rusayjë' lidxi guié gudíxjöi'inë' Pablo didza' ni, gunné':

—Gula'söl-lë'ë bönni' yúlahui' didza' usana' libí'ili'. Na'a, guli'rúaj, en buli'huöaj dxí'ado' ga rizóali'.

³⁷ Ní'irö birúajë' Pablo, en gudxë' yugu' ni'a ná'agaquië' bönni' yúlahui' na', gunné':

—Chigula'guinë' netu' lógaca bönachi sal-la' bití' narúguini queëtu' ca rinná bë' xibá, en gula'gu'ë netu' lidxi guié, ate' netu' ni nabábatu' Roma. ¿Naru' tu'santsë' netu' bagáchi'sö? ¡Bití' ca' gaca! ¡Ilídigarë' légaquië' udusángaquië' netu'!

³⁸ Yöjhuöjgaquië' ni'a ná'agaquië' bönni' yúlahui' na', en bulu'siyönnë' yugu' bönni' yúlahui' didza' ni, ate' légaquië' guládxinë' cate' bila'yönnë' nabábagaquië' Pablo, en Silas Roma.

³⁹ Cate' bila'dxinë' lidxi guié ni', guláta'yuë' lógaquië' Pablo, en Silas cabí ulu'subáguëë' légaquië' xíguia'. Ní'irö gula'béajë' légaquië' lidxi guié na', en guláta'yuë' lógaquië' ulu'rúajë' yödzö na'.

⁴⁰ Ní'irö bila'rúajë' Pablo, en Silas lidxi guié na', ate' gula'yázië' lídxinu Lidia. Cate' chibila'lé'enë' böchi'ru' nacu'ë ni', bulu'chízië' didza' icja nágagaquië', en la' bulu'zá'atë' ni'.

17

Yugu' bönachi Tesalónica tunë' dzatsa

¹ Gula'dödë' Pablo, en Silas lu yödzö Anfípolis, en lu yödzö Apolonia, ate' bila'dxinë' lu yödzö Tesalónica, ga ni' zoa tu yu'u ga tu'dubë' bönni' judío, en tu'sëdë' queë' Dios.

² Bugá'anë' Pablo ni' idú galaj dza, ate' ca run cazë', guyijë' ga zoa yu'u na' cate' naca dza lá'ayi quégaquië' bönni' judío, ate' bé'lenë' légaquië' didza'.

³ Buchila lá'anë', en bulu'inë' légaquië' rusëdi le nazúaj lu guichi lá'ayi run bayudxi qui'i sáquëë' Cristo, Bönni' na' tunë' löza bönni' judío udusölë' légaquië', ate' tödi gátië' ubanë' lu yöl-la' guti. Ní'irö Pablo gudxë' légaquië':

—¡Caní guca queë' bönni' na' lë' Jesús, runa' libán queë' ga ni zóali'! ¡Bönni' ni náquië' Cristo!

⁴ Ní'irö bal-lë' gula'yéajlë'ë Cristo, ate' gulunë' tsözxön Pablo, en Silas. Lësca' caní zían bönni' izá'a, bönni' ta'yéaj ládxi'gaquië' Dios, gula'yéajlë'ë Cristo. Lësca' zían nigula lo gula'yéajlë'ënu Cristo.

⁵ Ní'irö yugu' bönni' judío biti' ta'yéajlë'ë, lu yöl-la' ruzxé'e quégaquië' Pablo, bulu'tubë' yugu' bönni'

biti' nácaqaquië' tsahui', bönni' ta'dasë' ca'. Cate' chibulu'tübë' bönachi zián, gulunë' ga gulún dzatsa idú lu yödzö na', ate' bayudxi gula'yázië' lidxë' Jasón para ulu'béajë' Pablo, en Silas lógaca bönachi na' tun dzatsa.

⁶ Cate' biti' bulu'dzölinë' Pablo, en Silas, gula'béajë' Jasón, en ia'zica'rë' böchi'ru' nacu'ë ni', ate' gula'chë'ë légaquië' lógaquië' bönni' yúlahui'. Gulu'ë zidzaj didza', ta'nnë':

—Yugu' bönni' na' nutsá'gaquië' bönachi iduté yödzölió chibila'dxinë' ca' ni.

⁷ Jasón ni gulu'ë légaquië' lidxë'. Yúgu'të bönni' ni ta'dá'baguë'ë xibá queë' César, bönni' rinná bé'enë' rë'u, ta'nnë': “Zoë' ia'tué' bönni' rinná bë'ë, lë Jesús.”

⁸ Cate' bila'yönnë' yugu' bönni' lu yödzö, en yugu' bönni' yúlahui' na' lë ni, gula'bö'ë böniga.

⁹ Ní'irö, gudödi gula'zi'ë bönni' yúlahui' dumí le bulu'cá'anagarë' Jasón, en ia'zica'rë' bönni' na', bulu'sanë' légaquië'.

Le gulunë' Pablo, en Silas lu yödzö Berea

¹⁰ Ní'irö yugu' böchi'ru' ni' la' gula'söl-la'të' Pablo, en Silas, ni' naca chi'i dzö'ölö, ate' söjáquië' yödzö Berea. Cate' bila'dxinë' ni', gula'yázië' lu yu'u ga tu'dübë' bönni' judío nacu'ë ni', en tu'sëdë' queë' Dios.

¹¹ Gulácarë' tsahui' bönni' ni ca bönni' nacu'ë Tesalónica, tu' gula'zì' lu ná'agaquië' xtídzë'ë Xanru' idú lądxi'gaquië'. Yugu' dza bulu'labë' dxi'a le nazúaj lu guichi lá'ayi, para iléquibe'enë' channö nácatë' lë na' rnnë' Pablo.

12 Caní guca, zián bönni' judío gula'yéajlëë Cristo. Lësca' caní, zián bönni' izá'a, yugu' nigula lo, en yugu' bönni' gula'yéajlëë Cristo.

13 Ní'irö cate' guléquibe'enë' bönni' judío nacu'ë Tesalónica, lësca' riguíxjö'ë Pablo xtídzë'ë Dios lu yödzö Berea, yöjáquië' ni', en gulunë' ca' ni' ga gulún dzatsa bönachi zián.

14 Ní'irö yugu' böchi'ru' ni' la' gula'söl-la'të' Pablo, para tsejë' ga naca ra' nísado', pero bulu'gá'anasë' Silas, en bi'i Timoteo lu yödzö Berea.

15 Yugu' bönni' Berea na' gula'chë'ë Pablo lu yödzö Atenas. Ní'irö la' yöjhuöjgacatë' lu yödzö Berea, tu'ú'ë xtídzë'ë Pablo, para ilë' Silas, en bi'i Timoteo, tsöjácátë' ga ni' zoë' Pablo.

Le benë' Pablo lu yödzö Atenas

16 Tsanni ni' zoë' Pablo ribözë' Silas, en bi'i Timoteo, lu yödzö Atenas, ruhu'ini ládxë'ë tu' rilé'enë' ta'yéaj ládxi'gaca yúgu'të bönachi yödzö na' yugu' budó' guiój budó' yaga.

17 Que lë ni na' bé'lenë' bönni' judío, en bönni' ta'yéaj ládxi'gaquië' Dios didza' ga naca lu yu'u ga tu'dubë' tu'sëdë' queë' Dios. Yugu' dza bé'lenë' nupa ta'dá lu yë'ëyi didza' ca naca xtídzë'ë Cristo.

18 Bal-lë' bönni' dá'gaquië' le tu'sëdinë' bönni' epicúreo, en le tu'sëdinë' bönni' estoico gulu'ilenë' Pablo didza'. Bal-lë' gula'nnë':

—¿Bizxi rë'ënitsenë' innë' bönni' huë' didza' ni?

Ia'bal-lë' gula'nnë':

—Réquitu' náquië' nu run libán quégaca dios zi'tu'.

Caní gula'nnë' tu' runë' libán Pablo lógaquië' que didza' dxi'a queë' Jesús, en que yöl-la' rubán.

19 Ní'irö gula'guélë'ë në'ë Pablo, en gula'chë'ë lë' lu guí'a ga tu'dubë' tu'ë didza', nazi'i le Areópago, ta'nnë':

—¿Naru' huácatsö yõnitu' didza' cubi ni rusiyõnnu' netu'?

20 Rusiyõnnu' netu' le tun ga rubánitu'. Ré'ënitü' inõzitu' bizxi rna didza' ni ru'u.

21 Bítirö ta'yaza lãdxi'gaquië' ilunë' bönni' Atenas na', en bönni' izá'a nacu'ë ni', pero ila'yõnisiinë', en iluí'isë' didza' tu le cubi.

22 Ní'irö guzuínë' Pablo gatsaj láhui'lö lö'a Areópago na', gunnë':

—Bönni' Atenas, yúgu'të le rilé'eda' naca bë' reaj lãdxi'da'alí' yugu' dios queëli'.

23 Cate' gudöda' lu yödzö, en buyúgaca' yugu' le reaj lãdxi'li', yöjxáca'a ca' tu nichu ga ni' nazúaj le rna caní: "Tu Dios, Cuntu Nu Nunbë' Lë'." Dios na' reaj lãdxi'li'-në' sal-la' biti' núnbë'ëli'-në', Dios ni runa' libán queë' loli'.

24 '¡Dios ni benë' yödzölió, en yúgu'të le nacuá' yödzölió ni! ¡Náquië' Xani yehua' yubá, en Xani luyú ni, en biti' ca' zoë' tu yudo' núngaca bönachi!

25 Biti' bi riyadzaj queë' le gaca ulu'nödzaj bönachi, tu' runödzjë' Lë' cazë' quégaca yúgu'të bönachi yöl-la' na'bán, en yúgu'të le riquíniru'.

26 'Lë' benë' tuzë' bönni' ga zá'gaca yúgu'të bönachi izá'a para ila'cuá' idú yödzölió, en bulu'e dza ila'cuá', en gapa ral-la' ila'cuá'.

27 Dios bucu'ë légaquië' para ulu'guiljë' Lë', channö nácati'tës ila'dzölinë' Lë' sal-la' ila'gán ila'zönsë'. Caní raca sal-la' biti' zoë' zi'tu' ga zóaru' tu turu'.

28 Lë cazë' runë' ga zóaru' nabanru', en bi gaca gunru', en le nácaru'. Naca ca na' gula'nnë' bal-lë' bönni' nútsa'gaquië' libí'ili', nupa bulu'zúaj le do' rúl-lali', le ta'nná: "Di'a dza queë' Dios nácaru'."

29 Na'a, channö nácaru' di'a dza queë' Dios, biti' ral-la' innaru' náquië' Dios ca tu budó' guiöj budó' yaga, o tu le néquini oro, o plata, o guiöj, le núngaca bönachi ca naca tu le ta'guínnajsö ícjaguequi.

30 Dios budödë' cá'asö yugu' le gulunë' lu yöl-la' biti' réajni'í quégaquië' yugu' iz chigula'dödi, pero na'a rinná bé'enë' yúgu'të bönachi idútë yödzölió ulu'bí'í ládxi'gaca.

31 Dios chinulu'ë tu dza cate' uchi'a usöröë' yúgu'të bönachi. Idú tsahui' naca ca uchi'a usöröë' légaquië' lu në'ë Jesús, bönni' na' buzóa cazë' Lë', ate' lógaca yúgu'të bönachi benë' tsutsu gaca caní tu' busubanë' Lë' lu yöl-la' guti.

32 Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjë' bal-lë', ate' ia'bal-lë' gula'nnë':

—Yöniguëtu' ia'tú lë ni ru'u didza' que.

33 Ní'irö burúajë' Pablo gatsaj láhui'lö ga na' nacu'ë, söhuöjë'.

34 Bal-lë' gula'yéajlë'ë Cristo, en gulunë' tsözxön Pablo. Nútsë'ë Dionisio, bönni' areópago, ládjagaquië', ate' nútsa'nu ca' ládjagaquië' nigula na' lënu Dámaris. Ia'bal-lë' na' gula'yéajlë'ë ca' Cristo.

18

Le benë' Pablo lu yödzö Corinto

1 Gudödi guca lë ni, buzë'ë Pablo yödzö Atenas na', ate' guyijë' yödzö Corinto.

² Yöjxáquië' Aquilo, tu bönni' judío ni'. Guljë bönni' ni luyú Ponto, en si' bidxíngazë' yödzo Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajë' yúgu'të bönni' judío yödzo Roma. Guyijë' Pablo ga nacué Aquilo, en Priscila na'

³ tu' naca tuz dxin tunë' Aquilo, en Pablo. Bugá'analenë' légaquië', ate' tsözxón gulunë' dxin, tunë' yugu' yu'u guídido'.

⁴ Cate' nácagaca dza lá'ayi quégaquië' bönni' judío, razië' Pablo lu yu'u ga tu'dubë' tu'sëdë' queë' Dios, ga ni' bë'lenë' légaquië' didza'. Gú'unnë' uluí'në' yugu' bönni' judío, en yugu' bönni' izá'a nacué ni', naca idútë li le riguíxjö'ë ca naca queë' Jesucristo.

⁵ Cate' bila'dxinë' Silas, en bí'i Timoteo ni', nuzá'agaquië' luyú Macedonia, nugu'ide'enë' Pablo, runë' libán que xtídzë'ë Dios, en runë' ba nalí lógaquië' bönni' judío, rnnë':

—Jesús náquië' Cristo, Nu na' tunë' löza yugu' bönni' judío udusölë' légaquië'.

⁶ Cate' bönni' judío nacué ni' gula'dá'báguë'ë xtídzë'ë, en gula'nnë' zi'ë que, ní'rö Pablo gudxibë' lari' nácuë' para uluí'në' légaquië' bíti'rö nabáguë'ë lë' ni'a quégaquië', ate' gudxë' légaquië':

—La' cuínsili' nabága'li' xíguia' que yöl-la' guti queë'li', calëga neda' nabága'a le. Na'a, uyija' ga nacúa' bönachi izá'a.

⁷ Ní'rö burúajë' Pablo ni', en guyijë' lidxë' Justo, bönni' reaj ládxë'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sëdë' queë' Dios.

⁸ Crispo, bönni' lo que yu'u ga na' tu'dubë' tu'sëdë' queë' Dios guyéajlé'ë Xanru' Jesús, ate' dzágagaca lë' yúgu'të bönachi nacúa' lidxë'. Cate'

bila'yönnë' xtídzë'ë Dios, zián bönni' Corinto gula'yéajlë'ë Cristo, ate' gula'dilë' nisa.

⁹ Ní'irö Lë cazë' Xanru' gudxë' Pablo lu yëla bëchigal, gunnë':

—Biti' gádxinu', en biti' su' dxisö, quíxjö'u xtídza'a,
¹⁰ tu' zóalen caza' neda' li', ate' cuntu nu uzapa' në'e li' para guá' dö' quiu', tu' néquiquequi quia' bönachi zián lu yödzö ni.

¹¹ Bugá'anë' Pablo ni' idú ca tu iz yu' gatsaj, ate' busédinë' légaquië' xtídzë'ë Dios.

¹² Cate' bidxín dza rinná bë'ë Galión luyú Acaya, guláquië' tuz bönni' judío bití ta'yéajlë', ate' gula'dá'báguë'ë Pablo, en gula'chë'ë lë' ga rö'ë ruchí'a rusöröë' Galión na'.

¹³ Gulë' Galión na':

—Bönni' ni rigú'u yöl-lë'ë bönachi para ilunë' bal Dios, ca ridá'baga' xibá queëtu'.

¹⁴ Cate' chizóa gu'ë didza' Pablo, Galión na' gudxë' yugu' bönni' judío, rnnë':

—Libí'ili', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzë naga' xtídza'li' ca ral-la' guna',

¹⁵ pero channö naca didza' bizxaj que dídza'sö, o que lágaca bönachi, en ca naca xibá queézili', guli'cá'ana tsahui' libí'isili', tu' cabí rë'ënda' neda' gaca' nu uchi'a usörö yugu' le caní.

¹⁶ Ní'irö Galión bulágui'ë légaquië' lu yu'u yúlahui'.

¹⁷ Ní'irö yúgu'të bönni' uládz na' gula'guélë'ë Sóstenes, bönni' lo que yu'u ga tu'dubë' bönni' judío, en tu'sëdë' queë' Dios, ate' gula'guínë' lë' lö'a yúlahui', pero bití'bë' ládxë'ë Galión lë' na' raca.

18 Pablo bugá'anë' lu yödzö na' zían dza, ate' gudödi busiyönnë' böchi'ru' nacu'ë ni' didza', gуйijë' yödzö Cencrea, ga ni' benë' yútusö icjë', tu' dë tu le nazi' lu në'ë lahuë' Dios gunë'. Ní'irö gurenë' tu lë'e barco, para tsejë' luyú Siria, dzágagaquië' lë' Priscila, en Aquilo.

19 Cate' bila'dxinë' yödzö Éfeso, Pablo bulá'alenë' légaquië' ni'. Guyázië' lu yu'u ga tu'dubë' bönni' judío, en tu'sedë' queë' Dios, ate' bë'lenë' nupa nacua' ni' didza'.

20 Yugu' bönni' ni' guláta'yuë' lahuë' Pablo ugá'analënë' légaquië' ia'lati' xidzé, pero lë' biti' gu'unnë'.

21 Bë'lenë' légaquië' didza', gunnë':

—Run bayudxi soa' gapa' laní si' gaca Jerusalén, ate' leyúbölö huöda' ga ni zóali', channö guë'ennë' Dios.

Ní'irö gurenë' Pablo tu lë'e barco, en buzë'ë Éfeso na'.

Ridxinë' Pablo Antioquía, ate' risí lahuë' röjenë' libán le bunni luzuí

22 Gudödi bidxinë' Pablo yödzö Cesarea, gurenë' gуйijë' Jerusalén, ga ni' yöjyüë' bönachi queë' Cristo, ate' ní'irö buzë'ë ni', en gуйijë' Antioquía.

23 Gudödi zoë' ni' nababa dza, buzë'ë ni', sa'yéajë' tu tu yödzö luyú Galacia, en Frigia. Benë' tsutsu böchi'ru' nacu'ë ni' ca naca le ta'yéajlë'ë Cristo.

Runë' libán Apolos lu yödzö Éfeso

24 Tu dza ni' bidxinë' Apolos, tu bönni' judío lu yödzö Éfeso. Guljë' bönni' ni lu yödzö Alejandría, en nabé'ede'enë' ru'ë didza', en nazëdadë'ë le nazúaj lu guichi lá'ayi.

25 Chinazädë' bönni' ni ca naca le réajlë'ëru' Xanru'. Idú ládxë'ë bë'ë didza', en ca nácatë busédinë' bönachi ca naca queë' Jesús, sal-la' núnbë'ë tuz le ruquíla bönachi nisa ca benë' Juan.

26 Gusí lahuë' Apolos ru'ë didza' idú ládxë'ë ga naca lu yu'u ga tu'dubë' bönni' judío, en tu'sëdë' queë' Dios. Cate' Priscila, en Aquilo bila'yönnë' didza' ru'ë Apolos na', gula'chë'ë lë' quez, en bulu'zéajni'irönë' lë' xibá queë' Dios.

27 Cate' gú'unnë' Apolos tödë' luyú Acaya, bulu'tipë' ládxë'ë, ate' bulu'zúajë' tu lu guichi le tsöjuá'gaquië' quégaquië' bönni' teaj ládxë'ë Cristo luyú Acaya na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zí'dë'ë xibé didza' ru'ë Apolos na', tu' ruzá' ládxë'ë Dios quégaquië'.

28 Caní guca, tu' bucul-lë' Apolos na' yugu' bönni' judío ni' lógaca yúgu'të bönachi, tu' bugunë' dxin le nazúaj lu guichi lá'ayi, en bulu'e bönni' na' Jesús naca cazë' Cristo.

19

Le benë' Pablo lu yödzö Éfeso

1 Tsanni ni' zoë' Apolos lu yödzö Corinto, gudödë' Pablo gapa nacua' yödzö ia'lati' ra'lö, ate' bidxinë' Éfeso. Yöjxáquië' bal-lë' bönni' ta'yéajlë'ë Cristo ni'.

2 Pablo gunábinë' légaquië', rnnë':

—¿Naru' hidisóalenë' Dios Bö' Lá'ayi libí'ili' cate' ni' guyéajlë'ëli' Cristo?

Gulë' lë':

—Biti' nayönitu' channö zoë' Dios Bö' Lá'ayi.

3 Ní'irö Pablo gunábinë' légaquië', rnnë':

—¿Nacxi guca le bidílalí' nisa?

Ta'nně':

—Ca buquílě' Juan bönachi nisa.

⁴ Pablo gunně':

—Buquílě' Juan bönachi nisa, nupa ni' bulu'bí'i ládxi'guequi, ate' Juan caz gudxě' léguequi ral-la' ila'yéajlě' Bönni' na' si' zá'tělě' ca lě', ate' Bönni' ni naquiě' Jesús, Lě' Cristo.

⁵ Cate' yugu' bönni' na' bila'yönně' didza' ni ru'ě Pablo, bila'dilě' nisa tu' chita'yéajlě'ě Xanru' Jesús.

⁶ Cate' guxóa ně'ě Pablo légaquiě', en ni' rulidzě' Dios, bidisóaleně' Dios Bő' Lá'ayi légaquiě', ate' gulu'ě didza' yúbölö, en gulu'ě didza' uláz queě' Dios.

⁷ Guláquiě' bönni' ni idú chínnuě'.

⁸ Guzóě' Pablo idú ca tsonna beo' ni', ate' guyáziě' lu yu'u ga tu'dubě' bönni' judío, en tu'sedě' queě' Dios, ate' lu yöl-la' rugu ladxi' beně' libán lógaquiě'. Bě'leně' légaquiě' didza', en gú'unně' uluí'ně' légaquiě' nácatě le riguíxjö'ě ca rinná bě'ě Dios.

⁹ Ní'irö bizídi icja ládxi'do'gaquiě' bal-lě', en bití' gula'yéajlě'ě Cristo, ate' gula'nně' zi'ě que xtídzě'ě Xanru' ga nacuá' bönachi zían na'. Ní'irö Pablo bulá'aleně' légaquiě', ate' bubéajě' quez nupa ta'yéajlě' Cristo. Bě'leně' bönachi ni ta'yéajlě' Cristo didza' yugu' dza ga na' tu'dubě' lu yu'u ga rusédině' Tiranno bönachi.

¹⁰ Caní béntica'sě' Pablo idú ca chopa iz, ate' caní guca, bila'yöni yúgu'tě bönachi didza' ca naca queě' Xanru' Jesús, bönachi nacu'ě yugu' yödzö luyú Asia, bönachi judío, en bönachi iza'a.

11 Dios benë' yugu' yöl-la' huáca zxön lu në'ë Pablo.

12 Caní guca, bal-lë' bönni' gula'zi'ë yugu' lári'do' béguë'ë icjë' Pablo, en yugu' lari' tsölá'a bugalë' lë'ë, ate' yöjuá'gaquië' léguequi gapa nacuá' nupa te'e, ate' bulu'huóáquië' ca naca yödzöhuë' que queégaquië', en bulu'rúaj bö' xihui' yú'ugaca bönachi na'.

13 Ní'irö bal-lë' bönni' judío udá dzaga tu'béajë' bö' xihui' gulë'ënnë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca bönachi, ta'nnë':

—Ni'a que Lë' Jesús, Nu na' runë' libán que Pablo, rinná bé'etu' libí'ili' urúajli'.

14 Caní gulunë' gadxi bönni' zxí'inë' Esceva, tu bönni' judío náquië' bönni' lo ladjagaquië' bixúz unná bé'.

15 Bubí'i didza' bö' xihui' na', gunná:

—Núnbë'a-në' Jesús, en núnbe'eda' bönni' lë' Pablo, pero libí'ili', ¿núzxitë libí'ili'?

16 Ní'irö guxíti'ë bönni' na' yu'u lë' bö' xihui', yöjenë' légaquië' zi', en bucul-lë' yúgu'të', tu' guzxéqui'rönë' ca légaquië'. Caní guca, xiguídigacasë', en huë'gacatézë' bulu'zxúnnejë' gadxë' bönni' na' lu yu'u ni'.

17 Guzë didza' ca guca lë ni, ate' bila'yöni yúgu'të nupa nacuá' lu yödzö Éfeso, bönachi judío, en bönachi izá'a, ate' yúgu'të' guládxinë' Dios. Que lë ni na' gulunë' zxön Lë' Xanru' Jesús.

18 Lësca' bila'dxinë' zían bönni' ta'yéajlë'ë Cristo, en gula'xóalëpë' dul-la' nabága'gaquië', en gula'guíxjö'ë le chigulunë'.

19 Lësca' caní gulunë' zián bönni', zí'alö gulunë' yöl-la' udzá'. Dujuá'agaquië' yugu' guichi udzá' quégaquië', ate' bulu'zégui'ë léguequi lógaca yúgu'të bönachi. Bulu'labë' tsca nazáca'gaca guichi na', le guca idú chi un mil dumí plata.

20 Caní guca, guzëda' xtídzë'ë Xanru', en bidéli'da' bönachi zián. Idú ládxi'gaquië' gula'yéajlë'ë Cristo.

21 Gudödi gulaca lë ni, benë' queë' Pablo tsejë' Jerusalén, pero zí'alö ral-la' tödë' yugu' yödzö luyú Macedonia, en luyú Acaya, ate' gunné':

—Tödi tseja' Jerusalén, run bayudxi tseja' ca' Roma.

22 Ní'irö gusöl-lë'ë-bi' chópabi' bi'i bönni' tácalenbi' lë', légacabi' Timoteo, en Erasto, luyú Macedonia, pero bugá'anë' lë' nababa dza luyú Asia na'.

Tu'tsatsa bönachi lu yödzö Éfeso

23 Bulu'tsatsa bönachi Éfeso dza ni', ate' gula'dá'baguë'ë xtídzë'ë Xanru'.

24 Benë' Demetrio, bönni' gubëdxi guié plata ga bulu'tsatsë'. Run cazë' yugu' lidxi budó' guió' budó' yaga néquiquequini plata que dios quégaquië', lënu Diana. Gula'zi'ë bönni' tunë' dxin ni dumí bach.

25 Butubë' Demetrio na' ia'zíca'rë' bönni' tunë' la' dxin nisö, ate' gudxë' légaquië':

—Böcha'a, nöz quézili' ca naca dxin runru', runna dumí queëru'.

26 Rilé'eli', en riyönili' ca runë' Pablo na'. Calégasö Éfeso ni, pero idú luyú Asia chibidéli'në' bönachi zián, ate' chibutsë'ë ca tunë', tu' rë'

légaquië: “Yúgu le núngaca bönachi biti' nácagaca díos.”

²⁷ Calégasö zoa bönadxi ugá'ana cá'asö dxin ni runru', pero lésca' zoa bönadxi ugá'ana cá'asö yudo' que díos zxön lënu Diana. Caní gaca, ugá'ana cá'asö yöl-la' zxön queénu, díos ni ta'yéaj ládi'gaca-nu bönachi idútë luyú Asia, enca' idútë yödzölió.

²⁸ Cate' yugu' bönni' na' bila'yönnë' didza' ni, gula'léde'enë', ate' gulu'ë zidzaj didza', ta'nnë':

—Nácatërönu zxön Diana, díos queëru' rë'u, bönachi Éfeso.

²⁹ Caní guca, bulu'tsatsa bönachi idútë lu yödzö na', ate' guláquië' tuz, en carelö yöjáquië' lö'a yúlahui'. Gulá'ayöjë' Gayo, en Aristarco, bönni' Macedonia túngaquië' Pablo tsözxön, ga ni'.

³⁰ Cate' gú'unnë' Pablo tsázië' ga nacua' bönachi zían na', biti' ca' gulu'ë lë' lataj bönni' ta'yéajlë' Cristo.

³¹ Lésca' caní gulunë' bal-lë' bönni' yúlahui' que luyú Asia, bönni' ta'lé'enë' Pablo dxi'a. Gula'söl-lë'ë queë' nupa guláta'yu lahuë' biti' tsazië' lö'a yúlahui' na'.

³² Ga ni' tu'tsatsë', en ta'bödxie', tu le ta'nnë' bal-lë', en ia'tú le ta'nnë' ia'zica'rë', tu' rő'ögacasë' baröli bönni' zían na' tu'tsatsë', en lá'tu'biqui' yúgu'tëgaquië' biti' nözguequinë' bizx que na' nudúbigaquië' ni'.

³³ Ní'irö yugu' bönni' judío gula'béajë' Alejandro ladaj bönachi zían na', ate' bulu'dxiguë'ë lë' lógaca bönachi zían na'. Bulu'e Alejandro na' len në'ë para ila'bö' dxisö, tu' gú'unnë' gu'ë didza' le gácalen yugu' bönni' judío na' lógaca yúgu'tëguequi.

34 Cate' guléquiibe'enë' náquië' judío, yúgu'të' gulu'ë tsözxön zidzaj didza' idú ca chopa hora, ta'nnë':

—¡Nácatërönu zxön Diana, dios queëru' rë'u bönachi Éfeso!

35 Ní'irö bönni' uzúaj que yúlahui' benë' ga gula'bö' dxisö bönachi zián na', gunnë':

—Bönni' Éfeso, nözigaca yúgu'të bönachi zoa yudo' queënu Diana, dios zxön, ni. Rë'u ni, bönachi Éfeso, run chí'iru' yudo' na', enca' budó' na' böxaj ga zóaru', le birúaj lúxiba.

36 Cuntu nu gaca tá'baga' lë ni. Que lë ni na' run bayudxi sóali' dxisö, en biti' bi gúntëzili'.

37 Nachë'gacali'-në' bönni' ni, en biti' ta'banë' le dzö'ö yudo', en biti' ta'nnë xihuë'ë queënu dios queëli'.

38 Que lë ni na', channö zoa didza' bizxaj quégaquië' Demetrio, en yugu' bönni' gubëdxi guié plata nacué'lenë' lë', len núti'tës bönni', dë lataj ga nu uzë nagui légaquië', en zoa nu uchi'a usörö légaquië'. Ni' huáca ulu'zegui luzá'agaquië' didza' tuë' ia'túë'.

39 Na'a, channö dë ia'tú le inábali', huáca ucá'anaru' tsahui' le cate' ulu'dubi bönni' yúlahui' ca na' rinná bë' yúlahui'.

40 Zoa bönadxi nu uzegui rë'u didza' ni'a que dzatsa ni guca na'a, inná ridá'baga'ru' yúlahui'. Biti' bi gaca innaru' bizx que guca dzatsa ni.

41 Cate' budxi bë'ë didza' ni, busöl-lë'ë bönachi zián na' nudúbigaca ni' tsöhuöjgaca lídxiguequi.

20

Sa'yéajë' Pablo luyú Macedonia, en luyú Grecia

¹ Cate' gurö'ö dxi dzatsa na' guca lu yödzo Éfeso, bulidzë' Pablo yugu' bönni' ta'yéajlë'ë Cristo, ate' guchízië' icja nágagaquië' didza'. Gudödi ni' bunidë' légaquië', en la' bulá'alentë' légaquië'. Birúajë' ni', ate' sa'yéajë' luyú Macedonia.

² Gudödë' yugu' yödzo luyú ni', ruzéajni'ide'enë' böchi'ru' nacué' ni', ate' gudödi ni' bidxinë' luyú Acaya.

³ Guzöë' Pablo ni' idú ca tsonna beo'. Cate' chizóa cuenë' tu lë'e barco para tsejë' luyú Siria, gúquibe'enë' ta'bö' nísie' bönni' judío lë' para ila'zönë' lë'. Que lë ni na' buguelë'ë nöza söhuöjë' luyú Macedonia, ate' bidxinë' yödzö Filipos.

⁴ Sópater, zxí'inë' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, söjácalenë' tsözxön lë'.

⁵ Ní'irö yugu' bönni' ni yöjnörugaquië' lahuë' Pablo, yöjáquië' yödzö Troas, ga ni' gula'bözë' lë'.

⁶ Lu yödzö Filipos na', neda', Lucas, yöjtsaga'-në' Pablo. Cate' chigudödi laní cate' tahuë' bönni' judío yöta xtila bití' nazí'i cúa zi que, gurentu' tu lë'e barco, en buzá'atu' Filipos na'. Gudödi gayu' dza budzágatu' bönni' ni' yöjnörugaquië' lahuë' Pablo, yöjáquië' Troas, ate' ni' bugá'anatu' gadxi dza.

Le benë' Pablo lu yödzö Troas

⁷ Dza risí lo le gadxi dza bulu'dubë' bönni' ta'yéajlë'ë Cristo para ilahuë' yöta xtila le rusá'ládxiru' ca gútië' Jesucristo. Ní' rusédinë' Pablo légaquië', en tu' ral-la' uzë'ë ni' cate' za' rení'

dza na', xidzé bē'ē didza', ga bidxintē gudōdi guluhuēla.

⁸ Ga ni' nudúbigaquiē' naca lu yu'u xitsá', ate' nacua' zían le ta'gú'u bení' ga na'.

⁹ Zóabi' bi'i Eutico ni', rō'ōbi' ga ra'a lení' que yu'u na', ate' nadōdirō yēla lobi' tu' ritunna libán runē Pablo. Ga ni' rō'ōbi' rásibi' bi'i na' naca ga bunny cuía lu yu'u, ate' rásisibi' ca' gubíxitebi', bōxjabi' ga bidxíntēbi' znan yu'u. Nátitēbi' bulu'lisē'-bi'.

¹⁰ Bōtjē' Pablo znan yu'u na', ate' yōjxóē' lēbi', en bunidē'-bi'. Ní'irō gudxē' nupa nacua' ni':

—Biti' gadxi idzōbili'. Nabanbi'.

¹¹ Cate' chibubenē' Pablo xitsá', gudélē'ē yōta xtila, gudahuē'. Ní'irō Pablo bē'lenē' légaquiē' didza' ga bidxintē zila balō. Gudōdi ni' burúajē' ni'.

¹² Bi'i bōnni' ra'bán na' gubíxibi', bulu'ché'ē-bi' nabanbi', en bulu'zí' zxōndē'ē.

Ca guca bidxintu' Mileto

¹³ Gunōrutu' lahuē' Pablo, en yōjchentu' tu lē'e barco, ate' gudōditu' ga bidxintu' yōdzō Asón para tsōjtságatu'-nē' Pablo ni', para gaca ca na' chibén xtídza'tu', tu' gú'unnē' Pablo tsejē' ni' sē'si ni'ē.

¹⁴ Cate' chibudzágatu'-nē' lu yōdzō Asón na', gurénlenē' netu' lē'e barco, ate' guyéajtu' yōdzō Mitilene.

¹⁵ Buzá' barco ni', ate' dza buropi bidxintu' tōdi li ga zoa luyú bidxi nazí'i le Quío, ate' ia'tú dza ca' gudōditu' tōdi li ga dē yōdzō Samos, en bidxintu' yōdzō Trogilio ga ni' guzóatu' tu chí'i. Ia'tú dza ca' bidxintu' yōdzō Mileto.

¹⁶ Caní bentu' tu' chibenē' queē' Pablo tōdisē' yōdzō Éfeso, para cabí tsenē' luyú Asia, tu' run

bayudxi soë' Jerusalén cate' naca dza Pentecostés channö séqui'në'.

Didza' bē'ë Pablo lu yödzo Mileto

¹⁷ Cate' ni' zoë' Pablo lu yödzo Mileto, gusöl-lë'ë nu yöjlidza bönni' gula tapa chi'ë bönachi queë' Cristo nacu'ë Éfeso.

¹⁸ Cate' bila'dxinë' ga zoë' Pablo, lë' gudxë légaquië':

—Libí'ili' chinöz quézili' ca béntica'sa' ga zóali' ga gudela' bidxina' luyú Asia.

¹⁹ Yugu' dza bena' xichinë' Xanru' lu yöl-la' nöxaj ladxi', ga bidxintë gurödxá' ni'a queëli', ate' zían le guca quia' le guzxí' bē' neda' ni'a que le ruá' dö gulunë' quia' bönachi judío biti' ta'yéajlë' Cristo.

²⁰ Béntica'sa' libán ga zóali' que yúgu'të le ruzí'ili' xibé, en busédida' libí'ili' yálajdo' ga nudúbili', en gapa naca lu yu'u lídxili'.

²¹ Bena' ba nalí lógaca bönachi judío, en lógaca bönachi izá'a para ulu'bí'i ládxi'gaca, en ulu'huóáca queë' Dios, en ila'yéajlë' Xanru' Jesucristo.

²² Na'a, Dios Bö' Lá'ayi chinunë' quia' tseja' Jerusalén, en biti' nözda' bizxi gaca quia' ni'.

²³ Yúgu'të yödzo ga ridá', riguíxjöi'inë' Dios Bö' Lá'ayi neda', rë' neda' ila'gu'ë neda' lidxi guíë bönni' judío biti' ta'yéajlë', en ulu'saca' zi'ë neda'.

²⁴ Biti' bi runi neda' que lë na' gaca, sal-la' gátia' o cabí gátia', pero ruí'i ládxi'sida' údxi guna' le chigudéla'a runa', para guna' dxin na' budödë' Xanru' Jesús lu na'a, le naca guna' libán que didza' dxi'a ca naca le ruzá' ládxi'ë Dios queëru'. Caní guna' len yöl-la' rudzeja.

25 'Na'a, yúgu'tëli' na' chibena' libán loli' ca rinná bē'ë Dios, nözda' bíti'rö ulé'eli' neda'.

26 Que lë ni na', le nácatë rea' libí'ili' na'a dza. Biti' nabága'a neda' queéli' nituli' libí'ili'.

27 Biti' bi bucáchi'da' libí'ili', pero gudíxjöi'ida' libí'ili' yúgu'të le rnnë' Dios.

28 Que lë ni na', guli'gún chi'i cuinli', en guli'gún chi'i yúgu'të bönachi queë' Cristo, tu' nuzóë' Dios Bö' Lá'ayi libí'ili' para gácalenli' légaquië', en gun chí'ili' bönachi queë' Xanru', Bönni' na' gútië' uláz quégaquië', bulaljë' xichönë' le böá'uinë' légaquië'.

29 Chinözda', tödi uzá'a ga zóali', ila'yaza nupa ilë'ëni ulu'suniti bönachi queë' Cristo ga zóali', ilunë' ca tunba' bö'cu' guí'a sínia', tu'sunítiba' yugu' bö'cu' zxila'.

30 Ila'rúajë' bönni' nútsa'gaquië' ládjali', ate' ilu'ë didza' bití' nácatë para ulu'béajë' quégacasë' nupa ta'yéajlë' Cristo nútsa'gaca ládjali'.

31 Que lë ni na', guli'sóa ban ladxi', en guli'tsöjné ca bena' neda' idú ca tsonna iz, rëla, en të dza buchízia' icja nágali' tu tuli' ga bidxintë gurödxá' queéli'.

32 'Na'a, böchi' luzá'ado', rigu'a libí'ili' lu në'ë Dios. Rinábida' Lë' uzá' ládxe'ë queéli', en gunë' ca rRNA xtídzë'ë. Dios gunë' libí'ili' tsutsu, en gunë' ga idéli'li' gunli' tsözxön yugu' bönni' rö queë'.

33 Catu caz guzë ládxa'a le nequi quégaquië' böchi' luzá'a. Biti' guzë ládxa'a dumí, o lari' quégaquië'.

34 Nöz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'.

35 Ca naca yúgu'të le bena', buluí'ida' libí'ili' caní ral-la' gunru' dxin para gaca gácalenru' nupa bi

ta'yadzaj. Ral-la' tsöjneru' didza' bë'ë Xanru' Jesús, gunné': "Uzi'irö xibé nu bi runödzej ca nu bi rizi'."

³⁶ Cate' budxi bë'ë Pablo didza' ni, buzóa zxibé', ate' bené' tsözxön yúgu'té', bulu'lidzé' Dios.

³⁷ Ní'irö gula'bödxé' yúgu'té'. Bulu'nidé' yené' Pablo, en bulu'tsaga lahué' lé'.

³⁸ Caní guluné' tu' bulu'huí'inné' ni'a que didza' na' bë'ë Pablo, gunné': "Bíti'rö ulé'eli' neda'." Yójacalené' tsözxön lé' ga na' gurené' lu barco.

21

Sa'yéajé' Pablo Jerusalén

¹ Gudödi bulá'alentu' légaquié', guyú'uté nōza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudöditu' ia' tú lataj nazí'i le Rodas, ate' buzá'atu' ni', en bidxintu' yödzo Pátara.

² Yöjxáca'tu' tu barco yúbölö ni' le zej luyú Fenicia. Gurentu' lé'e barco na', ate' guyú'uté nōza.

³ Gudöditu' ga nalá' Chipre, le guta' tsölá'a yögöla, ate' guyéajtu' luyú Siria, ga ni' guyaza barco na' lu yödzo Tiro, tu' ral-la' tsöjca'ana yua' ni' le dzö'ö lé'e barco na'.

⁴ Lu yödzo Tiro na' yöjxáca'tu' tu bönni' réajlé'ë Cristo, ate' bugá'analentu' lé', en yugu' böchi'ru' ni' idú gadxi dza. Tu' chibulu'íné' Dios Bö' Lá'ayi légaquié' le ral-la' gaca queé' Pablo, gulé' lé' biti' tsejé' Jerusalén.

⁵ Cate' chibizá'a dza na', burúajtu' ni', ate' gula'zá'lené' netu' tsözxön yúgu'té' len nigula que queégaquié', en yugu' bi'i queégaquié', ga bidxintétu' ní'ilö ra' yödzo na'. Ra' nísado' ni' buzóa zxíbitu', en bulidztu'-né' Dios.

⁶ Budxi bunida' luzá'atu' tutu' ia'tutu', bubentu' lè'e barco, ate' légaquië' yøjhuøjgaquië' lidxigaquië'.

⁷ Buzá'atë barco na' lu yödzö Tiro, ate' ga yöjsé bidxín lu yödzö Tolemaida. Burúajtu' lè'e barco na' ni'. Bugápatu' Dios böchi'ru' nacu'ë ni', ate' bugá'analentu' légaquië' tu dza.

⁸ Cate' za' reni' ia'tú dza, burúajë' Pablo ni', ate' dzágatu'-në' netu' guyéajtu' yödzö Cesarea. Ni' guyú'utu' lu yu'u lidxë Felipe, ate' bugá'analentu' lè'. Runë' Felipe na' libán que didza' dxi'a. Bítsëë gadxë bönni' ni' bulu'cu'ë dza ni'te para ilácalenë bönachi queë' Cristo.

⁹ Nacuá'abi' tapa bi'i nigula ra'bán queë' Felipe na', tu'íbi' didza' uláz queë' Dios.

¹⁰ Gudödi gudzetu' chopa tsonna dza ni', ní'irö bidxinë' Agabo ni', bönni' ru'ë didza' uláz queë' Dios, narúajë' luyú Judea.

¹¹ Bönni' ni buduyüë' netu', ate' gudélë'ë pan le néquini guídi queë' Pablo. Béguë'ë ni'a na' cuinë', en gunné':

—Caní rnnë' Dios Bö' Lá'ayi: “Caní ilunë' bönni' judío nacu'ë Jerusalén. Ilúguië' bönni' ni nequi queë' pan guídi ni, ate' ulu'dödë' lè' lu ná'agaca bönachi izá'a.”

¹² Cate' biyönitu' didza' ni, gúta'yutu' lahuë' Pablo, netu', en nupa nacuá' ni', para cabí tsejë' Jerusalén.

¹³ Bubi'ë didza' Pablo, gunné':

—¿Bizxi ni runli', ribödxili', en rusuhu'inili' neda'? Neda' chizóa caza' sina', calégasö ilúguië' neda', pero gátia' ca' lu yödzö Jerusalén ni'a queë' Xanru' Jesús.

14 Tu' cabí guzxéqui'tu'-në' didza', bíti'rö bi gúdxitu'-në', ate' gunnatu':

—Gaca ca raza ládxë'ë Xanru'.

15 Cate' chigula'dödi dza na', bupa'atu' queëtu', ate' guyéajtu' Jerusalén.

16 Gula'zá'lenë' netu' bal-lë' bönni' ta'yéajlë'ë Cristo, nacu'ë Cesarea, ate' dzáguië' Mnasón, tu bönni' Chipre, légaquië'. Réajlë'ë Cristo dza ni'te, ate' ral-la' tsöjgá'anatu' lidxë' bönni' ni.

Pablo röjyüë' Jacobo

17 Cate' bidxintu' Jerusalén, len yöl-la' rudzeja quégaquië' böchi'ru' ni' ta'yéajlë'ë Cristo gulunë' netu' bal.

18 Dza buropi na' Pablo guyázalenë' netu' lu yu'u, yöjyutu'-në' Jacobo, ate' nudúbigaquië' ni' yúgu'të bönni' gula tapa chi'ë bönachi queë' Cristo nacu'ë Jerusalén.

19 Cate' Pablo chibugapë' légaquië' Dios, busiyönnë' légaquië' yúgu'të le benë' Dios lu në'ë lë' ga nacuá' bönachi izá'a.

20 Cate' bila'yönnë' lë ni, gula'gu'ë Dios yöl-la' ba. Ní'irö gulë' Pablo:

—Nöz quézinu', böchi'tu', cate' xö zían gáyu'ë bönni' judío ta'yéajlë'ë Cristo, ate' yúgu'të' tündë'ë bal xibá queë' Moisés.

21 Chibila'yönnë' yugu' le tuí'i didza' bönachi le ta'nnë quiu', ta'nná rigú'u yöl-lu'u yúgu'të bönni' judío nútsa'gaquië' ladaj bönachi izá'a, para ulu'cá'anë' le gunná bë'ë Moisés, en rinná bé'enu' légaquië' biti' ila'chúguië' lu xpëla'gacabi' bi'i bönni'do' quégaquië', en biti' ilunë' bal yugu' le nalëbiru' runru' rë'u, bönachi judío.

22 ¿Nacxi caz gunru' na'a? Ulu'rúaj bönachi zían cate' ila'yöni chibidxínu' ni.

23 Na'a, ben lë ni rëtu' li'. Nacuá'lenë' netu' ni tapë' bönni', chinazí' lu ná'agaquië' lahuë' Dios tu le ilunë'.

24 Guchë'ë yugu' bönni' ni, en ben légaquië' tsözxön gun dxi'a cuinli' ca naca que yudo', en gudixxaj li' le ral-la' ila'guixxië' para ilún yútusö ícjagaquië'. Ní'irö ila'nözinë' yúgu'të bönni' judío bití' nácatë lë na' ta'nnë' quiu', pero lësca' li' runu' le naca dxi'a, en runu' ca rinná bë' xibá queë' Moisés.

25 Ca naca quégaca bönachi izá'a, nupa ni' chita'yéajlë' Cristo, chibén xtídza'tu', en buzúajtu' lu guichi ca ral-la' ilunë'. Bití' run bayudxi ilún chi'ë yugu' lë ni tunë' bönni' judío, pero tuz:

Bití' ilahuë' le ta'gú'u bönachi lógaca budó' guiöj budó' yaga.

Bití' ilahuë' rön.

Bití' ilahuë' xipëla'gacaba' böa' guixi' bití' narúaj-gacaba' rön.

Bití' ilunë' le ruá' dö'.

Ta'zönë' Pablo lö'a yudo'

26 Ní'irö Pablo guchë'ë queë' tapë' bönni' na', ate' dza buropi ni' ben dxi'a cuinë' tsözxön len légaquië' ca naca que yudo'. Ní'irö guyázië' lö'a yudo', para gaca bë' bizxi dza údxi ilunë' le tu'ún dxi'a cúngaquië', dza ni' ral-la' tsöjuá'agaquië' le ila'gu'ë lahuë' Dios que queë'gaquië'.

27 Cate' chizóa izá'a gadxi dza na', bal-lë' judío narúajgaquië' luyú Asia bila'lé'enë' Pablo, zoë' lö'a yudo'. Gulunë' ga gulún dzatsa bönachi zían, ate' gula'zönë' Pablo.

28 Gulu'ë zidzaj didza', ta'nnë':

—¡Guli'gácalen netu', bönni' Israel! Bönni' ni rusédinë' yúgu'të bönachi yúgu'të lataj ulu'cá'ana cá'asó yödzo queëru', en xibá queë' Moisés, en yudo' queëru' ni. Na'a, chigulu'ë yugu' bönni' izá'a lu yudo' ni. Caní runë', run dítjanë' lataj lá'ayi ni.

29 Caní gula'nnë' tu' bila'lé'enë' Pablo zí'alö lu yödzo dzáguië' Trófimo, bönni' Éfeso, en téquinë' gulu'ë bönni' ni lu yudo'.

30 Caní guca, bulu'dubi yúgu'të bönachi yödzo, ate' bila'guirë' ni. Ní'irö gula'zönë' Pablo, en gulá'ayöjë' lë', bulu'béajë' lë' lö'a yudo', ate' la' bulu'sáyjatë' ga nu riyaza lö'a yudo' na'.

31 Cate' chitequi quézinë' ilútië' Pablo, bidxín didza' lahuë' bönni' lo rinná bé'enë' bönni' röjáquië' gudil-la. Biyönnë' tun dzatsa yúgu'të bönachi Jerusalén.

32 Bönni' lo ni la' butúbitë' bönni' röjáquië' gudil-la, len bönni' ta'nná bé'enë' légaquië', ate' carelö guyéajlenë' légaquië' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enë' bönni' röjáquië' gudil-la, en bönni' na' röjáquië' gudil-la, bulu'sané' ta'guinë' Pablo.

33 Ní'irö gubígui'ë bönni' lo na', en guzxönë' Pablo, ate' gunná bé'enë' bönni' röjáquië' gudil-la ilúguië' lë' len chopa du guié. Gudödi ní' gunábinë' bönachi zían ni', rnnë':

—¿Nuzxi caz bönni' ni, en bizxi benë'?

34 Ta'bödxi'a bönachi zían na', que queégaca ca ta'nná. Caní guca, bití' bi guca tséajni'inë' bönni' lo na', tu' tu'tsatsa bönachi na', ate' gunná bé'enë' bönni' röjáquië' gudil-la ila'ché'ë Pablo lu yu'u zxön ga nagá'anagaquië' bönni' na' röjáquië' gudil-la.

³⁵ Cate' bila'dxinë' ga naca ni'yëpi' que yu'u zxön na', bönni' na' röjáquië' gudil-la gulu'ínë' Pablo, tu dxíadi'igaca bönachi zían légaquië',

³⁶ en zá'gaca cúdzu'lögaquië', ta'bödxi'a, ta'nná:
—Guli'gútië'.

Didza' bë'ë Pablo uláz queë' lógaca bönachi

³⁷ Cate' ni' gula'sí lógaquië' ila'gu'ë Pablo lu yu'u zxön ni', lë' gudxë' bönni' lo na' rinná bé'enë' bönni' röjáquië' gudil-la, gunné':

—¿Naru' gunnu' neda' lataj guía' li' tu didza'?

Bönni' lo na' gudxë' Pablo:

—¿Rácatso' didza' griego?

³⁸ ¿Naru' calëga li' bönni' Egipto na' dza lahui nisö butubë' yugu' bönni' gula'dá'baguë'ë yúlahui', ate' guchë'ë idú choá' gáyu'ë bönni' huëti bönachi lu lataj cá'asö?

³⁹ Ní'irö Pablo gudxë' lë', gunné':

—Le nácatë naca' neda' bönni' judío. Gulja' Tarso, tu yödzö lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

⁴⁰ Bönni' lo na' bë'ë lë' lataj, ate' guzuínë' Pablo ga naca ni'yëpi', en guchisa në'ë para ila'cuá' dxisö bönachi zían ni'. Cate' chigula'cu'ë dxisö, Pablo bë'lenë' légaquië' didza' lu didza' hebreo.

22

¹ Caní gunné' Pablo:

—Libi'ili', bönni' gula, en libí'ili' böcha'a. Buli'zë nágali' le guía' libí'ili' ca naca le runa'.

² Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

³ —Naca caza' neda' bönni' judío. Gulja' lu yödzö Tarso luyú Cilicia, pero guzxöna' lu yödzö ni, ate' busédinë' Gamaliel neda' idú ca naca xibá quégaquië' xuz xtó'oru'. Bé'tica'sö ládxa'a guyéaj ládxa'a Dios ca runli' libí'ili' na'a.

⁴ Zí'alö gudxía ládxi'gaca'-në' bönni' nazí' lu ná'agaquië' xtídzë'ë Cristo, en guché'gaca'-në' ga ilátië'. Guzxöngaca'-në', en gulú'ugaca'-në' lidxi guié, yugu' bönni', en nigula.

⁵ Lësca' huáca ilunë' ba nalí yugu' bixúz unná bë', en yugu' bönni' gula tu'zéajni'inë' que le gulunë'. Gulunë' guichi unná bë' le yöju'a ga nacu'ë böchi'ru' judío lu yödzö Damasco. Guyija' ni' para tsöjxöngaca' nupa ni' ta'yéajlë' Cristo, para idiché'gaca'-në' nága'gaquië' Jerusalén ni, para ilácagaquië' xíguia'.

Rigúxjö'ë Pablo ca böáquië' queë' Cristo

⁶ Ní'irö gunné' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsálido'os guyëpi yösa bení' le za' lúzxiba, le buzení' ga na' sa'yéaja'.

⁷ La' yöjötá'tea' lu yu, en biyönda' chí'i Nu gudxi neda': "Saulo, Saulo, ¿bizx que ribía ládxi'u neda'?"

⁸ Ní'irö gunábida' lë', gunnía': "¿Nuzxi li', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládxi'u."

⁹ Nupa ni' gula'cuá'len neda' bila'lé'e caz bení' na', en guladxi, pero biti' bila'yöni chí'i Nu na' bulidza neda'.

¹⁰ Ní'irö gudxa'-në': "¿Nacxi guna', Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' guié' li' ca naca yúgu'të le ral-la' gunu'."

11 Tu' cabirö rilé'eda' tu' budí'i yösa bení' na' guyëpida' lahua', que lë ni na' yugu' bönni' dzágagaquië' neda' gula'guélé'ë na'a, ate' gula'chë'ë neda' ga bidxíntea' Damasco.

12 'Zoë' Ananías ni', tu bönni' runë' idütë ca rinná bë' xibá queë' Dios, ate' yugu' bönni' judío nacu'ë Damasco tunë' lë' bal.

13 Bidxinë' Ananías na' ga zoa', en gudxë' neda': "Saulo, böcha'a, huöálaj guiöj lo'." La' ní'isö böálaj guiöj lahua', ate' bilé'eda' lë'.

14 Lë' gudxë' neda': "Dios quégaquië' xuz xtó'oru', dza ni'te gurö cazë' li' para inözinu' le rë'ëni quëzinë' Lë', en ilé'enu'-në' Bönni' Tsahui', Lë' cazë' Zxí'inë', en yönnu' le guíë' Lë' cazë' li'.

15 Caní gaca, tu' ral-la' gunu' ba nalí queë' Lë' lógaca yúgu'të bönachi, usiyönnu' légaquië' ca naca le chibilé'enu', en le chibiyöninu'.

16 Na'a, ¿bizx que ridzenu'? ¡Guyasa, en bidila nisa! Bulidzë' Xanru' para únë' li' dxi'a, en ugüë' dul-la' nabágu'u."

Cristo gusöl-lë'ë Pablo para gunë' libán lógaca bönachi izá'a

17 Gunnë' ca' Pablo:

—Gudödi ni', cate' budxina' Jerusalén, en tsanni ni' rulidza'-në' Dios lu chila yudo', bilé'eda' tu le naca ca tu lu yëla bëchigal.

18 Bilé'eda'-në' Xanru', ate' gudxë' neda': "¡Guyéaj carelö! ¡Burúajtë Jerusalén ni, tu' cabí ilunë' bal bönni' ni le gunu' ba nalí quia'!"

19 Neda' gudxa'-në': "Xan, nözgaca quëzinë' ca bena' neda'. Guyázia' gapa naca lu yu'u ga tu'dubë'

tu'sedë' bönni' judío queë' Dios. Gudina' nupa ni' ta'yéajlë' Li', en gulú'ugaca'-në' lidxi guíë.

²⁰ Cate' ni' gulútië' Esteban, bönni' ni' benë' ba nalí quiu', lësca' zoa' neda' ni', en bena' tuz yugu' bönni' gulútië' lë' tu' ben chi'a lari' nácugaquië' bönni' na' bulu'ladxë' lë' guió'j."

²¹ Ní'irö Xanru' gudxë' neda': "Guyéaj, tu' risöl-la'a li' lógaca bönachi izá'a."

Pablo ru'ilenë' bönni' lo didza', bönni' rinná bé'enë' bönni' röjáquië' gudil-la

²² Nisö ze lo yugu' bönni' judío bulu'zë nágagaquië' didza' bë'ë Pablo, ate' ní'irö gula'bödxi'ë. Gulu'ë zidzaj didza', ta'nnë':

—¡Guli'gútië' bönni' ni! ¡Bíti'rö ral-la' soë' ibanë'!

²³ Ní'irö tu' ta'bödxi'ë, en ta'chözë' le nácugaquië' lu yöl-la' rilé quégaquië', en tu'chejë' bëchtö yu lu bö'ös,

²⁴ bönni' lo na' rinná bé'enë' bönni' röjáquië' gudil-la gunná bë'ë ulu'gu'ë Pablo lu yu'u zxön na'. Lësca' gunná bé'enë' légaquië' ila'guinë' Pablo para quíxjö'ë le nácate, para ila'nözinë' bizx que na' ta'bödxi'ë bönni' judío caní queë' Pablo.

²⁵ Cate' gulúgui'ë lë' du guídi para ila'guinë' lë', Pablo gudxë' tu bönni' nacu'ë lu në'ë bönni' röjáquië' gudil-la zoë' ni', rnnë':

—¿Naru' dë lataj quínili' neda'? Nababa' Roma, ate' cuntu nu buchi'a busörö neda' channö nabága'a xíguia'.

²⁶ Cate' bönni' na' biyönnë' lë ni, guyijë' yöjtíxjö'inë' bönni' lo na' rinná bé'enë' bönni' röjáquië' gudil-la. Rë' lë':

—¿Bizxi caz ni runru'? ¡Bönni' ni nababë' Roma!

27 Ní'irö bidë' bönni' lo na' ga zoë' Pablo, en gudxë' lë':

—¡Gudixjö'! ¿Naru' nababu' li' Roma?

Pablo gudxë' lë':

—Ön, nababa'.

28 Bubi'ë didza' bönni' lo na', gunnë':

—Neda' ni, dumí zían gudizxja' para ibaba' Roma.

Ní'irö Pablo gudxë' lë':

—Neda' gubaba' Roma cate' ni' gulja' tu' nabábagaquië' xuz xiná'a Roma.

29 Cate' bönni' na' chizóa ila'guinë' lë' bila'yönnë' lë' ni, la' bulu'bíga'të' ga zoë' Pablo. Lësca' gúdxinë' bönni' lo na' cate' gunözinë' nababë' Pablo Roma, tu' chigunná bë'ë ilúguië' lë'.

Ridxinë' Pablo lógaquië' bönni' yudo' tu'chi'a tu'söröë'

30 Dza buropi ni', gú'unnë' bönni' lo na' inözinë' gazxi ga rë' bizxi na' yugu' bönni' judío tu'zéguië' Pablo didza'. Gunná bë'ë bulu'sedxë' du guië' na' náguë'ë Pablo, ate' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söröë'. Ní'irö bubéajë' Pablo ga na' nagú'ugaquië' lë', ate' buzóë' lë' lógaquië'.

23

1 Ní'irö buyúdë'ë Pablo lógaquië' bönni' yudo' tu'chi'a tu'söröë' na', en gunnë':

—Libí'ili', böcha'a. Ga ridxintë na'a riböza' dxí'ado'. Caní naca, biti' zoa le ruxösa láchí'da'ahua' neda' lahuë' Dios.

2 Ní'irö Ananías, bixúz lo, gunná bé'enë' nupa nacua' cuita lë'ë Pablo ila'gápë'ë ru'ë.

³ Pablo gudxë' lë':

—Lëzca' caní Dios ubi'ë quiu', li', rulu'isö tsahui' cuinu'. ¿Naru' rö'ö cazu' ruchi'a rusöröu' neda' ca rinná bë' xibá, pero ridödi bë'tso' ca rinná bë' xibá na', na' rinná bé'enu' ila'gápë'ë neda'?

⁴ Nupa nacué' ni' tē Pablo:

—¿Naru' rulidza zi'tso'-në' bixúz lo queë' Dios?

⁵ Pablo gudxë' légaquië':

—Libí'ili', böcha'a. Nazúaj lu guichi, rna: “Biti' ulidza zi'u nu rinná be'e bönachi uládz quiu'”, pero neda' biti' gúquibe'eda' náquië' bixúz lo.

⁶ Ní'irö gúquibe'enë' Pablo bal-lë' nácagaquië' bönni' yudo' saduceo, ate' ia'bal-lë' bönni' yudo' fariseo. Ní'irö bë'ë zidzaj didza' lógaquië' bönni' yudo' tu'chi'a tu'söröë' na', gunné':

—¡Libí'ili', böcha'a! ¡Naca' bönni' fariseo, en naca' xzí'inë' tu bönni' fariseo! ¡Na'a ruchi'a rusöröli' neda' tu'runa' löza ulu'bán nupa chinátigaca!

⁷ Cate' bë'ë Pablo didza' ni, bila'rúajë' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídžë'ë la' légacasë'.

⁸ Caní gulunë' tu' ta'nnë' bönni' saduceo na' biti' ulu'bán nupa chinátigaca, en biti' nacué' gubáz lá'ayi, en biti' nacué' bö' nácagaca caz bönachi, pero ta'yéajlë'ë bönni' yudo' fariseo nácagaca yúgu'të lë ni.

⁹ Que lë ni na' gula'bödxi'ë. Ní'irö gula'yasë' bönni' nazédagaquië' xibá queë' Dios, yugu' bönni' yudo' fariseo, en gula'dil-la dídžë'ë, ta'nnë':

—Rusáca'tu' queëtu' biti' bi dö' nu'ë bönni' ni. Channö tu bö' naca caz bönachi bé'len lë' didza', o channö tu gubáz lá'ayi queë' Dios bé'lenë' lë' didza', biti' ral-la' tá'baga'ru'-në' Dios.

10 Cate' chita'díl-lada' dídzë'ë bönni' judío na', gúdxinë' bönni' lo na' rinná bé'enë' bönni' röjáquië' gudil-la, tu' réquinë' ulu'zxuzxaj ulu'quínnajë' Pablo. Ní'irö gunná bé'enë' bönni' röjáquië' gudil-la tsöjléajgaquië' Pablo ladaj bönni' judío na', en ulu'chë'ë lë' lu yu'u zxön ga na' nagá'anagaquië' bönni' na' röjáquië' gudil-la.

11 Cate' chinaca chi'i dzö'ölö la' dza ná'asö, bu-luí'i lahuë' Xanru' ga zoë' Pablo, en gudxë' lë':

—Butipa ládXu'u, Pablo. Ca na' chibenu' ba nali quia' Jerusalén ni, lësca' run bayudxi gunu' ba nali quia' lu yödzö Roma.

Tun xtídza'gaquië' ilútië' Pablo

12 Cate' za' rení ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nnë' gunë' Dios légaquië' xíguia' channö cabí ilunë' lë na' gulún xtídza'gaquië', gula'nnë' bití ca' ilë'aj ilahuë' ga idxinrö chigulútië' Pablo.

13 Nayanrö ca choá'gaquië' bönni' na' gulún tsutsu xtídza'gaquië' caní.

14 Yöjáquië' bönni' ni ga nacu'ë yugu' bixúz unná bë', en bönni' gula tu'zéajni'inë' bönachi judío, ate' gula'nnë':

—Chiben tsutsu xtídza'tu', gunnatu' gunë' Dios netu' xíguia' channö cabí guntu' caní. Bití guí'aj gágutu' ga gútirötu'-në' Pablo.

15 Na'a, libí'ili', en bönni' yudo' tu'chi'a tu'söröë', guli'guié' bönni' lo rinná bé'enë' bönni' röjáquië' gudil-la idichë'ë Pablo cuxö para idxinë' ga nudúbili', innali' ré'ënili' inábili'-në' Pablo tu didza' gate ga rë'. Netu' cö'ö nistu'-në' la' nöza, ate' gútitu'-në' zí'alö ca idxinë' ni.

16 Biyónibi' bi'i bönni' queënu nigula zanë Pablo ca na' ila'bõ' nísie' Pablo, ate' guyéajbi', en guyú'ubi' yu'u zxön na', ate' yöjtíxjöi'ibi'-në' Pablo.

17 Pablo bulidzë' tuë' bönni' nacu'ë lu në'ë bönni' röjáquië' gudil-la en gudxë' lë':

—Guchë'ë-bi' bi'i ni lahuë' bönni' lo, tu' nuá'abi' didza' guiëbi'-në'.

18 Ní'irö bönni' na' gudélë'ë-bi', en guchë'ë-bi' ga na' zoë' bönni' lo na', ate' gudxë' lë':

—Bulídzë' Pablo, bönni' na' yu'ë lidxi guié, neda', en gúta'yue' lahua' idigu'a-bi' bi'i ni lo', tu' rë'ëni'bi' güi'ilenbi' li' didza'.

19 Bönni' lo na' gudélë'ë ná'abi', en guchë'ë-bi' quez, ate' gunábinë'-bi', rnnë':

—¿Bizxi na' ral-la' guío' neda'?

20 Lëbi' gúdxibi'-në':

—Chinúngaquië' didza' bönni' judío iláta'yue' lo' ichë'u-në' Pablo cuxõ, para idxinë' lógaquië' bönni' yudo' tu'chi'a tu'söröë'. Ilë' li' té'ënnë' ila'nábinë' lë' tu didza' gate ga rë',

21 pero bití' tséajlë'u le ila'nnë' tu' nadödi choá'gaquië' ila'bõ' nísie' Pablo. Chigulún tsutsu xtídzë'ë gula'nnë' gunë' Dios légaquië' xíguia' channö cabí ilútië' lë'. Bití' bi ilë'aj ilahuë' ga idxinrö ilútië' lë'. Chizóagaquië' ta'bözë' si' lu no'o gunu' le ila'nábinë' li'.

22 Ní'irö bönni' lo na' rinná bé'enë' bönni' röjáquië' gudil-la gunná bé'enë'-bi' cuntu nu guiëbi' lë na' chigúdxibi' lë', ate' ní'irö busöl-lë'ë-bi' bi'i ni.

Ridxinë' Pablo lahuë' Félix, bönni' rinná bë'ë luyú na'

23 Ní'irö bönni' lo na' bulidzë' chopë' bönni' nacu'ë tu gáyu'ë bönni' röjáquië' gudil-la lu ná'agaquië' tu tuë', ate' gunná bé'enë' légaquië' ulu'cözë' chopa gáyu'ë bönni' röjáquië' gudil-la ta'zë'e ní'agaquië', en tsónnalalaj yu' chië' bönni' röjáquië' gudil-la dxíagaquië' böa', en chopa gáyu'ë bönni' röjáquië' gudil-la ilu'ë yaga tuchi' para tsöjáquië' yödzö Cesarea idú ridödi xtsö'.

24 Lësca' gunná bé'enë' légaquië' ulu'cözë'-ba' tu böa' cuië'-ba' Pablo, ate' ila'chë'ë lë' dxí'ado', cabí bi gaca queë', para idxinë' lahuë' Félix, bönni' lo rinná bë'ë uláz que Roma.

25 Gusöl-lë'ë ca' tu guichi le rna caní:

26 "Neda', Claudio Lisias, ruzúaja' quiu' lu guichi, bönni' lo unná bë', Félix. Rugapa' Dios lí'.

27 'Bönni' ni risöl-la'a-në' quiu', gula'zönë' bönni' judío lë', en gulë'ënnë' ilútië' lë'. Cate' gúquibe'eda' nababë' Roma, guchë'gaca'-në' bönni' röjáquië' gudil-la, en busölá'-në' lu ná'agaquië' judío na'.

28 Gú'unida' inözda' bizxi benë', lë na' tu'zéguië' lë' didza' bönni' judío, ate' guchë'a-në' lógaquië' bönni' yudo' tu'chi'a tu'söröë' légaquië'.

29 Cate' buédxi didza', gunözda' tu'zéguië' lë' didza' ca naca le rinná bë' xibá quégaquië', en biti' bi nabáguë'ë bönni' ni para nu guti lë', o nu cu'u lë' lidxi guié'.

30 Ní'irö cate' bidxín nu gudíxjöi'i neda' ta'bö' nísie' yugu' bönni' judío lë', la' gusöl-la'tea' lë' ga zu', ate' gunná bé'egacada'-në' bönni' ni tu'zéguië' lë' didza' ila'dxinë' lo' lí', para ila'gúxjöi'inë' lí' bi didza' nápaqaquië' lë'. ¡Dios gun tsáhuë'ë lí'!"

31 Ní'irö bönni' na' röjáquië' gudil-la gula'guélëë Pablo, en gulunë' ca na' chigunná bé'enë' légaquië', ate' gula'chéë' lë' yödzo Antípatris, ni' naca chi'i dzö'ölö.

32 Cate' za' rení' ia'tú dza bönni' röjáquië' gudil-la ta'zë'e ní'agaquië' yöjhuöjgaquië' Jerusalén, ate' bönni' röjáquië' gudil-la dxíagaquië' böa' bulu'ú'ë nöza, dzágagaquië' Pablo.

33 Cate' bönni' na' röjáquië' gudil-la nachë'gaquië' Pablo bila'dxinë' Cesarea, bulu'nödzjë' guichi na' lu në'ë bönni' rinná bë'ë uláz que Roma, en bulu'sudxinë' Pablo lahuë'.

34 Gudödi bulabë' bönni' unná bë' guichi na', gunábinë' Pablo gazxi bönni' lë'. Cate' gúquibe'enë' nababë' luyú Cilicia,

35 gudxë' lë':

—Yö'nida' le innó' cate' ila'dxín ni nupa tu'zegui li' didza'.

Ní'irö gunná bé'enë' ilún chi'ë lë' lu yu'u yúlahui' ga ribö'ë Herodes, bönni' rinná bë'ë, para uchi'a usöröë' bönachi.

24

Pablo ru'ë didza' uláz queë' lahuë' Félix

1 Cate' chibizá'a gayu' dza, bidxinë' Ananías, bixúz lo, ni', ate' dzágagaquië' lë' bal-lë' bönni' gula tu'zéajni'inë', en Tértulo, tu bönni' nazë'ede'enë' didza'. Bila'dxinë' lahuë' bönni' unná bë', ate' gula'nnë' queë' Pablo.

2 Cate' chibulu'lidzë' Pablo, ate' bidxinë' ni', gusí lahuë' Tértulo ruzégui'ë lë' didza', rnnë':

—Bönni' lo unná bé', Félix. Ni'a quiu' li' ruzi'tu' xibé le run tsahui' netu', ate' lu yöl-la' réajni'i quiu' rinná bé'enu' dxi'a bönachi uládz queétu'.

³ Yúgu'tè lè ni ruzí'tica'stu' xibé gáti'tès, ate' idú ládxi'tu' rëtu' li': "Xclenu'."

⁴ Na'a, para cabí upízjarötu' li', ráta'yua' lo' gun zxön ládxi'u, yönnu' tu le do' guiëtu' li'.

⁵ Gúquibe'etu' bönni' ni rigú'u yöl-lè'è bönachi, en runè' ga ta'dá'baguë'è yúlahui' yugu' bönni' judío nacu'è idútè yödzölió, en náquiè' bönni' lo quegaquiè' bönni' dá'gaquiè' bönni' Nazaret na'.

⁶ Lësca' gú'unnè' gun dítjanè' yudo' queétu'. Que lè ni na' guzxöntu'-nè', en gú'unitu' uchi'a usörötu' lè' ca naca xibá queétu'.

⁷ Ní'irö Lisias, bönni' lo rinná bé'enè' bönni' röjáquiè' gudil-la bidxinè' ga zóatu', en lu yöl-la' sínia' zxön bugüè' bönni' ni lu na'tu'.

⁸ Ní'irö gunná bé'enè' Lisias na' ídigaca nupa tu'zegui lè' didza' lo' li'. Na'a, li' caz, cate' rinabi yúdxinu'-nè' Pablo ni, huáca inözinu' gate ga rë' yúgu'tè lè ni ruzéguitu' lè' didza'.

⁹ Lësca' caní gula'nnè' yugu' bönni' judío ni', gula'nnè' naca caz caní.

¹⁰ Ní'irö butásö në'è bönni' rinná bé'è uláz que Roma na' para gu'è didza' Pablo, ate' lè' bubí'è didza', gunnè':

—Idú ládxa'a quíxjö'a ca naca le runa', tu' china naca zían iz ruchí'a rusöröu' le raca quégaca bönachi ladztu'.

¹¹ Le bena' huáca inabu'. Biti' réquini chinnu dza bidxina' Jerusalén para tseaj ládxa'a-nè' Dios.

¹² Biti' yöjxáca'gaquiè' neda' nu ridíl-lalena' didza', en bití' bena' ga ulu'tsatsa bönachi ga naca

chila yudo', en cabí lu yu'u ga tu'dübë' tu'sëdë' queë' Dios, en cabí lu yödzo.

13 Biti' ca' gaca ulu'béaj lië' yugu' lë ni tu'zéguië' neda' didza'.

14 Lë ni rixóalëpa' lo'. Ca runa' xichinë' Dios quégaquië' xuz xtó'otu' nalëbi ca le tu'sëdinë' légaquië', pero bönni' judío ni tu'ë le: Le ridá'baga' Dios, tu' réajlë'a yúgu'të le rinná bë' xibá queë' Dios, enca' yúgu'të le bulu'zúajë' bönni' gulu'ë didza' uláz queë' Dios.

15 Ca na' légaquië' tunë' löza Dios, lësca' neda' runa' löza Dios, usubanë' nupa chinátigaca, bönachi tsahui', en bönachi bití' nácagaca tsahui'.

16 Que lë ni na' ruí'i ládxi'tica'sa' cabí ibága'a le gun ga uxös ládxi'da'ahua' neda' lahuë' Dios o lógaca bönachi.

17 'Gudödi zoa' ga yúbölö idú chopa tsonna iz, budxina' ga nacuá' bönachi uládz quia' para unödza' dumí le gácalen bönachi yechi', en unödza' le rigu'a lahuë' Dios.

18 Tsanni ni' runa' caní, bal-lë' bönni' judío narúajgaquië' luyú Asia bidixáca'gaquië' neda'. Ni' zoa' lö'a yudo', nubéaj dxi'a cuina' ca naca que yudo', en cabí nutuba' bönachi zián, en cabí nuna' ga ulu'tsatsa bönachi.

19 Yugu' bönni' judío ni' ral-la' ila'dxinë' lo' li', en ulu'zéguië' neda' didza' channö nápagaquië' neda' didza'.

20 Ila'nnátsöquië' bönni' judío ni channö bulu'dzölinë' bi le cabí naca dxi'a bena' cate' ni' bidxina' lógaquië' bönni' yudo' tu'chi'a tu'söröë' légaquië'.

21 Tuz cate' ni' zoa' lógaquië', bë'a zidzaj didza',

gunnía': "Ruchi'a rusöröli' neda' na'a tu' runa' löza ulu'bán nupa chinátigaca."

²² Cate' biyönnë' Félix didza' ni, en dxí'ado' chinözinë' ca naca que lë na' rusëdinë' Pablo, buzë lähui'së' ca' didza' bizxaj ni, gunnë':

—Cati' idxinë' Lisias, bönni' lo rinná bé'enë' bönni' röjáquië' gudil-la, údxi yönida' ca naca didza' bizxaj queéli'.

²³ Ní'irö Félix gunná bé'enë' tu bönni' nacu'ë lu në'ë bönni' röjáquië' gudil-la zoë' ni', gun chi'ë Pablo, pero gu'ë lë' lataj të' lö'a, en biti' uzáguë'ë xinözgaquië' böchi' luzë'ë duyúgaquië' lë' bi dxin ilunë' queë'.

²⁴ Chopa tsonna dza gudzé, bidë' leyúbölö Félix na'. Drusila, nigula queë' dzáganu lë'. Nácanu nigula judío. Félix bulidzë' Pablo, ate' buzë náguië' xtídzë'ë ca naca le réajlë'ëru' Jesucristo.

²⁵ Cate' bë'ë didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usöröë' Dios rë'u dza si' za', ní'irö gudxi bidzöbinë' Félix, en gudxë' Pablo:

—Guyéaj na'a. Cate' gapa' lataj ulidza' li'.

²⁶ Lësca' gú'unnë' Félix si'ë dumí le unödzjë' Pablo lë' para usanë' lë', ate' que lë ni na', zían luzuí bulidzë' Pablo, en bë'lenë' lë' didza'.

²⁷ Cate' bizá'a chopa iz guyázië' Porcio Festo xilatjë' Félix, ate' tu' gú'unnë' Félix gunë' le tsaza ládxi'gaquië' bönni' judío, bucá'anë' Pablo nadzunë' lidxi guë'.

25

Ridxinë' Pablo lahuë' Festo, bönni' unná bë'

¹ Bidxinë' Festo yödzö Cesarea para tsázië' xilatjé', gáquië' bönni' unná bē' ulaz que Roma. Cate' bizá'a tsonna dza buzé'ë yödzö na', sa'yéajë' Jerusalén.

² Cate' bidxinë' Festo ni' yugu' bixúz unná bē', en yugu' bönni' lo quégaca bönachi judío bila'dxinë' lahuë' para ila'nnë' queë' Pablo, ate' guláta'yuë' lahuë' Festo

³ bi uzá' ládxe'ë quégaquië', isöl-lë'ë nupa tsöjxí'gaca Pablo, para udxinë' Jerusalén. Gulé'ënnë' ila'bö' nísie' lë' la' nöza para ilútië' lë'.

⁴ Bubi'ë didza' Festo, gudxe' légaquië':

—Lu yödzö Cesarea nadzunë' Pablo, ate' ral-la' tseja' ni' cuxö huidzaj nisö.

⁵ Que lë' ni na', núti'tëslöli' dë lu ná'ali', ralla' sá'lenli' neda', en channö nabáguë'ë bönni' ni xíguia', huáca uzéguili'-në' didza' ni'.

⁶ Gudzenë' Festo Jerusalén idú ca xunu' gubidza, ate' ní'irö böajë' Cesarea. Cate' guzá' rení' ia'tú dza gurö'ë ga ruchi'a rusöröë', en gunná bé'enë' nupa tsöjxí'gaca Pablo.

⁷ Cate' chibidxinë' Pablo ni', yugu' bönni' judío narúajgaquië' Jerusalén gula'gu'ë lë' lë'alö, en zían le gula'nnë' queë'. Bulu'zéguië' lë' le tu'subáguë'ë lë' xíguia', pero biti' guca ulu'béaj lië' yugu' lë' na' gula'nnë' queë'.

⁸ Ní'irö bē'ë didza' Pablo uláz queë', gunné':

—Biti' bi le ruá' dö' bena' que xibá quégaquië' bönni' judío, en cabí que yudo' quégaquië', en cabí queë' César, bönni' Roma, rinná bé'enë' rë'u.

⁹ Gú'unnë' Festo gunë' le ila'yaza ládxi'gaquië' bönni' judío, ate' bubí'ë didza', gudxe' Pablo:

—¿Rě'ënu' so'o Jerusalén, ga na' soa nu uchi'a usöró li' ca nácgaca lë ni ta'nně' quiu'?

¹⁰ Bubi'ë didza' Pablo, gudxë' lë':

—Zoa caza' ga rō'ö nu ruchi'a rusöró uláz queë' César, ga na' ral-la' uchi'a usöröu' neda'. Biti' bi huiá' dö' nuna' quégaquië' bönni' judío, ate' chinöz quézinu' lë ni.

¹¹ La'tu' nuna' tu le ruá' dö', o bíti'tës le run ga ibága'a xíguia' gátia', bití' tá'baga'a gátia'. Na'a, channö cabí nuna' ca ta'nně' quia' bönni' ni, cuntu caz nu dë lu nē'e udödi neda' lu ná'agaquië'. Rin-aba' tseja' lahuë' César ga udxí'a uró quia'.

¹² Cate' Festo chibě'leně' yugu' bönni' yúlahui' didza', bubí'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

Ru'ë didza' Pablo lahuë' Agripa, bönni' unná bē'

¹³ Gudödi chopa tsonna dza, bidxinë' Agripa, bönni' rinná bē'ë lu yödzo Cesarea, dzáganu Berenice lë', duyúgaquië' Festo.

¹⁴ Cate' chigula'cu'ë ni' zían dza, Festo buluí'inë' Agripa, bönni' rinná bē'ë, ca naca queë' Pablo. Gudxë' lë':

—Zoë' tu bönni' ni bucá'anë' Félix lë' lidxi guíë.

¹⁵ Cate' guzóa' Jerusalén, yugu' bixúz unná bē', en bönni' gula tu'zėjni'inë', bila'dxinë' lahua', ate' gula'nně' queë' bönni' ni. Gula'nábinë' neda' ichuga' queë' gátie'.

¹⁶ Neda' bubí'a didza', gudxa' légaquië' bití' nalëbiguequinë' bönni' Roma ila'chúguië' queë' tu bönni' gátie' channö cabí ila'dxini lahuë' nupa

tu'zegui lë' didza', para gaca ubi'ë didza' ca naca lë na' ta'nnë' queë'.

17 Que lë ni na', cate' bila'dxinë' légaquië' ni, biti' ca' gudzedá', pero cate' guzá' guyeaní' ia'tú dza guró'a ga ruchí'a rusöró'a', ate' gunná bé'eda' nupa yöjxí'gaca bönni' ni.

18 Cate' gula'cu'ë ni bönni' na' tu'zeguië' lë' didza', biti' bi gula'nnë' queë' ca busaca' quia' ila'nnë'.

19 Gula'nnë' queë' bal-la didza' bizxaj ca naca le ta'yéajlë'ë Dios, en ca naca queë' tu bönni' lë' Jesús, nu na' guti, pero Pablo runë' tsutsu xtídzë'ë rnnë' ni zoë' nabanë' leyúbölö.

20 Tu' buchíxida' ca náacagaca lë ni, gunábida'-në' Pablo channö ré'ënë' tsejë' Jerusalén, ga ni' soa nu uchi'a usörö lë' ca náacagaca lë ni.

21 Ní'irö cate' gunabë' Pablo tsejë' lahuë' Augusto César para uchi'a usöröë' lë' ni', gunná bé'eda' bönni' röjáquië' gudil-la ilún chí'igarë' lë' cate' gála'rö dza isöl-la'a-në' lahuë' César.

22 Ní'irö Agripa gudxë' Festo na':

—Lëzca' neda' ré'ënda' yönida' le innë' bönni' na'.

Festo gudxë' lë':

—Cuxö yönnu' le innë'.

23 Cate' za' rení' ia'tú dza, len ba zxon bila'dxinë' Agripa, en Berenice ni'. Gula'yázië' ga ral-la' ilu'ë didza', dzágagaquië' légaquië' bönni' unná bë', ate' gula'söl-lë'ë nupa tsöjxí'gaca Pablo.

24 Ní'irö Festo gudxë' Agripa, bönni' unná bë':

—Bönni' unná bë', Agripa, en yúgu'tëli' zóali' ni tsözxön len netu'. Ni zoë' rilé'eli'-në' bönni' na', ta'nnë' queë' yúgu'të bönni' judío nacu'ë Jerusalén, enca' nupa nacuá' ni, të' neda' ral-la' gátie'.

²⁵ Runi neda' biti' bi benë' le nabáguë'ë xíguia' gátië', pero tu' gunabë' lë cazë' tsejë' ga uchi'a usöröë' Augusto César lë', que lë ni na' chinuna' quia' isöl-la'a-në' lahuë' Augusto.

²⁶ Tu' cabí nözda' bi ral-la' uzúaja' lu guichi le uzegui bönni' ni didza' para isöl-la'a lu në'ë César, xana', que lë ni na' nachë'a-në' loli', en le nácarö lo, nachë'a-në' lo' li', Agripa, bönni' unná bë', para cate' údxi rinábini yudxu'-në', ní'irö inözda' bi ral-la' uzúaja' lu guichi ca naca queë' bönni' ni.

²⁷ Réquida' biti' naca dxi'a isöl-la'a-në' nu bönni' náguë'ë ni' channö cabí gaca ulu'a le nabáguë'ë.

26

Didza' bë'ë Pablo uláz queë' lahuë' Agripa, bönni' unná bë'

¹ Ní'irö Agripa gudxë' Pablo:

—Dë lataj gu'u didza' uláz quiu'.

Buchila në'ë Pablo lahuë' Agripa, ate' gusí lahuë' ru'ë didza', rnnë':

² —Bönni' unná bë', Agripa. Raza ládxa'a tu' dë lataj na'a gu'a didza' uláz quia' lo' li' ca naca yúgu'të le tu'zéguië' bönni' judío neda' didza'.

³ Raza ládxi'ra' tu' núnbë'u yúgu'të le nalëbiguequinë' tunë' bönni' judío, enca' yugu' lë ni ridíl-latu' didza'.

Yugu' le benë' Pablo zí'atëlö

⁴ Gunnë' ca' Pablo:

—Nözguequi quézinë' yúgu'të bönni' judío ca na' bena' ga gudéla'të cuídia' ga nacua' bönachi uládz quia', enca' lu yödzö Jerusalén.

⁵ Nözguequi quézinë' ca', en huáca ila'guíxjöë ca na' bena' dza ni'te. Guca' bönni' fariseo. Yugu' bönni' fariseo tuí'i ládxi'gacarë' ila'yéaj ládxi'gaquië' Dios ca tunë' ia'zíca'rë' bönni' judío.

⁶ Na'a, zoa' ni loli' para nu uchi'a usörö neda' tu' runa' löza Dios, usubanë' bönni' nati, en gunë' ca na' guxzí' lu në'ë lógaquië' xuz xtó'otu'.

⁷ Tunë' löza yugu' bönni' idxinnu cö' di'a dza queëtu' ila'déli'në' lë na' guxzí' lu në'ë Dios. Que lë ni na' ta'yéaj ládxi'gaquië' Dios, en tunë' xichinë' rëla, en tē dza. Tu' runa' löza lë ni, nuzéguigaquië' bönni' judío neda'. Caní naca, bönni' unná bē', Agripa.

⁸ Na'a, ¿naru' réquitseli' libí'ili' biti' naca le tséajlë'ëru', usubanë' Dios bönni' nati?

Pablo gudxía ládxi'ë bönnachi queë' Cristo

⁹ Gunnë' ca' Pablo:

—Lëzca' neda', zí'atëlö gúquida' le zían ral-la' guna', tá'baga'a-në' Jesús, bönni' Nazaret.

¹⁰ Caní bena' lu yödzö Jerusalén. Gulu'a zían bönnachi ta'yéajlë' Jesús lidxi guíë, tu' bulu'dödë' yugu' bixúz unná bē' lu na'a yöl-la' unná bē'. Cate' gulútië' bönnachi ni', bénlena' légaquië' tuz didza'.

¹¹ Zían luzuí busaca' zi'a yugu' bönni' ni' para ulu'sán ládxi'gaquië' ca ta'yéajlë'ë Cristo. Caní bena' gapa naca lu yu'u ga tu'dubë' bönni' judío, en tu'sëdë' queë' Dios. Guléde'eda' légaquië', ate' gudxía ládxi'a légaquië' ga bidxintë guyija' gapa nacuá yödzö zi'tu' para tsöjxöngaca'-në'.

Rigúxjö'ë Pablo ca böáquië' queë' Cristo

¹² Gunnë' ca' Pablo:

—Para guna' caní guyija' yödzo Damasco, ate' bixúz unná bē' nasöl-la'gaquiē' neda' nudödigaquiē' lu na'a yöl-la' unná bē'.

¹³ Caní guca, bönni' unná bē', Agripa. Cate' ni' sa'yija' la' nöza, ni' naca idú huagubidza, bilé'eda' tu bení' lúzxiba le buzení'rö ca gubidza. Buzení' ga na' zoa', en ga nacúa' nupa sōjácálen neda'.

¹⁴ Ní'irö yúgu'tētu' gudzö'ötu' lu yu, ate' biyönda' chi'i nu bulidza neda'. Bē'ē didza' hebreo, gunné': "Saulo, Saulo, ¿bizx que ribía ládXu'u neda'? Run zi' cuinu', ridá'bagu'u neda'. Raca quiu' ca raca queēba' bēdxi, run zi' cuinba', richégu'ba' yaga tuchi' le túndē'ē-ba' zi'."

¹⁵ Ní'irö gudxa'-né': "¿Nuzxi li', Xan?" Xanru' gudxē' neda': "Neda' ni Jesús, Nu na' ribía ládXu'u.

¹⁶ Na'a, guyasa, en guzuí, tu' buluí'i lahua' li' na'a, para uzóa' li' gunu' xichina', en gunu' ba nalí que lē ni chibilé'enu', enca' quégaca le uluí'ida' li', uluí'i lahua' ga zu'.

¹⁷ Usöla' li' lu ná'agaquiē' bönni' uládz quiu', en lu ná'agaquiē' bönni' izá'a, lógaca nupa ni' risöl-la'a li' na'a.

¹⁸ Risöl-la'a li' ga na' nacué' para gunu' ga ulu'huöálaj guiöj lógaquiē', en ulu'huöáquiē' queē' Dios, en ulu'cá'anē' le naca chul-la que dul-la', en ila'dxinē' lu bení'. Ulu'rúajē' lu na' Satanás tu' xihui', en ila'yáziē' lu nē'ē Dios. Channö ila'yéajlē'ē neda', Dios uniti lahuē' légaquiē', en ugüē' dul-la' nabága'gaquiē', ate' ila'déli'nē' ila'bábalenē' bönachi chinubéajē' Dios quez queē'."

Benē' Pablo ca naca le buluí'inē' Xanru' lē'

¹⁹ Gunnē' ca' Pablo:

—Qui læ ni na', bönni' unná bæ', Agripa, biti' gudá'baga'a guna' le bulu'ínè' Dios, zoè' yehua' yubá, neda'.

²⁰ Buzéajni'ida' nupa nacuá' yödzö Damasco, en gudödi ni' nupa nacuá' Jerusalén, en nupa nacuá' luyú Judea, en bönachi yugu' yödzö zì'tu' para ulu'bí'i ládxi'gaca, en ulu'huóáca queè' Dios, en ilún le ilaca bæ' chibulu'bí'i ládxi'gaca.

²¹ Tu' bena' caní, yugu' bönni' judío gula'zönè' neda' cate' ni' zoa' lö'a yudo', en gul'é'ennè' ilútiè' neda'.

²² Ní'irö gúcalenè' Dios neda', ate' ga ridxintè na'a dza zoa' idú ládxa'a, runa' ba nalí lógaquiè' bönni' cá'asö, en lógaquiè' bönni' lo. Biti' ruá'a didza' yúbölö, pero ca gula'nnasè' zí'alö bönni' gulu'è didza' uláz queè' Dios, enca' ca gunné' Moisés ca ral-la' gaca.

²³ Gula'nnè': "Qui'i sáquè'è Cristo, en tödi gátie', gáquiè' nu isí lo ubán tsaz lu yöl-la' guti, para ulu'è lahui naca löza ila'dxín bönachi lataj bení', en gaca libán que læ ni lógaca bönachi uládz queétu', enca' lógaca bönachi izá'a."

Pablo ruzéajni'inè' Agripa para tséajlè'è Cristo

²⁴ Cate' chibè'è Pablo yugu' didza' ni, le bæ'è uláz queè', ní'irö bæ'è zidzaj didza' Festo, gunné':

—¡Nachixi icju', Pablo! ¡Tu' nazédado'o, chiguchixi icju'!

²⁵ Ní'irö Pablo gudxè' læ':

—Biti' nachixi icja', rea' li', Festo, ate' didza' ni ruá'a naca idútè li, en naca lesaca'.

²⁶ Lè cazè' Agripa, bönni' ni rinná bæ'è, nözinè' yugu' læ ni, en que læ ni na', idú ládxa'a ruá'a

didza' lahuë' lë'. Nözinë' yugu' lë ni, tu' cabí guca bagáchi'sö lë na' guca.

²⁷ Bönni' unná bë', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

²⁸ Ní'irö Agripa gudxë' Pablo:

—Ia'láti'sö la' réquinu' idéli'nu' neda' para gaca' queë' Cristo.

²⁹ Pablo gudxë' lë':

—Ni'a queë' Xanru' Dios ré'ënda', sal-la' ia'láti'sö o yenni', calégasö li', pero lësca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero calëga gága'li' du guié ca ni nága'a neda'.

³⁰ Cate' budxi bë'ë Pablo didza' ni, guzuínë' bönni' lo unná bë' na', ate' gulazuínë' ca' bönni' rinná bë'ë, en Berenice, en nupa rö'lengaca légaquië'.

³¹ Cate' bila'ruájë' quez, gulu'í xtídza'gaquië', ta'nnë':

—Biti' bi nunë' bönni' ni le nabáguë'ë xíguia' gátië', en calëga tsázië' lidxi guié.

³² Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

27

Ta'söl-lë'ë Pablo yödzö Roma

¹ Cate' chigulunë' quégaquië' ila'söl-lë'ë netu' lë'e barco para tséajtu' yödzö Roma, luyú Italia, gula'guélë'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni'

rinná bé'enë' tu cö' bönni' röjáquië' gudil-la nazí'i le: Bönni' Queë' Augusto Röjáquië' Gudil-la.

² Gurentu' tu lë'e barco que luyú Adramitio, le ral-la' tödi yugu' yödzö gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzö Cesarea. Aristarco, tu bönni' yödz Tesalónica, le nababa luyú Macedonia dzáguië' netu'.

³ Cate' za' rení' ia'tú dza, bidxintu' yödzö Sidón, ate' ni' Julio, bönni' na' rinná bé'enë' bönni' röjáquië' gudil-la, lu yöl-la' dxi'i ladxi' queë', bëë Pablo lataj tsejë' ga nacu'ë böchi' luzë'ë para ilácalenë' lë' bi riyadzaj queë'.

⁴ Gudödi ni', bubentu' lë'e barco, ate' buzá'atu' ni'. Gudöditu' tsölá'a ga dë luyú bidxi Chipre ga rö'ö dxi bö' na' recja, tu' za' saca' lotu' bö' recja lu nísado' na'.

⁵ Ní'irö gudöditu' lu nísado' ga nalá' luyú Cilia, en luyú Panfilia, ate' bidxintu' Mira, tu yödzö nababa luyú Licia.

⁶ Bönni' na' rinná bé'enë' bönni' röjáquië' gudil-la, en nachë'ë netu', yöjxáquië' tu barco ni' narúaj yödzö Alejandría que luyú Egipto, barco na' zeaj luyú Italia ga rö' yödzö Roma. Gulu'ë netu' lë'e barco na'.

⁷ Guzá' barco na' tsahui' ládxi'do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölá'a luyú bidxi nazí'i le Creta ga rö'ö dxi bö' na' recja, en bidxintu' ga nalá' yödzö Salmón luyú Creta na'.

⁸ Lu yöl-la' rizáca'sö gudöditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na'

dē yōdzō Lasea.

⁹ Tu' chigudzéda'atu', chigula' zoa bōnadxi gaca ditaj bítí'tēs barco rizá' lu nísado' na', tu' chigudōdi yugu' dza tunē' gubasa cate' si' idxín beo' ziaga cate' récjada' bö'. Que lē ni na' Pablo buzéajni'inē' légaquiē',

¹⁰ rnnē':

—Libi'ili', bōnni', réquibe'eda' ga tseaj barco ni, huazóa bōnadxi gaca ditaj barco ni, en yua' dzō'ō lē'e, en lēsca' soa bōnadxi queēru' gátiru'.

¹¹ Bōnni' na', rinná bé'enē' bōnni' rōjáquiē' gudil-la, guyéajlē'ērē' le gula'nnē' bōnni' na' dē lu nē'ē barco, en bōnni' xan caz, ca le gunnē' Pablo.

¹² Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anē' ni' yugu' beo' ziaga, que lē ni na' la'tu'biqui' yúgu'tē bōnni' nacu'ē lē'e barco na' gulún tuz xtídza'gaquiē' ulu'zē'ē ni', channō huáca ila'dxinē' ga ta'dxín barco lu yōdzō Fenice, lēsca' dē luyú bidxi na' nazí'i le Creta, le dē tsölá'a ga ribía gubidza, ate' gulē'ennē' ulu'gá'anē' ni' yugu' beo' ziaga.

Recja bö' budunu' lu nísado'

¹³ Tu' recja tu bö'do' le za' saca' tsölá'a ga ridōdi gubidza beo' ziaga, téquinē' chiraca ilunē' ca té'ennē', ate' bulu'lisē' guié zi'i naga' du guié le ruzóa dxisō barco, ate' gudōdi barco na' gala' ra' luyú bidxi na' nazí'i le Creta.

¹⁴ Ia'tú chí'isō ca', guyecja tu bö' budunu' za' lotu', nazí'i le Euroclidón.

¹⁵ Tu' ruzéaj bö' na' recja barco na' tsölá'alō, ate' tu' cabí guca tseaj barco ga za' bö', ní'irō bé'ētu' lataj bö' na' buzéaj barco na' ga rē'eni.

16 Cate' gudödi barco na' ga bidxintu' tsölá'a tu luyú bídxido' nazí'i le Cauda, tsölá'a ni' ga biti' récjada' bö', lu yöl-la' rizáca'sö buchísatu' bárcodo' ná'ayöj barco zxön na' yú'utu'.

17 Gudödi burentu' le lahui barco zxön na', ní'irö béga'ratu' barco zxön na'. Zxante barco na' buchölitu' du, para cabí ilá'a lu le ridxía nisa na'. Tu' gúdxitu' tödi barco na', en inídxí' lu yuzxi lu nísado' na', buzötjatu' lari' que, le rutubi bö' rusá' barco na'. Canísö bé'ëtu' lataj bö' na' recja buzéaj barco.

18 Cate' za' rení' ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'.

19 Dza bunní, len na' cuintu' gurú'unatu' le tun dxin que barco na' lu nísado'.

20 Cate' chiguca zían dza biti' rilé'etu' gubidza, en nitú böljaj, en tu' récjada' bö' na' ruzéaj barco na' yú'utu', bíti'rö runtu' löza ulatu'.

21 Tu' chiguca zían dza biti' nágutu', guzuínë' Pablo gatsaj láhui'lö légaquië', en gudxë' légaquië':

—Libí'ili', bönní, dxí'arö guca la'tu' uzé nágali' neda', en cabí uzá'aru' luyú Creta, en cabí udutságaru' lë ni riguí'i rizáca'ru', en yugu' lë ni raca ditaj que barco ni.

22 Na'a, rea' libí'ili': Tsutsu guli'gún ládxi'li', tu' cabí gátili' nituli' libí'ili' tscali' zóali' ni, sal-la' gaca ditaj barco ni.

23 Caní gaca tu' buduluí'i lahuë' neda' gudiyëla tu gubáz lá'ayi queë' Dios. Dios ni néquida' queë', en runa' xichinë'.

24 Gubáz lá'ayi na' gudxë' neda', gunné': "Pablo, biti' gádxinu'. Run bayudxi idxinu' lahuë' César. Tu'

nadxí'inè Dios li', usölè' yúgu'tè bönachi nacua'len li' lè'e barco ni."

²⁵ Que lè ni na', tsutsu guli'gún ládxi'li', tu' ruzxöni ládxa'a-nè' Dios, gaca ca na' chigudxè' gubáz lá'ayi queè' neda'.

²⁶ Caní gaca sal-la' run bayudxi gaca ditaj barco ni tu luyú bídxido', ga ni' tsöjca'ana rë'u.

²⁷ Cate' ni' chigudödi chidá' dza, ate' bö'na' recja ruzéaj barco na' lu nísado' nazí'i le Adriático, idú ladxi' yëla guléquinè' bönni' tunè' dxin lu barco na' chizóa idxín barco gala' tu luyú bidxi.

²⁸ Gula'ru'unè' du lu nísado' na', ate' gula'nözinè' galaj ösa naca ga bidxintè ga rë' lu nisa. Cate' gudödi barco na' ia'látido', gula'ru'unè' du na' leyúbölö, en gula'nözinè' chinaca chinu ösa.

²⁹ Tu' guládxinè' tsöjdín barco na' lu guiöj, que lè ni na', tsölá'a láhuilö que barco gula'ru'unè' lu nísado' tapa guiè zi'i nága'gaca du guiè le tu'zóa dxisö barco lu nisa. Lu yöl-la' ruúbi ruguíisö ládxi'do'gaquiè' gula'bözè' tsení'.

³⁰ Ní'irö gulè'ënnè' bönni' tunè' dxin lu barco ulu'zxúnajè' lè'e barco na'. Bulu'zötjè' bárcodo' na' dè lahui barco zxön na' lu nísado'. Gulunè' ca té'ënnè' ilu'ë ia'lati' zi'tu' guiè zi'i na' naga' du guiè le ruzóa dxisö barco na', le zoa saca' tsölá'a láhuilö.

³¹ Ní'irö Pablo gudxè' bönni' na' rinná bé'enè' bönni' röjáquiè' gudil-la, tsözxön len bönni' na' röjáquiè' gudil-la, gunné':

—Channö cabí ulu'gá'anè' bönni' ni lè'e barco ni, biti' gaca uláli'.

³² Ní'irö bönni' na' röjáquiè' gudil-la gula'chúguiè' du naga' bárcodo' na', ate' gulu'ë lataj gubixi lu nísado'.

³³ Cate' chizá' rení', Pablo gúta'yue' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runli' gubasa, biti' bi náguli'.

³⁴ Que lë ni na', ráta'yua' loli' gáguli' para huóaca ládxi'li', tu' cabí gátili' nituli' libí'ili'.

³⁵ Cate' Pablo budxi bë'ë didza' ni, gudélë'ë yöta xtila, en gudxë' Dios: "Xclenu'." Caní benë' lógaquië' yúgu'të'. Ní'irö buzxuzxjé' yöta xtila na', en gusí lahuë' rahuë'.

³⁶ Ní'irö bila'dipa ládxi'gaquië' yúgu'të', en gu-lahuë'.

³⁷ Tscatu' zóatu' lë'e barco na', gúcatu' idú chopa gayuá' yu' tsónnalalaj yu' chizxópatu'.

³⁸ Gudödi gulahuë', en bulu'huöljanë', ní'irö gula'ru'unë' zxoá' xtila dë lë'e barco na' lu nisa, para ulu'lahuë' yua' dzö'ö lë'e barco na'.

Raca ditaj barco lu nísado'

³⁹ Cate' chiguca lahui' dza, yugu' bönni' tunë' dxin lu barco na' biti' bulu'únbë'ë luyú na'. Bila'lé'enë' ga röjrö' nisa zxön na' gatsaj láhui'lö luyú bidxi na', en dë lataj ni' ga naca lachi' ra' nísado'. Gulë'ënnë' ilunë' ga tsaza barco na' ga ni'.

⁴⁰ Ní'irö bulu'sedxë' yugu' du guié nága'gaca yugu' guié zi'i tu'zóa dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj rudxi'i barco. Ní'irö bulu'chisë' lari' que le rutubi bö', le zoa tsölá'a láhuilö barco na', ate' ní'irö gusí lo ridödi barco saca' ga röjrö' nísado' gatsaj láhui'lö luyú bidxi na'.

⁴¹ Cate' bidxín barco na' tu lataj ga ridzaga chopa nisa, ni' binidxi' tsölá'a láhuilö barco na' lu yuzxi lu

nísado' na', ate' bugá'anasö barco na' ga ni'. Bíti'rö guca bi utá le, ate' tsölá'a cúdzi'lö barco na', gusí lo riguitsaj nísado' na' le, len yöl-la' rizá' que.

⁴² Ní'irö bönni' rójáquië' gudil-la gulë'ënnë' ilútië' bönni' nadzúngaquië', para cabí ila'zxúnnajë', ila'zxóë' lu nisa na'.

⁴³ Bönni' na' rinná bé'enë' bönni' na' rójáquië' gudil-la gú'unnë' usölë' Pablo, ate' gunná bé'enë' bönni' na' rójáquië' gudil-la cabí ilunë' ca na' tē'ënnë'. Ní'irö gunná bé'enë' bönni' taca ila'zxóë' lu nisa, zí'alö légaquië' ila'yázië' lu nisa para ila'dxinë' luyú bidxi.

⁴⁴ Gunná bé'enë' ca' yugu' bönni' nagá'anagaquië' ila'zxóë' lu yaga dzö'ö láhuilö barco, en ia'bal-lë' láhuigaca yágado' que barco na'. Caní guca, bulu'lë' yúgu'të'. Canísö bila'dxinë' luyú bidxi na'.

28

Le benë' Pablo luyú bidxi nazí'i le Malta

¹ Cate' chibulatu' yúgu'tëtu', gunöztu' luyú bidxi ga na' zóatu' nazí'i le Malta.

² Bönni' xidza' nacu'ë luyú bidxi na' lu yöl-la' dxi'i ladxi' quégaquië' gulunë' netu' bal. Gula'béquië' guí', ate' bulu'lidzë' netu' yúgu'tëtu' iditsë'e cuintu', tu' ralaj guiöj, en runda' ziaga.

³ Ní'irö Pablo gúchë'ë tu tsölén huága zxisi bídxido', en cate' gulu'ë le lu guí', birúajba' tuba' bëla sínia' lë'e huágado', rizxúnnajba' böchila que guí' na', ate' yöjtí'iniba' yen në'ë Pablo.

⁴ Cate' bönni' xidza' na' bila'lé'enë' bëla na', nála'ba' yen në'ë Pablo, gulë' tuë' ia'tué':

—Le nácatë bönni' ni náquië' nu ruti bönachi. Sal-la' bulë' lu nísado', dios queëru' lë' Tsahui' bití' ru'ë lë' lataj soë' ibanë'.

⁵ Gudxibi në'ë Pablo, en busládzu'ë-ba' bëla sínia' na'. Yöjxóatëba' lu guí', ate' lë' bití' bi guca queë'.

⁶ Bönni' xidza' nacu'ë ni' tu'yúë' Pablo, bátacalö cö'ë gui, o tsö'ötë' gátië'. Ní'irö cate' chigudzé ta'bözë', en bila'lé'enë' bití' bi raca queë', ia'tú le guléquinë', ate' gula'nnë' naca cazë' tu dios.

⁷ Lataj ní'isö dë xiyúë' Publio, bönni' lo que luyú bidxi na', ate' bönni' ni benë' netu' bal. Lu yöl-la' dxi'i ladxi' queë' gulu'ë netu' lidxë' idú tsonna dza.

⁸ Dza na' dë' ré'enë' xuzë' Publio na', yu'ë xilá, en ré'enë' huë' rön. Guyázië' Pablo söjyúë' lë', en gudödi bulidzë' Dios, ní'irö guxóa në'ë bönni' huë' na', en bunë' lë'.

⁹ Tu' benë' Pablo lë ni, lësca' bila'dxín nupa te'e ga zoë', nacuá' luyú bidxi ni', en bulu'huöáquië'.

¹⁰ Yugu' bönni' ni gulunë' netu' bal, en zían le gulunë' queëtu'. Cate' chizóa uzá'atu' luyú ni', bulu'nödzjë' yugu' le naquínitu' queëtu'.

Ridxinë' Pablo lu yödzö Roma

¹¹ Cate' chiguca tsonna beo' zóatu' ni', ní'irö gurentu' tu lë'e barco que yödzö Alejandría, le bugá'ana luyú bidxi na' yugu' beo' ziaga. Barco ni dá'gaca tsölá'a láhuilö budó' yaga lëguequi Cástor, en Pólux, dios bilidi' quégaca bönachi Alejandría na'.

¹² Buzá'a barco na' ga ni', ate' bidxín yödzö Siracusa, ga ni' bugá'anatu' tsonna dza.

¹³ Buzá'atu' ni', ate' gudödítu' tsölá'alö luyú ni', en bidxintu' yödzö Regio. Cate' za' rení' ia'tú dza,

tu' recja bö' za' saca' ga ridödi gubidza beo' ziaga, buzá'atu' ni', ate' dza buropi na' bidxíntëtu' yödzö Puteoli luyú Italia.

14 Lu yödzö na' yöjxáca'tu' yugu' böchi'ru' ta'yéajlë'ë Cristo, ate' guláta'yuë' lotu' ugá'analentu' légaquië' idú xunu' dza. Cate' bizá'a dza na' buzá'atu' ni' para tséajtu' yödzö Roma, rizë'e ní'atu'.

15 Chibila'yönnë' böchi'ru' nacu'ë Roma chizóa idxintu' ni', ate' bila'rúajë' idixí'gala'gaquië' netu'. Bila'dxinë' tu yödzödo' nazí'i le Yé'ëyi Que Apio. Ia'bal-lë' bila'dxinë' tu lataj nazí'i le Tsonna Yu'u Quégaquië' Bönni' Yú'ugaquië' Nöza. Cate' Pablo bilé'enë' légaquië', bidipa ládxë'ë, en gudxë' Dios: "Xclenu'."

16 Cate' bidxintu' Roma, bönni' na' rinná bé'enë' bönni' röjáquië' gudil-la, guchë'ë bönni' na' nadzúngaquië', ate' budödë' légaquië' lu në'ë tu bönni' lo rinná bé'enë' bönni' röjáquië' gudil-la, ate' bë'ë Pablo lataj soë' queëzë', zóalenë' lë' tu bönni' rejë' gudil-la ruyúë' lë'.

Runë' Pablo libán lu yödzö Roma

17 Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquië':

—Libí'ili', böcha'a, sal-la' biti' bi bena' quégaca bönachi ládzaru', en calëga que le nalëbiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guíë'.

18 Ní'irö cate' chigula'nabi yúdxinë' neda' bönni' Roma, gulé'ënnë' ulu'sanë' neda', tu' gulé'quibe'enë' bití' nabága'a xíguia' gátia'.

19 Yugu' bönni' judío ni' gula'dá'báguë'ë nupa na' gulé'ëni ulu'sán neda', ate' ben bayudxi gunaba' tseja' lahuë' César ga uchi'a usöröë' neda', en calëga para uzéguia' bönachi uládz queëru' didza'.

20 Que lë ni na' bulidza' libí'ili' para ilé'eda' libí'ili', en gü'ilena' libí'ili' didza', tu' nága'a du guié ni tu' runa' löza le runru' löza rë'u, bönachi Israel, gácatë lë na' guzxí' lu në'ë Dios gata' queëru'.

21 Ní'irö légaquië' gulé' Pablo:

—Bití' ridxini queëtu' guichi le za' luyú Judea ca naca lë na' raca quiu', en cuntu nu ridxini nu naca böchi'ru' judío, nu usiyöni netu' channö nu bi rnnë quiu' le ruá' dö'.

22 Na'a, rë'ënitü' yönitü' xtídzü'u, lë na' riguinaj icju', tu' chinözitu' ta'nnë bönachi yúgu'të lataj quégaca nupa nazí' lu në'eguequi xibá cubi ni.

23 Caní guca, bulu'dxíë' bë' tu dza, ate' dza na' bila'dxinë' zíanë' ga na' zoë' Pablo. Gusí lahuë' Pablo zílado', ate' ni' gúl-li'ni buzéajni'inë' légaquië', en buchila lá'anë' le rinná bë'ë Dios. Gú'unnë' ulu'inë' légaquië' naca idútë li libán runë' queë' Jesús. Para gunë' caní bugunë' dxin le rinná bë' xibá queë' Moisés, enca' le gula'nnë' bönni' gulu'ë didza' uládz queë' Dios.

24 Bal-lë' gula'zí' lu ná'agaquië' didza' bë'ë Pablo, pero ia'bal-lë' bití' ca' gula'yéajlë'ë.

25 Tu' bila'rúajë' choplö, gula'sí lógaquië' tu'zë'ë ni', ate' Pablo gudxë' légaquië', rnnë':

—Didza' nácate' bē'ē Dios Bō' Lá'ayi, lē na' gunné' Isaías, bōnni' bē'ē didza' uláz queē' Dios, ca na' buzéajni'inē' xuz xtó'oru', gunné':

²⁶ Guyéaj lógaca bōnachi ni', yōjōdxi légaquiē':

Yōni nágali', pero biti' tséajni'ili'.

Uyuli' iná'ali', pero biti' ilé'eli'.

²⁷ Yugu' bōnni' ni chinazidi icja ládxi'do'gaquiē', en biti' bi riyaza icja nágagaquiē'.

Gulunē' ca tun nupa nachul-la guiōj lóguequi

para cabí ila'lé'e len guiōj lóguequi,

en cabí ila'yōni nágaguequi

para cabí ulu'zéajni'i ládxi'guequi,

en cabí ilé'ēni ulu'huóaca queē' Dios

para gaca una' léguequi.

²⁸ Na'a, ral-la' inōzili' lē ni. Dios risōl-lē'ē netu' lógaca bōnachi izá'a para ulu'lágaca, ate' légaquiē' ila'yōnnē'.

²⁹ Cate' Pablo budxi bē'ē didza' ni, bila'rúajē' bōnni' judío, ta'díl-lada' dídzē'ē la' légacasē'.

³⁰ Idú chopa iz bugá'anē' Pablo ni', zoē' tu lu yu'u ga na' riguizxjē', ate' benē' bal yúgu'tē nupa buduyúgaca Lē'.

³¹ Lu yōl-la' rugu ladxi' benē' libán ca rinná bē'ē Dios. Busédinē' bōnachi ca naca queē' Xanru' Jesucristo, ate' cuntunu buzaga' xinözē'. ¡Ca' naca!

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

58bf86df-ae22-508c-81dc-936dbf138c25